

萬 有 文 庫

第 二 集 七 百 種

王 雲 五 主 編

宋 詩 紀 事

(二)

厲 鶚 曰 瑄 輯

商 務 印 書 館 發 行

宋 詩 紀 事

(二)

厲 鶚 馬 日 瑄 輯

國 學 基 本 叢 書

萬有文庫

第二集七百種

總編纂者

王雲五

商務印書館發行

宋詩紀事卷四

錢唐 厲鶚 緝
祁門 馬曰瑄 同緝

姚鉉

鉉字寶之。廬州合肥人。太平興國八年進士。知郟州。入爲起居舍人。累遷兩浙轉運使。有文集。

賞花釣魚侍宴應制

上苑煙花迥不同。漢皇何必幸回中。
花枝冷澗昭陽雨。釣線斜牽太液風。
綺萼惹衣朱檻近。錦鱗隨手玉波空。
小臣侍宴驚凡目。知是蓬萊第幾重。

詩話總龜。淳化中。春日苑中。賞花釣魚。小宴宰相至。三館預坐。咸使賦詩。上覽以第優劣。時姚鉉賜白金百兩。時輩榮之。以比奪袍賜花等故事。

松江

句吳奇勝絕無儔。更見松江八月秋。
震澤波光連別派。洞庭山影落中流。
汀蘆擁雪藏漁市。岸竹香風趁客舟。
清興不窮聊一望。煙空雲霽倚層樓。
蘇州府志

句

疎鐘天竺曉。一雁海門秋。
錢塘郡。皇朝類苑。

歐陽程

程、營道人。太平興國八年進士。仕至屯田員外郎。

詠池亭

鑿開幽境泛流萍。迴合波開小洞庭。寒影倒吞凌漢樹。冷光高浴半天星。魚翻錦鬣波紋皺。鷺洗霜翎水氣腥。昨夜蛟龍忽飛去。滿軒風雨震雷霆。

湖廣通志。歐陽程初名和。營道人。少貧。兄爲郡吏。依之傭書。賦池亭詩。太守大喜。給俸金。遣充學官弟子。太平興國八年。赴試。路逢一青衣童子云。以今科省榜。走報各處城隍。因問歐陽程。因改名程。是年登第。

王禹偁

禹偁字元之。鉅野人。九歲能文。太平興國八年登進士。歷右拾遺。拜左司諫。廬州妖尼道安誣訟徐鉉。禹偁請論道安罪。貶商州團練副使。累遷翰林學士。坐謗訕。知滁州。真宗卽位。召知制誥。出知黃州。卒。有小畜集。

晁以道與三泉李奉議書云。本朝王元之之後晏公。晏公之後歐陽公。歐陽之後東坡。皆號一代龍門。其門下灑掃應對之士。後爲名公卿將相者。不可勝數也。

西清詩話。王元之之父本磨家。畢文簡士安爲州從事。元之代其父輪。麪至公字。立庭下文簡。方命諸子。屬句云。鸚鵡能言爭比鳳。元之抗聲曰。蜘蛛雖巧不如蠶。文簡曰。子精神滿腹。將且名世。後與公接武朝廷。

松江

三年爲吏住江濱。重到江頭照病身。滿眼碧波輸野鳥。一蓑疎雨屬漁人。隨船曉月孤輪白。入座晴山數點春。張翰精靈應笑我。綠袍依舊惹埃塵。

汎吳松江

帶篷疎薄漏斜陽。半日孤吟未過江。惟有鷺鷥知我意。時時翹足對船窗。

移任長洲

移任長洲縣。舟中興有餘。篷高猶見月。棹穩不妨書。雨碧蘆枝亞。霜紅蓼穗疎。此行紆墨綬。不是爲鱸魚。移任長洲縣。窮秋入水鄉。江涵千頃月。船載一篷霜。竹密藏魚躍。雲疎漏雁行。故園漸迢遞。煙浪自茫茫。

虎丘

薜牆圍著碧孱顏。曾是當年海涌山。盡把好峯藏寺裏。不教幽境落人閒。劍池草色經冬在。石座苔花自古斑。珍重晉朝吾祖宅。一回來此便忘還。

絕句

謫官無俸突無煙。唯擁琴書盡日眠。還有一般勝趙壹。囊中猶貯御書錢。

侯鯖錄。前世錢未有草書者。淳化中。太宗始以宸翰爲之。卽成以賜近臣。崇寧大觀中。御書錢蓋襲故事也。王元之謫商於。有詩云云。

春日雜興

兩株桃杏暎籬斜。衰點商州副使家。何事春風容不得。和鶯吹折數枝花。

蔡寬夫詩話。元之嘗學白樂天詩。在商州賦春日雜興云云。其子嘉祐。謂老杜嘗有恰似春風相欺得。夜來吹折數枝花之句。語頗相近。請易之。元之欣然曰。吾詩精詣。遂能暗合子美耶。更爲詩曰。本擬樂天爲後進。敢期杜甫是前身。卒不復易。

齊安郡作

憶昔西都看牡丹，稍無顏色便心闌。而今寂寞山城裏，鼓子花開亦喜歡。

能改齋漫錄：王元之謫齊安郡，民物荒涼殊無況，營妓有不佳者，公詩云：「然唐抒情集記，朝士在外地，觀野花。」追思京師舊遊詩云：「曾過街西看牡丹，牡丹未謝即心闌。如今變作村田眼，鼓子花開亦喜歡。」蓋王刊定此詩耳。

題錢塘縣羅隱手植海棠

江東遺蹟在錢塘，手植庭花滿縣香。若使當時居顯位，海棠今日是甘棠。以上小畜集。

別諸生

綴行相送我何榮，老鶴乘軒媿谷鶯。三入承明不知舉，看人門下放門生。

灑水燕談：王元之初知制誥，上疏雪徐鉉，貶商州，召入爲學士，坐辨孝章皇后不實，謫滁州，復召知制誥，撰太祖尊號冊，坐輕誣，謫黃州，作三黜賦以自述。時蘇易簡適放榜，奏曰：「禹偁翰林名儒，今將全榜諸生送於郊上，可其奏。」諸生別元之，占一絕付

狀元孫何曰：爲我

多謝蘇易簡云。

投時相

早有虛名達九重，宦途流落漸龍鍾。散爲郎吏同元稹，羞見都人看李邕。舊日謬吟紅藥樹，新朝曾獻阜囊封。猶祈少報君恩了，歸臥山林作老農。

石林燕語：王元之初自掖垣，謫商州團練副使，至道中，復自學士謫滁州。眞宗卽位，以刑部郎召知制誥，凡再貶，還朝不無怏怏，時張丞相齊賢、李文定沆當國，以詩投之，齊賢不悅，繼有黃州之遷。

右

元象中台拆，皇家上相薨。大功銘玉鉉，密事在金滕。趙普挽詞。先帝升遐日，詞臣寓直時。樞前言顧命，筆下定鴻詞。宋湜挽詞。以上青箱雜記。

身後聲名文集草，眼前衣食簿書堆。澤畔騷人正憔悴，道旁山鬼莫揶揄。

許彥周詩話：元之詩可重，大抵語迫切而意雍容，有句云：「類樂天也。」

羅處約

處約，字思純，益州華陽人。太平興國八年進士，知吳縣。太宗召試，擢著作郎，直史館。詔授荊湖路巡撫卒。蘇易簡王禹偁集其文為東觀集。

泛太湖

三萬六千頃湖侵海內田，逢山方得地。見月始知天，南國吞將盡。東溟勢欲連，何當灑為雨。無處不豐年。
宋文鑑。

鄭文寶

文寶，字仲賢，寧化人。仕南唐，校書郎。宋太平興國八年舉進士，歷官陝西轉運使，兵部員外郎。

東都事略：文寶以詩名家。

家多警句，善篆工琴。

題王子晉祠

秋陰漠漠秋雲輕，
緱氏山頭月正明。
帝子西飛仙馭遠，
不知何處夜吹笙。

西清詩話：緱氏，王子晉昇仙之地，有祠在焉。鄭工部文寶題一絕云：

後安元獻守洛，過見之，取白樂天語書其後云：此詩在處，有神物護持。

寒食訪僧

客舍愁經百五春，
雨餘溪寺綠無塵。
金花开處鞦韆鼓，
粉頰誰家鬪草人。
水上碧桃流片段，
梁間新燕語逡巡。
高僧不飲客攜酒，
來勸先朝放逐臣。

郢城新亭

每到新亭卽厭歸，
野香經雨長松圍。
四簷山色消繁暑，
一局碁聲下翠微。
冰片角巾簪澗月，
錦文卷石砌苔磯。
近來學得籠中鶴，
迴避流鶯笑不飛。
以上玉壺野史。

闕題

亭亭畫舸繫寒潭，
直到行人酒半酣。
不管煙波與風雨，
載將離恨過江南。
一夜西風旅雁秋，
背身調鏃索征裘。
關山落盡黃榆葉，
駐馬誰家唱石州。

江雲薄薄日斜暉，
江館蕭條獨掩扉。
梁燕不知人事改，
雨中猶作一雙飛。
蔡寬夫詩話。

送曹緯劉鼎二秀才

旦夕春風老，
離心共黯然。
小舟聞笛夜，
微雨養花天。
手筆人皆有，
曹劉世所賢。
柳侯重才子，
從此看鶯遷。

句

百草千花路。輕風細雨天。過關已躍樗蒲馬。誤喘猶驚顧兔屏。重經貶所。杜曲花光濃似酒。灞陵春色老于人。長安送別。滿帆西日催行客。一夜東風落楚梅。送人歸湖中。失意此中遷客酒。多年不見侍臣花。以上皇朝類苑。

沙暖鳧鷖行哺子。蹊深桃李臥開花。

蔡寬夫詩話。歐陽文忠公稱仲賢張僕射園中一聯以爲集中少比其詩云。

曾致堯

致堯字正臣。撫州南豐人。太平興國八年進士。真宗朝。以戶部郎知秦泉等州。有山亭六詠集。

崇覺寺

水深花影地。莓苔春色烘。人若不開。走報鵲原無別事。遠將歌管酒壺來。西江詩話。

句

沙鷺窺吟榻。風蟬入座隅。六詠芙蓉閣。雲昏迷候館。樹缺辨江湖。六詠望江樓。以上輿地紀勝。

寇準

準字平仲。華州下邽人。太平興國中進士。淳化五年。參知政事。真宗朝。累官尚書右僕射。集賢殿

大學士同中書門下平章事封萊國公乾興初貶雷州司戶徙衡州司馬卒仁宗時贈中書令諡忠愍有巴東集

湘山野錄萊公有野水無人渡孤舟盡日橫之句深入唐人風格送人使嶺南句云到海只十里過山應萬重人以爲警絕晚竄海康至境首問雷吏去海遠近曰只可十里憔悴奔竄已兆于此

青箱雜記魏仲先贈萊公詩曰有官居鼎鼐無地起樓臺播傳漢北章聖朝北使至問那箇是無地起樓臺相公時方居散地因召還授北門宮鑰茗溪漁隱叢話忠愍公詩含思悽惋蓋富於情者也

江南春

波淼淼柳依依孤村芳草遠斜日杏花飛江南春盡離腸斷蘋滿汀洲人未歸
杳杳煙波隔千里白蘋香散東風起日落汀洲一望時柔情不斷如春水

湘山野錄萊公富貴之時所作詩皆悽楚愁怨嘗爲江南春云云

春日登樓懷歸

高樓聊引望杳杳一川平野水無人渡孤舟盡日橫荒村生斷靄古寺語流鶯舊業遙清渭沈思忽自驚
水村卽事

虛齋臨遠水吟釣度朝晡葦岸秋聲合莎庭鶴影孤片雲藏疊嶂野燒起寒蕪獨步時凝望離人隔五湖
題巴東寺

寺在猿啼外門開古澗涯山深微有徑樹老半無枝望遠雲長暝談空日易移恐朝金馬去還失白蓮期
書河上亭壁

暮天寥落凍雲垂一望危亭欲下遲臨水數村誰畫得淺山寒雪未消時

海康西館有懷

風露淒涼西館靜悄然懷舊一長歎海雲銷盡金波冷半夜無人獨凭闌

以上寇萊公集

過襄州留題驛亭

沙堤築處迎丞相驛吏催時送逐臣到了輸他林下客無榮無辱自由身

石林詩話

和舊桃

將相功名終若何不堪急景似奔梭人閒萬事何須問且向樽前聽豔歌

侍兒小名錄拾遺

春晝

白晝綠成芳草夢起來幽興有新詩風簾不動黃鸝語坐見庭花日影移

春恨

侵階草色連朝雨滿地梨花昨夜風蜀魄不來春寂寞楚魂吟夜月朦朧

以上合璧事類前集

李含章

含章字時用宣城人太平興國中進士官屯田都官員外郎充三司度支判官出知本郡罷

遊桃源觀

碧草芊綿十洞春。青蒼寒疊五溪雲。山縈乳竇層層秀。路隔桃花處處分。苔徑竹深迷鶴跡。石壇松古漏星文。通宵回想塵寰事。好結茅茨向水濱。宛雅。

何承矩

承矩字正則。河南人。贈侍中。繼筠子。幼爲棣州衙內指揮使。太平興國中。知潭州。至齊州團練使。

夢溪筆談。瓦橋關北。與遼爲鄰。素無關河爲阻。六宅使何承矩守關。始

議瀦水爲塞。恐謀泄。日會僚佐。汎船置酒賞蓼花。作蓼花游數十篇。

文昭園聞提壺有感

馬家公子好樓臺。鑿破青山碧沼開。啼鳥不知人事變。數聲猶傍水邊來。

方輿勝覽。文昭園在潭州興國間。何承矩爲守園吏。

云昔屬馬家。今歸趙氏。因聞提壺有感。作詩云云。

王操

操字正美。江南處士。太平興國時。上南郊頌。授太子洗馬。仕至殿中丞。

黃葵奉使隴右至石濠驛作

昔年南國看黃葵。雲鬢金釵向後垂。今日衰容籬落下。秋風寂寞兩三枝。雅言系述。

題水心寺壁

分飛南渡春風晚。卻返家林舊業空。無限離情似楊柳。萬條垂向楚江東。

歷代吟詠，王操謁宋國老獻詩，送數百縑，于鍾陵飲酒數日而盡。
醉中挂帆數百里，至落星灣，半醉醒，烟雨中登水心寺，題詩於壁。

送人南歸

相送當搖落，孤舟泛渺瀰。去帆看已遠，臨水立多時。別浦寒鴻下，空山夜鶴移。他年重會面，吟鬢共成絲。

喜故人至

地僻無賓侶，柴門晝始開。谿山寒葉落，江國故人來。話舊驚霜鬢，論詩滯酒杯。相留喜同宿，不寐曙光回。

上李相公

弱冠登龍入粉闈，少年清貴古來稀。袖中詔草朝天去，頭上宮花侍燕歸。卓筆玉堂寒漏迴，卷簾池館水禽飛。三台位近猶多遜，閑聽秋霖憶翠微。以上宋文鑑

塞上

無定河邊路，風高雪灑春。沙平寬似海，鵬遠立如人。絕域居中土，多年息虜塵。邊城吹暮角，久客自悲辛。

村家

野景村家好，柴籬夾樹身。牧童眠向日，山犬吠隨人。地僻鄉音別，年豐酒味醇。風光吟有興，桑麥暖逢春。以上瀛奎律髓

潘若冲

若冲、太平興國中官桂林守。

寄南嶽廖融

曾經別墅住行蹤。春浪和煙撼釣筒。共步幽亭連石蘚。寄眠靜榻帶松風。秋來頻夢岳雲白。別後應添鶴頂紅。又泛扁舟隨汴水。不堪南望思忡忡。雅言雜載。

王周

周登進士第。曾官巴蜀。詩一卷。

胡震亨云。唐宋藝文志。並無其人。惟文獻通考載。入唐人集目中。今考峽船詩序。引陸魯望茶具詩。其人蓋在魯望之後。而詩題紀年有戊寅己卯兩歲。近則梁之貞明。遠則宋之太平興國也。自註地名。又有漢陽軍興國軍爲宋郡號。始五代人而入宋者。

湖口縣

柴桑分邑。載圖經。屈曲山光展畫屏。最是蘆洲東北望。人家殘照隔煙汀。

金口步。在江北漢陽軍下。必鐵也。

兩山鬪咽喉。羣石轟牙齒。行客無限愁。橫吞一江水。

宿疎陂驛

秋染棠梨葉半紅。荊州東望草平空。誰知孤宦天涯意。微雨蕭蕭古驛中。以上全唐詩。

錢熙

熙字大雅。泉州南安人。善屬文。陳洪進愛其才。以弟之子妻之。將署府職。辭不就。中雍熙二年進

士仕殿中丞直史館坐累出判朗州至道閒加右司諫卒有集

娛書堂詩話錢熙泉南才士曾作四夷來王賦獻太宗愛其才又嘗撰三酌酸文世稱精絕後亦不達而故鄉人李慶孫以詩弔之曰四夷妙賦無人繼三酌酸文舉世傳

雞冠花

亭亭高出竹籬閒露滴風吹血未乾學得京城梳洗樣舊羅包卻綠雲鬢全芳備祖

九日溪偶成

漁家深處住鷗鷺泊柴扉雨過莎迷徑潮來風滿衣岸幽分遠景波冷漾晴暉卻憶曾遊賞嚴陵有舊磯

清源文獻

句

鶴歸已改新城郭牛臥重尋舊墓田送人金陵拜掃 皇朝類苑

陳彭年

彭年字永年撫州南城人雍熙二年進士真宗朝召試爲祕書丞直史館翰林學士拜參知政事進兵部侍郎卒贈右僕射諡文僖有集

國老談苑陳彭年在翰林所兼十餘職皆文翰清祕之目時人謂其署銜爲一條冰

送申國長公主爲尼日瑄按唐詩紀事作楊郁伯送字人入道詩字句小異

盡出花鈿散寶津。雲鬢初剪向殘春。因驚風燭難留世。遂作池蓮不染身。貝葉乍翻疑軸錦。梵聲纔學誤梁塵。從茲豔質歸空後。湘浦應無解佩人。

湘山野錄。章聖朝。申國長公主爲尼。詔兩禁送於寺。各賦詩。彭年詩云。都下好事者。以鷓鴣天曲聲歌之。

劉師道

師道字損之。開封人。雍熙二年進士。咸平初。知潤州。累官三司度支副使。樞密直學士。

句

南浦未傷春草碧。北山仍媿曉猿驚。寄別。野馬飛窗日。醯雞舞甕天。以上皇朝類苑。

陳世卿

世卿字光遠。南劔州沙縣人。雍熙二年進士。眞宗朝。歷官度支員外郎。荆湖北路轉運使。以祕書少監知廣州。

思古堂

思古堂前酒一尊。共談時事出孤村。臨期上馬無他囑。多買詩書教子孫。延平府志。

錢若水

若水字澹成。一字長卿。河南新安人。雍熙中。舉進士。累知制誥。歷集賢學士。鄧州觀察。并代經略使。卒。贈戶部尚書。有集。

禁林讌會之什

一夜春風滿帝都。禁林清曉宴舜裾。玉堂乍到驚凡目。金鎖徐開見御書。承旨學士嚴以扇鏤鎖御書于玉堂之
上四字驪龍爭夭矯。兩篇瓊樹鬪扶疎。詞臣此會人應羨。聖主多才古不如。日上花甌簾捲後。柳遮鈴索
雨晴初。閣前吟罷先沈醉。忘卻西垣有直廬。翰苑羣書

送楊大年知處州二首

夫子厭承明。還求領郡行。兩章千負屨。數刻對延英。豈獨綵衣樂。兼爲畫錦榮。聖朝循吏傳。首得見君名。
汗簡成惇史。分符別近班。仍聞括蒼郡。酷似武夷山。捲箔煙霞麗。登樓水石閑。二年棄官去。惟我獨何顏。
括蒼羣紀

濟源縣裴公亭

裴相亭成未退身。空煩舞袖與歌塵。至今亭下蕭蕭竹。似對秋風怨主人。御選四朝詩

句

日上花梢簾捲後。柳遮鈴索雨晴初。耆舊續聞

孫冕

冕字伯純。新淦人。雍熙進士。天禧中。尚書禮部郎中。直史館。出守蘇州。

書蘇州廳壁

人生七十鬼爲鄰。已覺風光屬別人。莫待朝廷差致仕。早謀泉石養閑身。去年河北曾逢李。今日淮西又

見陳寄語姑蘇孫太守也須抖擻舊精神。

湘山野錄孫集賢冕天禧中直史館晚守蘇已及引年大書詩于廳拂衣而往詔下公已歸矣。

焦宗古

句

芳樹高低啼蜀魄朝雲濃淡極巴天。

送人遊蜀。

皇朝類苑雍熙以來文士句。

朱嚴

嚴工篆隸見王元之小畜集。

句

寓直有誰同騎省立班獨自戴貂冠。

贈徐常侍。

皇朝類苑雍熙以來文士句。

李拱

拱雍熙閒人。

句

犬眠花影地牛牧雨聲坡。

題村舍。

楊文公談苑。

趙復

復雍熙閒人。

句
船官風破浪。關吏鼓侵晨。送晏集賢南歸。楊文公談苑。

陳 詰

句

籠雞對窗語。鬪雀繞門飛。閑居。皇朝類苑。雍熙以來文士句。

胡 則

則字子正。婺州永康人。端拱己丑進士。歷太常博士。提舉兩浙榷茶事。兼知睦州。又爲江淮制置發運使。以右諫議大夫知杭州。官至兵部侍郎致仕。

別方巖并序

端拱元年春。僕與湖湘陳生束書居方巖僧舍。暨命駕求岳牧薦。應天子舉。將與僧別。率爲五言十二韻。書於屋壁。下卜商曰。動天地。感鬼神。莫近於詩。僕罔敢知而復爲。或言之者無罪。庶幾懷矣。知我無所隱焉。仲秋月朔。胡則書。

寓居峯頂寺。不覺度炎天。山叟頗爲約。林僧每出禪。虛懷思往事。宴坐息諸緣。照像龕燈暗。通宵磬韻傳。冥心資寂寞。琢句極幽元。拾菌寒雲下。烹茶翠竹前。遠陰臨岳樹。清響答巖泉。僻徑無來客。新秋足亂蟬。松風生井浪。溪雨長苔錢。自省隨浮世。終難駐永年。徧遊曾宛轉。欲去更留連。明日東西路。依依獨黯然。
永康縣志。

陳堯叟

堯叟字唐夫。閬中人。省華子。端拱二年進士第一。解褐光祿寺丞。累遷樞密直學士。加三班。兼銀臺通進封駁司制置羣牧使。大中祥符中與王欽若以本官檢校太尉。同平章事。尋拜右僕射知河陽。卒贈侍中諡文忠。

洞宵宮

迴合煙光疊翠屏。東南山水此爲靈。鶯花春壓蓬萊境。樓閣夜干牛斗星。古檜森羅燒藥竈。彩雲飄灑聚仙亭。遼天俯近期歸鶴。澗谷旁通駭巨溟。紫陌紅塵無一點。綠毛仙骨有千齡。當時聽法談元者。環佩鏘鏘拱上清。杭州府志

披雲亭

秦人百二山河固。陝服城闌控此中。別構棟梁成爽塏。俯觀竹樹立青蔥。虛簷頌敞迎朝日。曲檻縈迴帶晚風。登眺自欣襟帶地。萬分轍迹坦然同。河南府志

會 會

會字宗元。泉州晉江人。端拱二年進士第二。由光祿寺丞。知宣州。祥符末。由三司判官。出爲兩浙轉運使。仁宗朝。以刑部郎中集賢殿修撰知明州。

重登蕭相樓

不見當年李翰林。江天爲我結層陰。九華門外柳三尺。蕭相樓前松十尋。物在人亡空有淚。時殊事變獨

傷心。隻雞斗酒江干市。白首風前些楚吟。池州府志

擣砧詞曰瑄按此詩中吳紀聞作龔宗元

星旂耿耿寒煙浮。白龍銜月臨霜樓。誰家砧弄細腰杵。一聲擣破江城秋。雙桐老翠墮金井。高低冷逐西風緊。靜如秋籟暗穿雲。天半驚鴻斷斜影。哀音散落愁人耳。何處離情先喚起。長信宮中葉滿階。洞庭湖上波平水。萬里征夫眠未成。搖風擣月何丁丁。楚關秦嶺有歸客。一枕夜長無限情。吳氏詩永

盛度

度字公量。餘杭人。端拱二年進士。真宗朝累官翰林學士。仁宗景祐初。拜參知政事。遷知樞密院事。出知應天府。以太子少傅致仕。卒。贈太子太保。諡文肅。嘗被命與李宗諤、楊億、王曾、李維、舒雅、任隨、石中立同編文苑英華。有愚谷銀臺中書中樞四集。

庶子泉

在鄒那山寶應寺。唐李幼卿守滁州。始有此泉。歐陽永叔云。庶子泉銘。李陽冰撰并書。

深藏西竹寺。寒擁北譙城。石字贊皇古。泉銘庶子清。方輿勝覽

陳堯佐

佐堯字希元。閩中人。端拱二年進士。歷官同中書門下平章事。卒。贈司徒。兼侍中。諡文惠。有愚丘集。遺興集。

灑水燕談。陳文惠公堯佐。端拱元年程宿下及第。同年二十八人。時公兄弟俱未仕。父省華爲小官。家極貧。魏野以詩賀曰。放人少處先登第。舉族貧時已授官。

中山詩話。陳文惠以使相致仕。年八十。有詩云。青雲岐路遊將徧。白髮光陰得最多。構亭號佚老。歸政者多效之。喜堆墨書。深自矜負。善爲四句詩。遊長安。佛寺題名。從者誤側視汗鞵。公性急。遂望筆于其鼻。客笑失聲。

皇宋書錄。陳文惠公善八分書。點畫肥重。世謂之堆墨書。領鄭州日。伶人戲以一
大紙濃墨塗之。中以粉筆細書四點。問曰。此何字也。曰。堆墨書田字也。公大笑。

湖州碧瀾堂

苕溪清淺響溪斜。碧玉光寒照萬家。誰向月明中夜聽。洞庭漁笛隔蘆花。湘山野錄。

吳江

平波渺渺煙蒼蒼。菰蒲纔熟楊柳黃。扁舟繫岸不忍去。秋風斜日鱸魚鄉。歷代吟譜。

答張順之

有花無酒頭慵舉。有酒無花眼倦開。正向西園念蕭索。洛陽花酒一時來。

雲齋廣錄。陳文惠退居鄭下。張退傅知

西京。以姚黃魏紫及酒寄之。文惠有詩。

虎丘

雲際樓臺樹杪煙。孤松千尺聳平田。危闌逸思微吟好。隱隱秋帆半入天。
人閒靈蹟徧曾遊。祇欠吳門訪虎丘。今日偶來無限感。闔閭墳左劒池頭。吳郡志。

題滄浦縣壁

蠻煙漁火接鯨波。樹樹花枝處處歌。況是天涯好行樂。莫教憔悴鬢絲多。方輿勝覽

林處士水亭

城外逋翁宅。開亭野水寒。冷光浮荇葉。靜影浸魚竿。吠犬時迎客。飢禽忽上闌。疎籬僧舍近。嘉樹鶴庭寬。拂砌煙絲裊。侵窗筍戟攢。小橋橫落日。幽境轉層巒。好景吟何極。清歡盡亦難。憐君留我意。重疊取琴彈。

遊湖上昭慶寺

湖邊山影裏。靜景與僧分。一榻坐臨水。片心閑對雲。樹寒時落葉。鷗散忽成羣。莫問紅塵事。林閒暫聞。以上瀛奎律髓

洞霄宮

一帆高挂出紅塵。萬仞長歌入紫雲。莫道遊仙別無侶。玉清冠蓋許同羣。谷口停驂上翠微。五雲宮殿闕金扉。不知何處朝元會。卻見龍鸞隊仗歸。三天封部稼如雲。流水清寒出洞門。更愛林閒盤石上。松花飄落羽人樽。娟娟紅樹碧峰前。爲愛桃花入洞天。偶逐霓旌纔百步。卻愛人世已經年。洞霄詩集

洞霄宮志在餘杭縣。本漢天柱

宮。祥符五年。堯佐奏改今名。

芳菲園

錢氏時。清源門內有此園。

盡日芳菲園。不見芳菲好。茂草與斜陽。脈脈情多少。湖州府志

望越亭

颯颯西風葉葉秋。誰家煙火起滄洲。乘閑不奈無機性。擬動漁翁直釣鉤。杭州府志。

智果寺

蘿巖山下寺。靜境絕過從。芳草二三月。碧雲千萬峰。窗閑明落日。樓迴響疎鐘。卻恐重來晚。庭前記偃松。紹興府志。

遊西湖

附郭水連山。公餘獨往還。疎煙漁艇遠。斜日寺樓閑。繫馬芭蕉外。移舟菡萏閒。天涯逢此景。誰信自開顏。廣東通志。

題野吏亭

野吏厭公堂。開軒出郡牆。殘花炎帝圃。斜日尉佗鄉。疊巘分諸粵。重城截大荒。耕桑蠻聚落。煙火漢封疆。雲勢飄蓬島。天形壓夜郎。扁舟閑得侶。嘉樹遠分行。梅雨千林暮。春風百草香。人家浮浩渺。鳥道沒青蒼。爽塏吟魂健。虛明夏景涼。侂年重回首。牢落媿甘棠。惠州府志。

句

雨網蛛絲斷。風枝鳥夢搖。溫公續詩話。千里好山雲乍斂。一樓明月雨初晴。偶成。郡吏百函通爵里。從兵千騎屬鞶韞。送朱荆南。君恩來萬里。客路出千山。潮州召還。供帳開天苑。傳呼度國門。送神放。風樵若邪路。霜橘洞庭秋。送人越州。以上皇朝類苑。

劉少逸

少逸蘇州人。以童子賜進士及第。官止尙書員外郎。

句

無風煙燄直。羅有月竹陰寒。劉日移竹影侵碁局。羅風遞花香入酒尊。劉風雨江城暮。王波濤海寺秋。劉一回酒渴思吞海。王幾度詩狂欲上天。劉

續歸田錄蘇州童子劉少逸年十一文辭精敏有老成體其師潘閔攜以見長洲宰王元之吳縣宰羅思純以所作贊二公二公名重當時疑所贊假手因試之與之聯句略不淹思二公驚異至聞于朝賜進士及第

孫周翰

周翰賜童子出身。

句

口吹楊柳成新曲。郡侯頭戴花枝學後生。孫

續歸田錄孫周翰亦少逸之流其父穆之攜以見郡侯時賞春作會座客簪花郡侯屬周翰聯句笑曰何速便戲老夫賜童子出身

張秉

秉官監察御史知鄭州。

鄭州聯句

宋詩紀事 卷四

函關秋霽雁初迴。六里商於曉色開。乘四皓有靈應笑我。謫官方始入山來。王禹偁。小畜集。

宋詩紀事卷五

錢唐 厲鶚 緝
祁門 馬曰琯 同緝

陳從易

從易字簡夫。晉江人。端拱二年進士。歷祕書省著作郎。直史館。知廣州。仁宗朝。擢知制誥。除龍圖閣直學士。知杭州。有泉山集。

小孤山

山稱孤獨字。厝瑤女郎形。過客雖知誤。行人但乞靈。春明退朝錄。

句

千重浪裏平安過。百尺竿頭穩下來。王文穆罷相。蔡寬夫詩史。

梅 詢

詢字昌言。宣城人。端拱二年進士。累擢翰林侍讀學士。歷給事中。知審官院。出知許州。有許昌集。

寄呂許公

十五年前忝一麾。公餘嘗得預言詩。玉階□步爲霖早。雲路風波得志遲。浴鳳池深春蕩蕩。觀魚臺古草離離。重來故老休相問。請揭紗籠有舊碑。

侯鯖錄。梅詢侍讀。嘗從真宗東封。因卜命於岳神。夢三牛鬪于庭。有稱相公通謁者。雖異之而不曉其兆。既而得濠梁州。靡有三石牛。後呂許公夷簡以殿中丞來倅。詢見之。疑若所夢謁者。於是委遇至厚。不數年許公大拜。梅爲發運使。按部至濠。上作詩寄之。

送楊可及第還鄉

君恩兼喜拜維桑。路入家山道更光。春色殿前初脫白。秋風隴上見焚黃。偏留名紙呼前輩。喜著藍袍到故鄉。科第孝思俱已遂。卻經劍棧莫淒涼。合璧事類別集

武林山十詠

水臺盤在下天竺

鶴髮山中人。疏泉鑿幽石。如憑青玉案。分遞白雲液。泠泠澗雕俎。瑟瑟穿吟席。醉坐三伏中。煩襟自消釋。

翻經臺

靈運曾此臺。冥心住幽寂。重譯葉上書。深藏林中跡。遺文傳竹素。野蔓侵苔碧。登覽殊未休。蒼山日將夕。

靈隱寺

千峯凌紫烟。中有梵宮闕。靈阿極幽棲。塵心自超越。松黃發春靄。桂實墜秋月。爭得謝世人。茲焉老華髮。

北高峯塔

高塔列遠岑。亭亭幾百載。鈴聲答夜風。輪影落滄海。閑雲伴危級。斜日平煙彩。欲下生暮愁。千山閉輕靄。

蓮花峯

巨石如芙蕖。天然匪雕飾。盤礴峯頂邊。嬋娟秋江側。涉川試誰探。作礪當自惜。坐與榮落同。正心未嘗易。龍泓洞

矯矯淵下龍。潛神在靈府。雲臥雖有時。泥沙可長處。陰崖寒氣腥。峭壁灼痕古。何當救旱暵。奮起爲霖雨。冷泉亭

古竇鳴幽泉。蒼崖結靈宇。六月期客遊。披襟苦徂暑。開窗弄清淺。吹鬢疑風雨。不見白使君。煙蘿爲誰語。呼猿洞

古澗飛白猿。寂歷不知處。風激石上泉。僧疑月中樹。微茫認松雪。髣髴橫樵路。空望增爾思。蒼蒼奈煙霧。煉丹井

仙翁道未泯。棲神在巖石。酌彼山下泉。窮年煉金液。洞陰春始綠。苔甃秋涵碧。緬慕不可期。凭闌望鳧鳥。飛來峯

竺慧指此峯。飛來自靈鷲。猿鳥曾未知。煙嵐尙依舊。興亡漫千古。天地豈關紐。祇恐舟壑移。他年卻西走。以上咸淳臨安志。

吳興道中

野闊多桑柘。湖平漑沃田。採蓮花樣女。載酒葉兒船。黃犢青山下。垂楊古道邊。行行頻北望。戀闕意懸懸。送夏子喬招討西夏

丹墀曾獨繹。絲綸御札親。題第一人。驚喜上遷張。筆力馬諳西。討仗威靈亞。夫金鼓從天降。韓信旌旗背。

水陳著致爾功還奏闕圖形仍許上麒麟以上許昌梅公年譜附

句

千里漢圍合一夜楚歌聲陰陵 楊文公談苑

吳簡言

簡言字若訥長汀人端拱二年進士累官祠部郎中

題巫山神女廟

惆悵巫娥事不平當時一夢是虛成只因宋玉閑脣吻流盡巴江洗不清

汀州府志是夕夢神女來見曰君詩雅正當以順風相謝明日解纜果然

古成之

成之字亞奭惠州河源人五季末避地家增城中端拱二年進士召試除祕書省校書郎張詠帥蜀辟知綿竹縣卒于官

廣東通志宋初干戈甫息嶺嶠文風未振每取士合一路以一人薦衆推成之雍熙改元充秋賦督府勸駕詩云囊中有道逢千載嶺外觀光只一人蓋紀實也

憶羅浮

憶昔羅浮最上峯當年曾得寄仙蹤凭闌月色出滄海欹枕秋聲入古松採藥靜尋幽澗洗寄書閑仗白雲封紅塵一下拘名利不聽山閒午夜鐘惠州府志

楊正倫

正倫舉進士與陳堯佐同時。

華清宮

休罪明皇與貴妃。大都衰盛兩隨時。惟餘一派溫泉水。不逐人心冷暖移。皇朝類苑。

孫何

何字漢公。汝陽人。父鏞。知荆門軍。遂家焉。登淳化三年進士第一。歷官兩浙轉運使。加起居舍人。景德初。判太常禮院。知制誥。賜金紫。掌三班院。卒。有集。

涑水紀聞。孫何丁謂舉進士第。未有時名。王禹偁見其文大賞之。贈詩云。三百年來。文不振。直從韓柳到孫丁。如今便好令修史。二子文章似六經。二人由此時名大振。

歷代吟譜。孫何嘗作爾晉名賢贊。并詩三十篇。王禹偁延譽之曰。丁謂與孫何。便可白衣修撰。

汎吳江

晚灘如雪起沙鷗。咫尺姑蘇亦勝遊。逸勢瀉歸滄海遠。冷聲分作太湖秋。葑田幾處連僧寺。橘岸誰家對驛樓。魯望不存無可語。片帆中夜渡清流。吳江縣志。

桐柏觀

玉壇三級接秋空。此是仙家第幾重。羽客有時來駕鶴。王人無歲不投龍。微吟海月生崑桂。長嘯天風起

澗松司馬先生何處去，篆碑猶有白雲封。天台山志。

句

欲謁元戎無介紹，薛能詩版在鵬堂。

補續高僧傳。太平興國末年，曹彬出鎮節制，閉關謝客，孫何自京師來，久不得見，以詩自諧云。

誰如張璪工松石，擬裂蛟綃畫作圖。詠吳興。宣和畫譜。

趙湘

湘字叔靈，衢州西安人。淳化三年進士，清獻公之祖。

春夕偶作

一夕衡門獨自開，雨陰深巷少塵埃。酒醒風傍池邊起，坐久月從花上來。何處夜歌初欲斷，四鄰春夢未知回。因思此興無人共，時復孤吟步綠苔。宋文鑑。

方廣寺石橋

白石峯猶在，橫橋一徑微。多年無客過，落日有雲歸。水淨苔生髮，山寒樹著衣。如何方廣寺，千古去人稀。方輿勝覽。

剡中齊唐郎中所居

古柳垂溪水，當門繫雪舟。開樽延白鳥，掃樹帶清秋。閣上看華頂，窗中見沃洲。尋常投刺少，來卽是詩流。

贈水墨巒上人

講餘題小筆，深院竹脩脩。試墨應磨歲，思山忽寫秋。靜會窮鶴趣，高亦近詩流。更擬緣清思，和雲狀沃洲。

贈張處士

應問秋雲學得閑，飄然如不在人間。青籐篋裏詩多怪，紫栗枝邊藥更癡。江客對棋曾賭鶴，野僧分屐借登山。仍聞昨日來城市，又抱孤琴踏月還。以上瀛奎律髓

秋夜集李式西齋

澤國秋光淡，詩家夜會清。雨餘逢月色，風靜得琴聲。小徑幽蟲絕，寒階落葉并。嘗茶不擬睡，自起遶池行。文翰類選

別邪溪諸叔

又散邪溪會，斜陽在古原。出門逢落葉，去路有啼猿。短髮不堪照，新詩誰與論。如何爲遠別，風雪宿孤村。雲門集

遊爛柯山

仙人與王質，相會偶多時。落日千年事，空山一局棋。樹高明月在，風動白雲移。未得酬身計，閑來學採芝。爛柯山洞志

張士遜

士遜字順之號退傅陰城人淳化三年舉進士真宗朝拜禮部尚書同中書門下平章事仁宗朝拜太傅封鄧國公薨贈太師中書令諡文懿

青箱雜記張退傅士遜趙少保叔平概張樞相昇皆壽八十六陳丞相堯佐壽八十二杜丞相衍壽八十一富丞相弼壽八十九文惠致政退傅詩曰青雲岐路遊將徧白髮光陰得最多

晚春遊金明抵暮入宜秋門關兵捧門牌請官位因書一闕

閑遊靈沼送春回關吏何須苦見猜八十衰翁無品秩昔曾三到鳳池來湘山野錄

題西菴寺宰邵武作

西菴深入西山裏算得當年少客遊密密石叢盤小徑涓涓雲竇瀉寒流松皆有節誰青蓋僧盡無心也白頭欲刷粉牌書姓字調卑官冗不堪留

遊寶蓋巖

身爲冠冕留心是雲泉客每到雲泉中便擬忘歸跡況茲寶蓋巖天造清涼宅稅車官道邊誰知願言適

公牒至建寧縣道洛陽村而山路險峭穹絕不可名狀題二韻於村寺

金谷花時醉幾場舊遊無日不思量誰知萬水千山裏枉被人言過洛陽以上青箱雜記

寄陳希元

緒案當年並命時兼葭衰佩倚瓊枝皇恩乞與桑榆老鴻自高冥鳳在池倦遊雜錄

知邵武縣禱雨有應任滿作詩紀事

乞靈曾熱一爐煙。言下滂沱救旱田。今日解龜留數字。要教來者更恭虔。詩律武庫

遊峽山飛來寺

峽寺一停橈。新秋暑乍消。幽懷徒易釋。肥遯固難招。翠擬千峯活。紅分數葉凋。優遊虛歲月。何以報清朝。
禹峽山志

錢昆

昆字裕之。吳越廢王侗之子。歸宋。中淳化三年進士。仕至祕書監。有集。

十國春秋。昆性嗜蟹。常求補外職曰。

但得有蟹無通判處。足慰素願也。

題淮陰侯廟

築臺拜日恩雖厚。躡足封時慮已深。隆準早知同鳥喙。將軍應起五湖心。青箱雜記

遊鐵岸

晴紅煙綠襯虛亭。公退因來得野情。落日東風嬾歸去。擬將薄祿換溪聲。中州題詠集

呂言

言晉江人。淳化三年進士。官侍御史。廣東轉運使。

寄九日山僧

目極閩南道。雲山隔幾層。深秋城外寺。白日定中僧。野蔓穿松甲。幽泉漱石棱。遙思茶話夕。敲破玉池冰。

清源文獻

謝濤

濤字濟之。其先陽夏人。父從禮爲鹽官令。卒于官。兩世葬富陽。因家焉。登淳化三年進士。歷官太子賓客。

夢中作讀史一絕

百年奇特幾張紙。千古英雄一窖塵。惟有炳然周孔教。至今仁義洽生民。中吳紀聞。

高紳

紳廣州鈐轄使。

遊峽山飛來寺

古寺清江上。維舟夕照前。山根盤到海。塔影直侵天。蘿月空禪石。霜鐘落客船。秋風嬾回首。送目入雲烟。禹峽山志。

郭震

震字希聲。成都人。有漁舟集。

淳化四年作

朝出東門遊。東門好春色。青青原上草。莫放征馬食。

文獻通考震于淳化四年忽作此詩。諱

闕上書言蜀利病未幾李順之亂作矣。

紙窗

偏宜酥壁稱閑情。白似溪雲薄似冰。不是野人嫌月色。免教風弄讀書燈。青瑣後集

宿漁家

幾代生涯傍海涯。兩三閒屋蓋蘆花。燈前笑說歸來夜。明月隨船送回家。

漁者

江柳弄風颺翠黛。山光著雨濕臙脂。卻收短櫂拈長笛。一葉舟中仰面吹。

雲

聚散虛空去復還。野人閑處倚筇看。不知身是無根物。蔽月遮星作萬端。以上宋文鑑

題龍華山在廣都縣。有段文昌別業。

昔年曾到此山迴。百鳥聲中酒一杯。最好寺邊開眼處。段文昌有讀書臺。唐詩紀事

路 振

振字子發。永州祁陽人。唐相巖四世孫。淳化中舉進士。歷官左司諫。知制誥。充同修起居注。有集。

贈安邑簿伍彬歸隱

老終秋鬢白。歸隱舊峯前。庭樹鳥頻啄。山房人尙眠。寒巖落桂子。野水過茶煙。已結勞生念。虔心向竺乾。

雅言系述

伐棘篇

伐棘何所山之巔。秋風颼颼棘子丹。折根破柢堅且頑。斲天趨起汗污顏。攢鋒束芒趨道還。葇之森森繚長藩。暮冬號風雪暗天。漏塞不鳴守犬眠。主人堂上多金錢。東陵暴客來窺垣。舉手觸鋒身隕顛。千矛萬戟爭後先。襟袖結裂不可搯。蹠破指傷流血殷。神離氣沮走蹩躄。數尺之牆弗復攀。索頭醜奴騷河壩。朔方屯師連七年。木波馬領沙填填。氣脈不絕如喉咽。官軍虎怒思吼軒。強弩一發山河穿。將不叶謀空卽安。翫養小醜成兇顛。推芻挽粟徒喧喧。邊臣無心靖國艱。爲余諷此伐棘篇。宋文鑑

題惠泉師壁

漢公嘗說惠泉師。解講楞嚴解賦詩。今日我來師已去。草堂風雨立多時。

補續高僧傳。孫何遊南臺。聞惠泉高槩叩其門。一見如舊識。饋勞加厚。後二年。何爲進士。舉首同年。路振官彭門。何益稱泉好義甚篤。振下車詣焉。師已去。浙矣。振歎慕留詩壁間。

句 鷄案皇朝類苑作陳堯佐

君恩來萬里。客路出千山。潮州徵還。吟窗雜錄。

危拱辰

拱辰字輝卿。南城人。淳化進士。官至光祿卿。

題初月十五歲作

未審初三夜。嫦娥怨阿誰。懶開十分鏡。祇畫一邊眉。江西詩話。

王 崑

岳淳化中隱居蜀川有集

陳氏書錄解題洪邁編唐人絕句萬首可謂博矣而多有本朝詩在其中如李九齡郭震滕白王初王叡之屬是也

回舊山

庾家樓上謝家池處處風煙少舊知
明日落花誰共醉野猿溪鳥恨歸遲

貧女

難把菱花照素顏試臨春水採花看
木蘭船上遊春子笑指荆釵下遠灘
以上萬首唐人絕句

殘冬客次資陽江

淡雲殘雪蔟江天策蹇遲回客興闌
持盞老僧來咒水倚船商女待搬灘
沙翹白鷺非眞靜竹映繁梅奈苦寒
阮籍莫嗟歧路異舊山溪畔有漁竿
全蜀藝文志

田霖

霖、淳化閒人

燕口洞

燕口龍泓氣象清錢眞此處有遺靈
仙兄去後師猶在女弟回時洞已扃
雲片尙如披素練泉聲長似誦黃庭
碧桃花發菖蒲紫留與人閒作畫屏

詩話總龜女眞錢氏二姊妹依陶隱居誦黃庭經卽茅山燕洞也至今有紫菖蒲碧桃焉其姊披白練衣得道入洞及女弟至則戶已扃矣淳化五年田霖作詩題之

賈黃中

黃中，字媧民，南皮人。六歲舉童子科，十五舉進士，太子召試中書知制誥，充翰林學士。淳化二年，參知政事。至道初，拜禮部侍郎兼祕書監，卒。贈禮部尚書，有集。

宋史本傳：黃中幼聰慧，方五歲，父珙每旦令

正立展書卷，比之謂之等身書，課其誦讀。

孔平仲談苑：太宗時，宋白、賈黃中、李至、呂蒙正、蘇易簡五人同拜

翰林學士，承旨。扈蒙贈詩云：五鳳齊飛入翰林，其後皆爲名臣。

伏觀禁林盛事謹賦一章

璇題飛白御毫新，三體瓊章妙入神。特賜禁林爲盛事，只緣明主重名臣。青編輝映輕前古，丹地深嚴隔世塵。金錄禎祥非是寶，玉堂名號此方貞。玉堂之名，從來未著格令。今聖君親書玉堂之署四字，爲千古不朽之事。自此名始貞矣。恩榮誰比煙霄客，文彩長懸日月輪。爲報鼇宮主人道，蓬萊全勝昔時春。黃中以近離署，故不覺有此健羨之句。翰苑羣書。

桂林還珠洞

赫赫威聲震百蠻，肯攜篋筥瀕谿山。無人爲起文淵問，端的珠還惹草還。顧氏積書廢選。

王欽若

欽若，字定國，臨江軍新喻人。進士甲科，召試知制誥，歷官翰林學士，拜樞密使，檢校太傅，同中書

門下平章專進司徒封冀國公卒贈太師中書令諡文穆

西清詩話王文穆欽若未第時寒窘依幕府家時章聖以壽王尹開封府一日晚過其舍左右不虞王至亟取紙屏障風王顧屏閒一聯云龍帶晚煙離洞府雁拖秋色入衡陽大加賞愛曰此語落落有貴氣何人詩也對曰某門客王欽若上遠召之一

見欽若如夙素其後信任頗專致

位上相風雲之會實基於此焉

送天柱馮先生

鬱蕭空殿倚雲霓。玉氣珠輝冠紫微。暫到帝城朝斗會。卻思巖竇負琴歸。日奔內景乾坤靜。泉漱清音杞菊肥。卻到水鄉深邃任。晴巒掩映簇春暉。洞霄詩集

句

九重天闕夢掉臂。黃雞白酒鄰舍恩。

詩律武庫晉陶侃少時家貧有友人見訪無以致誠其鄰人頗賢謂侃曰子門有長者軒車何不延之以論當世事侃曰貧不能備酒醴鄰人密於牆頭度以濁酒隻雞遂成終日之樂本朝王冀公欽若過其廟題詩云云用此事也

胡旦

旦字周父濱州渤海人舉進士第一真宗朝歷祠部郎中祕書監有集

句

明年春色裏領取一行歸。

灑水燕談。胡旦少有俊才，尙氣凌物，隨計之秋郡守坐中聞雁賦詩云：「明年果魁天下，終以忤物不登顯位。」

滕白

白太宗時爲工部郎中，世稱滕工部，有集。

題汝川村居

種茶巖接紅霞塢，灌稻泉生白石根。蟠腹老翁眉似雪，海棠花下戲兒孫。合璧事類前集。

觀稻

稻穗登場穀滿車，家家雞犬更桑麻。漫栽木槿成籬落，已得清陰又得花。

過遭圩岸繚山城，一眼圩田翠不分。行到秋苗初熟處，翠茸錦上織黃雲。全芳備祖。

錢昭度

昭度字九齡，吳越忠懿王俶從弟偓之子，仕至西頭供奉官，有詩集。

楊文公談苑：錢氏諸子封守。

惟濟供奉昭度並有佳句。

贈白校書

袖裏青鋒秋水寒，誰疑雙燕是金丸。出門風雨知何去，空有霜髭在玉盤。

洞微志：郭平振武舊將，分配錢唐給官屋居之，屋在修文坊，舊爲白校書尤賃燒丹藥，未欲往，而官吏丁疎因逐之，乃破爐而去，白因召丁疎同飲，謂疎曰：「大藥爲吾子所破，有小戲術醒酒，乃取盤一面置于膝上，以指敲腕，出五色彈子兩枚，化爲雙燕。」

而飛。白日僕射髭甚繁。可減些。言未畢。二燕化爲二小劍。長五寸餘。鋒刃如雨。交舞于疎之頤。
額間髭落如雪。疎懼甚。白呼劍下盤中。依前成二丸。納於左右腕而去。錢昭度贈白詩云。

懷具區

平生愛具區。鳥嶼交陂湖。竹雨籠鷓鴣。花煙溼鷓鴣。神仙疑有宅。魚鼈自爲都。何事勞長想。機雲本是吳。
吳郡志。

春陰

語燕初飛隴麥青。春雲將雨滯行人。雲閒若有金烏賣。應被豪家占得春。
後村千家詩。

野墅夏晚

一抹生紅畫杏腮。半園沈綠鎖桐材。黃蜂衙退海潮上。白蟻戰酣山雨來。睡思幾家金帶枕。酒香何處玉
交杯。太陽西落波東去。惆悵無人喚得回。
瀛奎律髓。

句

西北高樓在。東南王氣銷。金陵。東北風吹大庾嶺。西南日映小寒天。梅花。人間路到三峯盡。天下秋隨一
葉來。秋日華山。以上皇朝類苑。長憶錢塘江上望。酒樓人散雨千絲。青箱雜記。船中聞雁洞庭夜。牀下有蜚長
信秋。蔡寬夫詩史。礮溪重得呂維嶽再生申。呂申公生日。許彥周詩話。

范唐公

唐公文正公仲淹之祖。贈祕書監。

贈華山陳希夷缺首二句

會逢毛女話何事。應見巨靈開此山。濃睡過春花滿地。靜林中夜月當關。紛紛詔下忽東去。忍使蒲輪倦往還。過庭錄。

王著

著字知微。成都人。太宗朝官翰林侍書。行殿中侍御史。日瑄按書史會要云。別有翰林學士王著。自是一人。

禁林讌會之什

文明天子重詞臣。聖製褒揚日月新。宸翰特頒仙署額。皇風先發玉堂春。蚪龍逸勢誠難伏。鸞鶴迴翔信得真。齊武任誇非入妙。漢章雖巧未通神。匪唯銜耀鼈宮客。兼是輝華鳳閣人。幸接英儒同讚詠。輒書狂斐繼清塵。翰苑羣書。

會璉

鴻溝和呂聖功韻

王霸興亡幾劫塵。鴻溝依舊鎖寒雲。不將帝業追三代。祇把河山割半分。故壘已隨流水盡。歸鴉空帶夕陽曛。西風立馬頻回首。那忍猿聲隔岸聞。滎澤縣志。

呂文仲

文仲官翰林侍讀。右正言。

禁林讌會之什

青蔥温樹非塵境。鼇岫金鑾近日邊。石壁天章垂雨露。璇題宸翰動雲煙。西垣費馬微辭客。東觀蓬瀛集列仙。讌喜馳顏飛玉笋。鏗鏘奮藻髮花牋。唐虞盛化高千古。葵藿傾心祝萬年。自顧薄才誠有媿。不知何以奉羣賢。翰苑羣書

呂祐之

祐之、太宗朝官起居舍人知制誥。

禁林讌會之什

高會蓬瀛振德音。崇賢同慶湛恩深。瑞融雲露飛宸翰。榮下煙霄飾禁林。鳳藻瓌奇清擊石。龍文模琢麗雕金。辭臣喜適逢時願。容眷殊敦好士心。華照北門張組繡。祕逾東序敵球琳。玉堂宴罷尤知幸。御勝天章豈易尋。翰苑羣書

楊允元

允元、官光祿寺丞、直集賢院。

寄館中諸公

鶚按：漚水燕談作楊億詩。

聞說宮花滿鬢紅。上林絲管侍重曠。蓬萊咫尺無由到。始信仙凡迥不同。

古今詩話：楊允元爲光祿寺丞。三月後苑曲宴。未得貼職。不得與。以詩寄館中諸公。太宗聞之。卽日直集賢院與晚宴。

潘閔

宋詩紀事 卷五

一一九

闕字逍遙。大名人。嘗居錢塘。太宗召對。賜進士第。王繼恩與之善。繼恩下獄。捕闕弗得。咸平初來京。尹收繫之。真宗釋其罪。以爲滁州參軍。後卒于泗上。小說中謂闕坐盧多遜黨。追捕非也。有詩集。

皇朝類苑好事者以闕遨遊浙江詠潮著名以輕綃寫其形容謂之潘闕詠潮圖宋尙書贈詩曰宋朝歸聖主潘闕是詩人王元之亦贈詩曰江城賣藥常將鶴古寺看碑不下驢其爲名公所激賞如此

歲暮自桐廬歸錢塘

久客見華髮。孤櫂桐廬歸。新月無朗照。落日有餘暉。漁浦風水急。龍山煙火微。時聞沙上雁。一一皆南飛。

中山詩話潘闕詩有唐人風格僕爲此詩不減劉長卿

過華山

高愛三峯插太虛。帝頭吟望倒騎驢。旁人大笑從他笑。終擬移家向此居。

圖畫見聞錄長安許道寧嘗畫潘闕倒騎驢圖

題資福院石井

炎炎畏日樹將焚。卻恨都無一點雲。強跨蹇驢來到得。皆疑渴殺老參軍。

能改齋漫錄闕移太平州參軍過信州鉛山縣作蘇

黃門跋云此詩頗有風味不在石曼卿蘇子美下

曹娥廟

曹娥廟前秋草平。曹娥廟裏秋月明。扁舟一夜炯無寐。近聽潮聲似哭聲。會稽志。

曉泊罇浦寄剡縣劉貺員外

曉汎剡溪水。晚見剡溪山。徘徊駐行櫂。待月思再還。漁唱深潭上。鳥棲高樹閒。應當金石交。念我無暫閒。
剡錄。

九華山

將齊華嶽猶多六。若並巫山又欠三。好是雨餘江上望。白雲堆裏發濃藍。方輿勝覽。

贈林處士

雲翦烏紗霜翦衣。存神養氣語還稀。人人盡喚孫思邈。只恐身輕白鳥飛。

宿靈隱寺

繞寺千千萬萬峯。滿天風雪打杉松。地爐火煖黃昏睡。更有何人似我慵。以上咸淳臨安志。

秋日題瑯邪山寺

巖下多幽景。且無塵事喧。鐘聲晴徹郭。山色曉當門。深洞藏泉脈。懸崖露樹根。更期來此宿。絕頂聽寒猿。

渭上秋夕閑望

秋色滿秦川。登臨渭水邊。殘陽初過雨。何地不鳴蟬。極浦涵明月。孤帆沒遠煙。漁人空老盡。誰似太公賢。

夏日宿西禪院

此地絕炎蒸。深疑到不能。夜涼知有雨。院靜若無僧。枕潤連雲石。窗明照佛燈。浮生多賤骨。時日恐難勝。
以上瀛奎律髓。

望湖樓

望湖樓上立。竟日嬾思還。聽水分他界。看雲過別山。孤舟依岸靜。獨鳥向人閑。回首重門閉。蛙聲夕照閒。
西湖遊覽志。

句

清宵無好夢。白日有閑愁。髮任莖莖白。詩須字字清。長喜詩無病。不憂家更貧。何須三叫絕。已恨一聲多。
映中聞猿。生前是客曾投卷。死後何人與撰碑。哭高舍人。莫嗟黑髮從頭白。終見黃河到底清。寄張永。以上歷代吟譜。土牀安睡穩。紙被轉身鳴。客舍作。劉後村詩話。窺魚白鳥明。殘照抱石幽。雲點半山。南昌秋屏閣。

方輿勝覽

湯悅

悅。本殷文圭子。陳州西華人。仕南唐為司空。知左右史事。入宋。避宣祖廟諱。改姓湯。太宗錄之館中。俾修太平御覽等書。

鼎臣學士侍郎。以東觀庭梅。昔翰苑之豪末。今復半枯。向時同僚。零落都盡。素髮垂領。茲唯二人。感舊傷懷。發於吟詠。惠然好我。不能無言。輒次來韻。攀和。

憶見萌芽日。還憐合抱時。舊歡如夢想。物態暗遷移。素豔今無幾。朱顏亦自衰。樹將人共老。何暇更悲絲。

李度

度河南洛陽人官虞部員外郎

句

醉輕浮世事老重故鄉人

宋史文苑傳度周顯德中舉進士工於詩有句云云時翰林學士申文炳知貢舉王朴錄其句薦之即擢第三累官知歙州坐事左遷度嘗以詩刻石石本傳入禁中太宗見之謂宰相曰度今安在即召對便殿擢爲虞部員外郎直史館賜緋

郭忠恕

忠恕字恕先洛陽人七歲能文舉童子及第周廣順中爲宗正丞兼國子書學博士宋太宗卽位

授國子主簿

宣和畫譜忠恕作篆隸凌轢晉魏喜畫樓觀臺榭皆高古論官江都逾旬失其所在後閱數歲與陳搏會於華山而後不復聞蓋亦仙去矣

句

爲逢末劫歸依佛不建新恩敍理官

困學紀聞建隆初詔五代時命官投狀敍理復命之郭恕先詩云飛龍在天利見大人而猶不屈其志如此

陳搏

搏字圖南。自號扶搖子。亳州真源人。後唐長興中。舉進士不第。隱居華山雲臺觀。年近百歲。周世宗召至闕下。賜號白雲先生。宋太宗再召見。待以賓禮。賜號希夷先生。放還山。化形于張超谷。有高陽集、釣潭集。

歸隱

十年蹤跡走紅塵。回首青山入夢頻。紫陌縱榮爭及睡。朱門雖富不如貧。愁聞劍戟扶危主。悶聽笙歌聒醉人。攜取琴書歸舊隱。野花啼鳥一般春。

邵伯溫學易辨惑云。搏隱居華陰山。自晉以後。每聞一朝革命。輒蹙數日。人有問者。瞪目不答。一日乘驢遊華陰市。聞太祖登極。大笑。問其故。曰。天下自此定矣。遁迹之初。作此詩云。豈淺丈夫哉。

詠毛女

曾折松枝爲寶櫛。又編栗葉作羅襦。有時問著秦宮事。笑撚仙花望太虛。翰府名談。

辭上歸進詩

草澤吾皇詔。圖南搏姓陳。三峯千載客。四海一閑人。世態從來薄。詩情自得真。乞全麋鹿性。何處不稱臣。

灑水燕談。太平興國初。召赴

闕。賜號希夷。久之辭歸作。

石刻詩并序

因攀奉縣尹尙書水南小酌回。捨轡特叩松局。謁高公茶話移時。偶書二十八字。道門弟子圖南上。我謂浮榮真是幻。醉來捨轡謁高公。因聆元論冥冥理。轉覺塵寰一夢中。

老學菴筆記。邛州天慶觀。石刻希夷詩云。末書太歲丁酉。蓋蜀孟景時當石晉天福中也。文與可跋云。高公者。此觀都威儀何昌一也。希夷從之學鎖鼻術。

贈張乖厓

自吳入蜀是尋常。歌舞筵中救火忙。乞得金陵養閑散。也須多謝鬢邊瘡。

古今詩話。張忠定公少謁華山陳圖南。圖南贈詩一絕。始皆不喻。其意。後忠定更鎮杭益。晚年發瘡于鬢。移守金陵。遂薨。悉如其言。

西峯

爲愛西峯好。吟頭盡日昂。巖花紅作陣。溪水綠成行。幾夜礙新月。半山無夕陽。寄言嘉遯客。此處是仙鄉。
詩人玉屑。

題石水澗

銀河灑落翠光冷。一派迴環淡晚暉。幾恨卻爲頑石礙。琉璃滑處玉花飛。
宋藝圃集。

楊朴

朴字契元。鄭州人。少與畢士安同學。士安薦之。太宗以布衣召見。賦莎衣詩。辭官而歸。有東里集。

蒙齋筆談。朴性癖。嘗騎驢往來鄭圃。每欲作詩。卽伏草間冥搜。得句則躍而出。遇之者皆驚。

村居感興

一壺村酒膠牙酸，十數胡斂徹骨乾。隨著四婆幫子後，杖頭挑去賽蠶官。

劉後村跋楊通老移居圖。一帽而跣者，荷藥瓢書卷先行，一髻而牧者，負布囊，驅三羊繼之。一女子蓬首狹琴，一童子肩猶，一童子背一小兒，一奴荷薦席筠籃，吊槌之屬，又繼之。處士帽帶執卷騎驢，一奴負琴，又繼之。細君抱一兒騎牛，別一兒坐母前，持箠曳繩殿其後。處士攢眉凝思，若寃旬然。雖妻子奴婢，生服用之具，極天下之酸寒藍縷，然猶畜二琴，手不釋卷，其迂闊野逸之態，每一展玩，使人意消奮。題云：楊通老移居圖。本朝處士魏野有亭榭，林逋無妻子，惟楊朴最貧而有累，恐是畫朴，但朴字弼元，不字通老。明日翻故紙，得朴集，洛人臧逋爲序，有朴絕句云：放翁跋云：四婆，卽處士之配。蘇瞻李真家有處士夫妻像，野逸如生。凡集所載輿卷內物色皆合，騎牛者四婆，作詩送朴赴召者也。

七夕

未會牽牛意若何，須邀織女弄金梭。年年乞與人閒巧，不道人閒巧已多。後村千家詩。

莎衣

輒綠柔藍著勝衣，倚船吟釣正相宜。蒹葭影裏和煙臥，菡萏香中帶雨披。狂脫酒家春醉後，亂堆漁舍晚晴時。直饒紫綬金章貴，未肯輕輕博換伊。

瀛奎律髓此詩對

御所賦天下傳誦

絕句

昨夜西風爛漫秋。今朝東岸獨垂鉤。紫袍不識莎衣客。曾對君王十二旒。

桐江詩話楊朴契元。一日秋晴釣于道旁溪中。值漕臺陳文惠出。從者呵之。契元竟不顧。文惠怒。攝至郵亭中詰之。契元丐紙筆供狀。乃作絕句云云。文惠謝遣之。

句

就客飲時擔酒去。見魚遊處撥萍開。拄杖。瀛奎律髓。

葛守忠

守忠、太平興國中使臣。

答陳搏

華嶽三峯客。幽居不記年。煙霞爲活計。雲水作家緣。種藥茅庭畔。栽松澗壑邊。暫離仙洞去。可應帝王宣。華嶽全集。

伍、彬

彬、郴陽人。初事馬氏。王師下湖湘。授官爲安邑簿。秩滿歸隱。

題全義分水嶺

前賢功及物。禹後杳難儔。不及古今色。平分南北流。寒衝山影岸。清繞荻花洲。盡是朝宗去。潺湲早晚休。

句

稚子出看莎徑沒。漁翁來報竹橋流。夏日喜雨。以上雅言系述。

凌景陽

景陽、淳化中、鎮國軍節度使。

海棠

名園封植幾經春。露溼煙梢畫不真。多謝許昌傳雅什。蜀都曾未識詩人。海棠譜。

宋詩紀事卷六

楊億

錢唐厲鶚緝
祁門馬曰瑄同緝

億字大年，建州浦城人。七歲善屬文。雍熙初，年十一，召試詩賦，授祕書省正字。淳化中，命試翰林，賜進士第。真宗朝，歷官知制誥、天禧中，拜工部侍郎、翰林學士兼史館修撰，卒贈禮部尚書。諡曰文。有括蒼武夷穎陰韓城退居汝陽蓬山辭榮冠釐等集，及內外制刀筆。

詩林廣記三朝正史云：楊億祖文逸，爲僞唐玉山令，億將生，文逸夢一道士自稱懷玉山人，未幾億生，有紫毛被體七尺餘，經月乃落。

儒林公議：楊億在兩禁，變文章之體，劉筠、錢惟演輩皆從而效之。時號楊劉三公，以新詩更相屬和，極一時之麗。億復編敘之，題曰西崑酬唱集。當時佻薄者謂之西崑體，其他賦頌章奏，雖頗傷于雕摘，然五代以來，燕鄙之氣由茲盡矣。陳從易頗好古，深擯億之文章，億亦陋之。天禧中，從易試別頭進策，問時文之弊，曰：或下里如會粹，或蓋腔如急就，億黨見者深嫉之。

丹陽集：咸平景德中，錢惟演劉筠首變詩格，而楊文公與之鼎立，號江東三虎。謂之西崑體，大率效李義山之爲，豐富藻麗，不作枯瘠語。

古今詩話：楊大年、錢文僖、晏元獻、劉子儀爲詩，皆宗李義山，號西崑體。後進效之，多竊取義山語。嘗御賜百官宴，優人有裝爲義山者，衣服敗裂，告人曰：爲諸館職撻撻至此，聞者大噱。然大年詠漢武詩云：力通青海求龍種，死諱文成食馬肝。待詔先生齒編貝，忍令乞米向長安。義山不能過也。

漢武

蓬萊銀闕浪漫漫。弱水回風欲到難。光照竹宮勞夜拜。露溥金掌費朝餐。力通青海求龍種。死諱文成食馬肝。待詔先生齒編貝。那教索米向長安。

無題

合歡蠲忿亦休論。夢蝶翩翩逐怨魂。祇待傾城終未笑。不曾亡國自無言。風翻林葉迷歸燕。露裊荷池觸戲鴛。湘水東流何日竭。煙篁千古見啼痕。

淚

錦字梭停掩夜機。白頭吟苦怨新知。誰聞隴水回腸後。更聽巴猿拭袂時。漢殿微涼金屋閉。魏宮清曉玉壺欹。多情不待悲秋意。祇是傷春鬢已絲。

洞戶

洞戶飛甍接綺寮。一春幽恨寄蘭苕。書題枉是藏三歲。壺矢誰同賽百嬌。水國風霜凋社橘。仙山雲霧隔江潮。東城劍騎何曾出。祇爲離愁餽肉銚。

霜月

月夕露爲霜。心知厭燭房。吟殘猶擁鼻。望極自回腸。鬢減前秋綠。衣消外國香。星津誰待報。織素未成章。

劉校理屬疾

北窗風勁雪雲繁。移疾端居避世喧。載酒誰過楊子宅。張羅休署翟公門。多才最許飄飄氣。少別還銷黯黯

黯魂促爾徘徊憶眞賞遠天新月照黃昏

懷舊居

武夷山穴近吾廬。鬪鴨闌摧菌閣虛。千匹歲儲妨種橘。百金春事廢觀魚。北山煙霧迷歸轍。南陌風塵化客裾。堂上金絲應已歇。豈惟蘭菊舊叢疎。

因人話建溪舊居

聽話吾廬憶翠微。石層懸瀑濺巖扉。風和林籟披襟久。月射溪光擊汰歸。露晞荒涼迷草帶。雨牆陰溼長苔衣。終年已結南枝戀。更羨高鴻避弋飛。以上西崑酬唱集。

宣召赴龍圖閣觀太宗御書應制

五年十月

非煙蔥蔚蒼龍闕。紫府深沈大帝居。羣玉中天開策府。神龜溫洛薦圖書。珠宮岑寂經行發。金簡熒煌拭目初。曾是先朝受恩者。因探禹穴涕漣如。

偶書

朱輪遠守未成歡。薄宦令人意漸闌。郡閣政清慵按吏。鄉園路近欲休官。梅花遶檻驚春早。布水當簷覺夏寒。已是三年不聞問。何如歸去把魚竿。

留題黃山院

禾黍離離一逕通。遊人攬轡卽過從。趁齋幽鳥聞疎磬。出定高僧見偃松。夜靜龕燈凝古殿。雨餘巖溜迸前峯。昔年曾此題名處。素壁欹斜翠蘚重。

坐中朱博士言。今荆南張諫議典襄陽日。常留意一妓。公頗畏內。終不得近。及移郡荆渚。泣別郵亭。乃爲歌詞。流布巴郢。予感其事。賡而成詩。

駸駸五馬江陵去。寂寂雙娥漢水頭。一曲歌終眉黛斂。十分酒盡淚珠流。陽春郢客傳新唱。暮雨高唐夢昔遊。瓊樹無人敢親近。章臺京兆不勝愁。

武夷山

靈嶽標真牒。孤峯入紫氛。藤蘿暗仙穴。猿鳥駭人羣。古道千年在。懸流萬壑分。漢壇秋蘚駸。誰似武夷君。
以上武夷新集。

詠傀儡

鮑老當筵笑郭郎。笑他舞袖太郎當。若教鮑老當筵舞。轉更郎當舞袖長。
後山詩話。

貽館閣

聞帶宮花滿鬢紅。上林弦管侍重曠。蓬萊咫尺無由到。始信仙凡迥不同。

澠水燕談。楊文公初爲光祿丞。太宗頗愛其才。一日後苑賞花釣魚。宴詞臣不得預。以詩貽諸館閣云。云。諸公以詩進呈。上詰有司所以不召。以未貼職例不得預。卽命直史院免謝。令預晚宴。時以爲榮。

夜懷

獨倚青桐聽鼓聲。參旗歷落上三更。涼風卷雨忽中斷。明月背雲還倒行。賴有清吟消意馬。豈無美酒破愁城。是非人世何須較。方外吾師阮步兵。
詩林萬選。

贈張季常

疊巘參差翠繞門。雕梁賀燕自成羣。割雞日夕期嘉客。種竹寒暄對此君。且向東臯輸黍稷。使應北闕降元纁。子眞漫說耕巖石。不奈聲名四遠聞。

萬姓統譜。季常名彜。憲。三與計借不利。絕意功名。放懷林壑。與文公世親。文公自括蒼解印趨朝。兩造其居。贈之詩。

昇山寺

層巒連近郭。占勝有招提。宿霧昏金像。飛泉濺石梯。鐘聲空郭答。塔影亂雲齊。千騎時來此。尋幽獨杖藜。

建寧府志

句

關榆漸落邊鴻度。勸到劉郎酒十分。送劉綜學士出鎮井門。詩話總龜。

錢惟演

惟演字希聖。吳越忠懿王俶之子。少補牙門將。歸宋。累遷翰林學士。樞密使。罷爲鎮國軍節度觀。察留後。改保大軍節度使。知河陽。入朝。加同中書門下平章事。坐事落職。爲崇信軍節度歸鎮。卒。謚曰思。改謚文僖。有擁旄集伊川集。

若溪流隱叢話。歐公花品序云。予居府中時。嘗謁思公。見一小屏立後。細書序滿其上。思公指之曰。欲作花品。此是牡丹名。凡九十餘種。然予所見而今人多稱者。纔三十許。不知思公何從而得之多也。東坡云。惟演爲西都留守。如置驛賁洛。花識者鄙。

之此宮妾愛君之意也。故於荔枝嘆亦云。洛陽相君忠孝家。可憐亦進姚黃花。蓋爲思公惜之也。

宣曲二十二韻

絳縷初分後。銀鑲未解時。已障紈扇笑。惟捧玉壺悲。乞巧長生殿。迎風太液池。雕屏涵火齊。寶帳隔琉璃。欲買詞人賦。空傳狎客詩。蔗漿消內熱。瓊藥療朝飢。綺蒂桃初熟。紅心草欲披。凌波渡羅韞。向日翳華芝。素臉分丹柰。香津滴紫梨。龍梭隨振素。獼髓補凝脂。蓬餌重陽節。金針七夕期。玉膏嘗滌溢。翠蓋逐葳蕤。弦急哀隨指。歌長恨入眉。青鸞惟有舞。赤鳳可能疑。下蔡迷還易。平陽破未知。髻高釵自墜。腰細佩長垂。出恐嚴鐘晚。歸嫌鈿幃遲。轆轤驚晚夢。鸚鵡漏春思。魂怨惟愁斷。腸柔已自危。壁璫螢影度。瓊戶蘚花滋。掩鼻讒難訴。披圖悔豈追。祇應金帶枕。聊爲達微辭。

赤日

漏淺風微夜未勝。雨雲無迹火雲凝。簾鋪寒水頻移枕。帳卷輕煙更背燈。沃頂幾思金掌露。滌煩誰借玉壺冰。蘭臺知有披襟處。宋玉多才獨自登。

明皇

山上湯泉架玉梁。雲中複道拂瑤光。絲囊暗結三危露。翠幃時遺百和香。汪是金雞親便坐。更拋珠被掩方牀。恩恩一曲涼州罷。萬里橋邊見夕陽。

無題

誤語成疑意已傷。春山低斂翠眉長。鄂君繡被朝猶掩。苟令熏爐冷自香。有恨豈因燕鳳去。無言寧爲息侯亡。合歡不驗丁香結。祇得淒涼對燭房。
耿耿寒燈照醉羅。看朱成碧意如何。虎頭辟惡無妨枕。犀角涼心更待磨。惟有幽蘭啼月露。可將尺素許雲波。山屏六曲歸來夜。祇恐重投折齒梭。

淚

家在河陽路入秦。樓頭相望祇酸辛。江南滿目新亭宴。旗鼓傷心故國春。仙掌倚天頻滴露。方諸待月自涵津。荆王未辨連城價。腸斷南州抱壁人。

始皇

天極周環百二都。六王鍾鏹接流蘇。金椎漫築甘泉道。匕首還隨督亢圖。已覺副車驚博浪。更攜連弩望蓬壺。不將寸土封諸子。劉項由來是匹夫。
方虛谷云。督亢之亢。作平聲。作仄聲用亦可。

初秋屬疾

蜜房初滿若榴紅。秋意如侵玉井桐。薤簾自憑南郭几。縠巾猶臥北窗風。雲迷候雁辭遙塞。露溼飛螢起暗叢。病已不須傳七發。粉箋香墨寄詩筒。

寄靈仙觀舒職方學士

方瞳元鬢粉闌郎。絳闕齋心奉紫皇。徵士高懷雲在嶺。騷人秋思水周堂。閑園露草開三徑。靈宇華燈燭九光。知有美田堪種玉。幾時春渚逐歸艎。

興客啓明

越溪微霰灑寒梅。家近嚴陵古釣臺。夢欲成魚通夕去。書曾憑犬隔秋回。干時不爲侏儒米。樂聖猶銜叔夜杯。帝右豈無楊得意。漢宮須薦長卿才。

此夕

曲瓊斜挂影沈沈。火齊屏風六曲深。春瘦已寬連理帶。夜長誰有辟寒金。珠拋月浦空涵淚。琴怨蘭臺漫寄心。碧玉可能攀貴德。阮郎追騎更駸駸。

致齋太乙宮

齋潔奉惟馨。瑤臺獨自升。樓迷五里霧。壇燭九枝燈。珠館來青雀。璇題射玉繩。疎鍾平野闊。古柏夕霏凝。鶴扇真規月。仙衣可縷冰。春茶泛雲液。曉飯薦蘭蒸。鍊藥疑洪井。藏書類羽陵。回瞻太帝室。飛檻更長憑。

戊申年七夕

玉露金河顯氣涼。辛夷車轉桂旗香。嫦娥可是多猜忌。不駐瓊輪放夜長。以上西臯酬唱集。

對竹思鶴留守西洛日作

瘦玉蕭蕭伊水頭。風宜清夜露宜秋。更教仙驥傍邊立。盡是人間第一流。能改齋漫錄。

句

高爲天一柱。秀作海三峯。幼時父假使賦遠山。東都事略。置酒軍中樂。聞笳塞上情。送劉綜學士出鎮井門。詩話總龜。
日上故陵煙漠漠。春歸空苑水潺潺。西洛懷古。楊文公談苑。雪意未成雲著地。秋聲不斷雁連天。奉使塗中。

客亭厭見名長短。村酒那能辨聖賢。又宿舍孤煙起。行衣夢雨涼。送僧遊楚。平檻曉波吳。榜渡遶城春樹越。禽飛章蘅州。神宮古柏啼鳥起。齋室虛簾宿霧通。太乙宮。以上詩話總龜。

劉筠

筠字子儀。大名人。咸平元年進士。累遷御史中丞。知制誥。翰林承旨。兼龍圖閣直學士。卒有冊府應言。榮遇。禁林肥川。中司汝陰。三入玉堂七集。

侯鯖錄。劉子儀三入翰林。頗不憚。詩云。蟠桃三竊成何味。上盡鼉峯迹。轉孤移疾不出。朝士問候者。繼至詢之。云。虛熱上攻。石中立滑。瘧在坐。云。只消一服清涼散。愈。謂兩府始得用青涼傘也。

南朝

華林酒滿勸長星。青漆樓高未稱情。麝壁燈迴偏照畫。雀航波漲欲浮城。鐘聲但恐嚴妝晚。衣帶那知敵國輕。千古風流佳麗地。盡供哀思與蘭成。

休沐端居有懷希聖少卿學士

嚳嚳風簷乳燕翔。浴蘭衣綵篋流黃。雲容倏變千峯險。草色相沿百帶長。旋製紫荷供麈筆。暗移神蔡忍搯牀。思君祇欲傾家釀。待警同誰賦柏梁。

代意

華池阿閣不相容。濁水清塵恨莫窮。明月自新班女扇。行雲無奈楚王風。乳鶯啼曉銷蘭炷。媚蜨傷春失蕙叢。縱使多才如子建。祇能援筆賦驚鴻。

漢武

漢武天臺切絳河。半涵非霧鬱嵯峨。桑田欲看他年變。瓠子先成此日歌。夏鼎幾遷空象物。秦臺未就已沈波。相如作賦徒能諷。卻助飄飄逸氣多。

館中新蟬

庭中嘉樹發華滋。可要螳螂共此時。翼薄乍舒宮女鬢。蛻輕全解羽人尸。風來玉女烏先轉。露下金莖鶴未知。日永聲長兼夜思。肯容潘岳到秋悲。

鶴

碧樹陰濃卸砌平。華亭歸夢曉頻驚。仙經若未標奇相。琴操何因寄恨聲。養氣自憐雞善勝。全身卻許雁能鳴。芝田玉水春雲伴。可得乘軒是所榮。

無題

走馬章臺冒雨歸。後門猶嘆滯前期。荷心出水終無定。蘿蔓從風莫自持。複帳麝輕難辟惡。曲房蠶嬾不成絲。漸漸隴麥藏鳴雉。更恨如臯一箭遲。

又贈荷花一絕

粉白朱紅翡翠翹。漢宮等級不相饒。風波若未乖前約。一死何辭更抱橋。

淚

雍門琴罷已浪浪。更上牛山半夕陽。楚澤雲迷千里目。蘇門歌斷九迴腸。寒梅帶雨飄離席。尺素停燈作

報章湘水未乾終未盡。豈徒萬點寄疎篁。

前檻十二韻

垂柳陰岑院。遊絲曠蕩春。蘅皋誰駐馬。羅轡自生塵。四姓良家子。三年賦客鄰。折腰行太緩。連瑣語何頻。倭墮雲爭媚。便娟月鬪新。滅瘢難辨玉。約指不勝銀。電笑投壺勝。江澄擣練勻。東南勞鶴望。西北限牛津。寶唾凝蘭氣。鳴簧咽絳脣。籠禽思隴樹。洞犬謝秦人。詠絮才無對。聞琴意始真。長安足輕薄。慎勿走瓊輪。

宣曲

八月收民算。三千異典章。天機從此淺。國豔或非良。玉戶銅爲杏。羅幃象作牀。驪姬初悔泣。飛燕近專房。蓮小纔承步。梅新競試妝。盡知春可樂。終歎夜何長。取酒臨邛遠。吞聲息國亡。難銷守宮血。易斷舞鸞腸。百草兼花鬪。雙鉤映燭藏。金人須手鑄。虎圈更身當。步輦回長樂。飛除接未央。琳琅飾歡館。藻繡哀周牆。厭火雙魚尾。鳴弦小雁行。雲臺澄顯氣。綺井激回光。路有斯須隔。憂難頃刻忘。新聲來樂府。別寢近溫湯。虹跨層臺晚。螢飛下苑涼。錦帷迎七夕。蓬餌薦重陽。九畹蘭承露。三江橘帶霜。方資裂繒笑。可要蕩舟狂。並釣池魚小。重衾穴鳳翔。珊瑚分碧樹。火齊列清防。背枕多幽怨。登樓更遠傷。下陳無自媿。人麤劇豺狼。

陸游渭南文集跋云。祥符中。嘗下詔禁文體浮豔。議者謂是時館中作宣曲詩。宣曲見東方朔傳。其詩盛傳都下。而劉揚方幸。或謂頗指宮掖。又二妃皆蜀人。詩中有取酒臨邛遠之句。賴天子愛才士。皆置而不問。獨下詔諷切而已。不然亦殆哉。

宋玉

楚國驕荒日已深。山川朝暮劇登臨。曾傷積毀亡師道。祇託微詞蕩主心。江草東西多恨色。峽雲高下結

層陰。潘郎千載聞遺韻。又說經秋思不任。

送客不及

青門祖帳曙煙微。片席乘流鳥共飛。曲岸馬嘶風嫋嫋。短亭人散柳依依。灞橋目斷猶回望。楚水魂銷爲送歸。祇自河梁傳怨曲。洛塵千古化征衣。

無題

曾許千金答浣紗。越溪浪淺不通槎。曉樓簾捲還凝霧。外院牆低卻映花。滿目離愁頻駐馬。一春幽夢祇驚鴉。柔桑蔽日南城路。懊惱羅敷自有家。

懷舊居

毛竹千叢蔽野亭。曉猿驚後亂峯青。漢庭已奏三千牘。周室仍繙十二經。紫殿深沈頻視草。緇幃寂寞自飛螢。振衣本爲蒼生起。肯向荀家祇聚星。

戊申年七夕

伯勞東去燕西飛。又報黃姑織女期。天帝聘錢還得否。晉人求富是虛詞。自注。道書牽牛娶織女。取天帝錢二萬。備禮。久不還。被騙在營室。

華寢星陳夜未央。橫河奔奔度神光。一年暫得停機杼。不柰秋蟲促織忙。以上西崑酬唱集。

舟行淮上遇水暴漲作

行行極目天無柱。渺渺橫流浪有花。客子方思舟下碇。陰蚪自喜海爲家。村遙樹列清江岸。闊平分觸

氏蝸齋嘯風高誠可畏此情難喻坎中蛙

儒林公議丁謂當國恣行威福筠在翰林守正不阿附謂深嫉之筠乃
求出爲郡授諫議大夫守廬江筠拜章求兼集賢院學士謂沮之不與

召入翰林別同僚

一辭鑾署守英藩兩見廬峯媚翠尊政儒每憐民若子歲豐還喜稻成孫
離愁且飲閑人酒密對須求長者言入奉清朝同一德晨趨豈歎鬢霜繁

儒林公議

題林逸士肥上新屋壁

久厭侯鯖盡室來卜居鄰近釣魚臺舊山鶴怨無錢買新竹僧同借宅栽
載酒誰從揚子學棹舟空訪戴逵回抽毫有污東陽壁但惜明時老澗才

瀛奎律髓

句

雨勢宮城闊秋聲禁苑多詩人玉屑

極目關河高倚漢順風鷗鷺遠凌秋

詩話總龜劉綜學士出鎮井門兩制館閣皆以詩餞其行因進呈章聖深究詩雅時方
競尙崑體璨裂彫篆親以御筆選其平淡者得八聯後綜寫爲御選句圖立石于晉祠

李宗諤

宗諤字昌武昉子第進士眞宗朝爲學士歷右諫議大夫有集

南朝

仙華玉壽曉沈沈。三閣齊雲複道深。平昔金鋪空廢苑。於今瓊樹有遺音。珠簾映寢方成夢。麝壁飄香未稱心。惆悵雷塘都幾日。吟魂醉魄已相尋。

代意

霧鸞曉影忽參差。雲雨陽臺役夢思。自是膠弦無續日。不同珪月有圓時。洞房斗帳承新愛。河漢星橋隔後期。綺榭凝塵斷消息。抒情空擬四愁詩。

館中新蟬

雨過新聲出院牆。煙輕餘韻度回塘。短亭疎柳臨官道。平野西風更夕陽。八斗陳思饒賦詠。二毛潘岳易悲涼。感時偏動騷人思。不問天涯與帝鄉。以上西崑酬唱集

絕句

戴了宮花賦了詩。不容重見赭黃衣。無慘獨出金門去。恰似當年下第歸。

國老談苑。李宗諤以京秩帶館職。不預賞花釣魚故事。因賦詩云。云太宗覽之大喜。特詔御宴。即日改官。

送何水部蒙出牧袁州

三省郎曹素髮垂。兩朝頻賜五時衣。一麾又守江城去。千騎方從澤國歸。醞酒河梁秋草闊。卸舟湖岸暝煙微。宜陽郡客多才子。誰伴山公醉夕暉。袁州府志

送士龍兄

銅魚四明守竹馬十年兄。操袂河梁別。鳴橈澤國行。登樓知日近。傍海見潮生。郡政應多暇。新詩幾首成。
式古堂書考。

句

一溪曉綠浮鷗鷺。萬樹春紅叫杜鵑。春郊。金鑿後記人爭寫。玉署新碑帝自書。贈蘇承旨。楊文公談苑。

陳越

越字損之。開封尉氏人。咸平中。舉賢良方正。歷著作佐郎。直史館。官至左正言。

休沐端居有懷希聖少卿學士

玉甃銀牀蔭碧桐。北窗珍簾水紋融。衣裁練布如王導。扇執蒲葵學謝公。瓊屑半和仙掌露。蘭茗輕泛楚臺風。若非冰雪神仙骨。相樂誰同一笑中。西崑酬唱集。

句

擁路東方騎。懸腰左顧龜。送李秦州。皇朝類苑。

李維

維字仲方。肥鄉人。平章沆之弟。雍熙二年進士。真宗初。召試中書。擢知制誥。翰林學士。歷刑部尚書。相州觀察使。出知陳州。卒。有集。

休沐端居有懷希聖少卿學士

銀闕琳房視草餘。龍門岑寂斷軒車。彩毫閑試金壺墨。青案時看玉字書。王儉風流希謝傅。子雲詞賦敵相如。瓊枝不見蕭齋晚。蕙草煙微度綺疏。西崑酬唱集

直夜

繚垣窈闕慶雲深。畫燭熏爐對擁衾。三殿夜籤傳漏箭。九秋霜籟入風琴。階前槁葉驚寒雨。天際孤鴻答迴砧。欹枕便成魚鳥夢。豈知名路有機心。

寄田錫舍人

當年心計此心知。忽忽逢人亦自疑。枉是憂公生白髮。有何長略謝清時。林僧已怪抽身晚。朝侶猶嫌到闕遲。多喜通規識幽抱。路遙無處寄相思。

歸越東舊隱別秦中知己

客亭楊柳葉初殘。歌咽秋空慘別顏。吟愛好峯歸越路。醉衝寒雨出秦關。煙蘿庭戶重棲倚。漁浦人家舊往還。縱使功名無分得。免教心在怨尤閒。

再會傅逸人

分到知心意不輕。幾年曾是愴離情。微風吹雨雁初下。落葉滿階蟲正鳴。燈靜苦嫌論劍略。簾涼頻喜轉琴聲。從來共約雲泉老。肯向人間占好名。

郊居寄朝中知己

年來流水壞平田。客徑窮愁自可憐。汀葦亂搖寒夜雨。沙鷗閑弄夕陽天。狂嫌濁酒難成醉。冷笑清詩不

直錢碧落故人知我否。幾回相憶上漁船。

霜月

銀牀葉暗飄。霜月夜迢迢。寒極屋難辟。髮多酒漫消。荀爐殘更換。湘瑟罷仍調。誰道河流淺。盈盈萬里遙。
以上四朝詩。

句

故宮芳草在。往事暮江流。洛宮亭。謫去賈生身健否。秋來潘岳鬢如絲。寄洪湛。楊文公談苑。 秋聲和暮角。膏雨

逐行軒。送劉綜學士出鎮井門。詩話總龜。 清朝納祿猶強健。白首還家正太平。送工部侍郎朱昂致仕歸荆南。灑水

燕談。

丁謂

謂、字謂之。更字公言。蘇州長洲人。淳化三年進士。累遷知制誥。天禧中。拜同中書門下平章事。封

晉公。乾興中。坐擅改永定陵。貶崖州司戶參軍。更赦徙道州。明道末。召還。卒於光州。有集。

高齋詩話。呂獻可嘗云。丁謂詩。有天門九重開。終當掉臂入。王元之讀之曰。入公門猶鞠躬如也。天門豈可掉臂入乎。此人不忠。後果如其言。

洪駒父詩話。潘子真爲予言。晉公詩。綠柳垂手舞。黃鳥緩聲歌。樂府有大垂手。小垂手。前緩聲。後緩聲。故丁謂用之。其屬對律切如此。

代意

玳帶珊瑚佩解瓊。楚雲無定好傷情。臨邛已誤通琴意。金谷難尋辨玉聲。微警單棲盤露重。密含幽思吮蘭平。明珠百琲將何當。悵望輕軀病欲成。

又贈荷花一絕

夢散高唐夜正遙。楚天何處不無憀。秋風似會荆王意。露渚煙汀養細腰。以上西崑酬唱集。

山居原注雷化以南山多凌霄藿香芬芳襲人動或數里

洞口清香徹海濱。四時芬馥四時春。山多綠桂憐同氣。谷有幽蘭讓後塵。草解忘憂憂底事。花能含笑笑何人。自注海南有含笑花。爭如彼美欽天壤。長薦芳香奉百神。宋文鑑。

歸田錄丁晉公在珠崖有詩僅百篇號知命集其

警句有云草解忘憂憂底事花名含笑笑何人

詠泉州刺桐

聞得鄉人說刺桐。葉先花發始年豐。我今到此憂民切。只愛青青不愛紅。

有感

今到崖州事可嗟。夢中常若在京華。程途何啻一萬里。戶口都無三百家。夜聽猿啼孤樹遠。曉看潮上瘴煙斜。吏人不見中朝禮。麋鹿時時到縣衙。

過武陵甘泉寺留題

翠影人疎度。波光瑟瑟凝。帝家金掌露。仙署玉壺冰。曉井侵星汲。宵廚向月澄。豈惟蠲肺渴。灌頂助三乘。

以上方輿勝覽

以詩送宣賜進奉紅綃封龍字茶與璉禪師

密緘龍焙火前春。翠字紅綃熨眼新。名品至高誰合得。雙林樹下上乘人。羅湖野錄。

途中盛暑南遷時作

山木無陰驛路長。海風吹熱透蕉裳。渴思西漢金莖露。困憶南朝石步廊。江上綸竿輸散誕。林閒冠褐負清涼。下程欲選披襟處。滿眼梧桐兼佛桑。事文類聚前集。

遊東山

數峯回抱隔煙林。一簇招提十里深。祇合步行尋石徑。不宜呵喝入松陰。遙分畫手援毫意。暗起詩人得句心。梅嶺笙歌上高處。孤猿幽鳥滅清音。

煎茶

開緘試雨前。須汲遠山泉。自遶風爐立。誰聽石碾眠。輕微緣入麝。猛沸卻如蟬。羅細烹還好。鐺新味更全。花隨僧箸破。雲逐客甌圓。痛惜藏書篋。堅留待雪天。睡醒思滿啜。吟困憶重煎。祇此消塵慮。何須作酒仙。

公舍春日

綠楊垂線草鋪茵。觸處煙光舉眼新。一品也須妨白髮。千金莫惜買青春。鶯聲圓滑堪清耳。花豔鮮明欲照身。獨向此時爲俗吏。風流知是不如人。以上瀛奎律髓。

句

梅花過嶺路。桃葉渡江船。送章南安。珊瑚新筆架。雲母舊屏風。和錢易。泣珠泉客通關市。種玉仙人寄版圖。送章明州。楚子夢雲鈴閣密。郢人歌雪射堂開。送陳荆南。千金家累非良寶。一品官高是強名。為侍中時作。九萬里鵬重出海。一千年鶴再歸巢。自崖召還寄友人。以上皇朝類苑。背裝花屈膝。白打大廉斯。進前行兩步。蹻去立多時。蹻蹻。詩話總龜。鷹鵠騰雙眼。龍蛇繞四肢。蹻來行數步。蹻後立多時。蹻蹻。溫公詩話。鶯鶯鳳輦穿花去。魚畏龍顏上釣遲。賞花釣魚應制。歸田錄。

刁 衍

衍、字元賓。昇州人。仕南唐。為集賢校理。歸宋。授太常寺太祝。真宗朝。累遷直祕閣。兵部郎中。有集。

代意

薰時芳夕九回腸。斂袂東窗待曉光。秦嶺樹高迷隴塞。楚天雲淡隔瀟湘。病餘公幹情多詠。秋晚安仁鬢足霜。休道鮫人落珠淚。微波還擬託陳王。西崑酬唱集。

任 隨

隨、仕太常丞。直集賢院。

漢武

殊庭深恨隔仙曹。桂館蜚廉事轉勞。銀闕尚沈滄海闊。井幹空拂絳河高。蒼陽弋獵侵多稼。朔塞旌旗照不毛。苦信憑虛王母說。東方三度竊蟠桃。西崑酬唱集。

劉 鷗

鷓官工部員外郎直集賢院

館中新蟬

搖落何須宋玉悲。齊亭遺恨若霑衣。池中菡萏香全滅。井上梧桐葉乍飛。風促箏聲隨斷續。日移輒影自光輝。宜秋門外饒芳樹。結駟那堪送客歸。西崑酬唱集

張詠

詠字復之。濮州鄆城人。太平興國五年進士。歷樞密直學士。出知益州。眞宗初。入爲御史中丞。出知杭州。再知益州。進禮部尙書。卒諡忠定。自號乖崖。有乖崖集。

蔡寬夫詩史。乖崖少喜任俠。學擊劍。尤樂聞神仙事。性極清介。居無妾媵。不事服玩。朝衣之外。燕處惟紗帽。皂緋。一黃土布裘而已。至今人傳其畫像。皆作此節。

西清詩話。張乖崖少與逸人傅霖同學。公旣顯達。求霖三十年不可得。作憶霖詩云。寄語巢由莫相笑。此生終不羨輕肥。晚年守宛丘。有被褐騎驢叩門大呼曰。語尙書青州傅霖。關吏走白公曰。傅先生天下士。汝何人敢呼姓名。霖笑曰。別子一世尙爾。童心是。豈知世間有我哉。公問何昔隱。今出。霖曰。子將去矣。來報子耳。公曰。詠亦自知之。霖曰。知復何言。後一月公薨。

館中新蟬

脫塵還與比仙遊。露腹何妨近品流。嫩殼半遺紅藥地。細聲偏傍綠楊樓。詩家取象吟難盡。畫格偷眞意不休。正好儒林擬綵紉。憑君無苦預悲愁。西崑酬唱集

寄陳圖南

性愚不肯林泉住。強要清流擬致君。今日星馳劍南去。回頭慚媿華山雲。

青箱雜記。公布衣時。素善陳搏。嘗因夜話謂搏曰。某欲分先生華山一半住得無。搏曰。餘人則不可。先輩則可。及旦取別。以宣臺十枝白雲臺墨一劑。蜀箋一角贈公。謂搏曰。會得先意。取某入鬧處去。後尹蜀乘傳過華陰。寄詩云。

答傅逸人

蕭蕭疎葦對門牆。見說新秋鱸味長。何事輕拋來帝里。至今魂夢繞寒塘。以上乖崖集。

贈官妓小英歌

天教搏百花。作小英。明如花。住近桃花坊北面。門庭掩映如仙家。美人宜稱言不得。龍腦熏衣香入骨。維揚輒穀如雲英。毫郡輕紗似蟬翼。我疑天上婺女星之精。偷入筵中名小英。又疑王母侍兒初失意。謫向人間爲飲妓。不然何得膚如紅玉初碾成。眼似秋波雙臉橫。舞態因風欲飛去。歌聲遏雲長。且清有時歌罷下香砌。幾人魂魄遙相驚。人看小英心已足。我見小英心未足。爲我高歌送一杯。我今贈汝新翻曲。青箱雜記。

句

小桃遮不得。深雪放教青。庭竹每思舊隱歸何許。或問前程笑指空。維揚書懷。

茗溪漁隱叢話。乖崖詩句。

清詞古與郊島相先後。

雅字子正。歙人。南唐時。隨計金陵。韓熙載知貢舉。擢爲第一。歸宋。累遷職。方員外郎。咸平末。出守舒州。秩滿。乞致仕。就掌靈仙觀。大中祥符二年。直昭文館。卒。

馬令南唐書。雅以所學謁韓熙載。熙載一見如疇昔。館給之。雅性巧黠。應答如流。待之爲忘年之交。出入臥內。曾無間然。熙載性嬾。不拘禮法。常與雅易服燕戲。狻雜侍婢入。未念酸。以爲笑樂。或云熙載所著格言。半雅之辭。

緇素雜記。韓熙載弊衣履。作瞽者。持獨弦琴。俾舒雅執。

板挽之。隨房歌求丐。以足日膳。且暮亦不禁其出入。

答內翰學士

清貴無過近侍臣。多情猶憶舊交親。金蓮燭下裁詩句。鱗角峯前寄隱淪。和氣忽飄燕谷暖。好風徐起謝庭春。緘藏便是山家寶。留與兒孫世不貧。西崑酬唱集。

答錢少卿

蓬萊閣下舊鄰居。偶別俄驚四載餘。每見寒葭思倚玉。忽臨秋水得雙魚。人間貴賤誰能及。物外優閑我自如。聞說歸艎向春渚。深知不與道情疎。

答劉學士

往歲別京畿。棲山與衆違。君心似松栢。雁足寄珠璣。學道情難篤。燒丹力尙微。雲中雞犬在。祇候主人歸。以上四朝詩。

錢惟濟

惟濟字巖夫。惟演弟。歸宋。歷恩州刺史。加司空。保靜軍觀察。留後。卒。諡宣惠。有玉季集。

夜讌

清讌夜何其。南亭露欲稀。踟躕霞袖舞。激灑羽觴飛。鏤窰搖花落。金璫照月輝。瑤光未西落。休賦醉言歸。

西崑酬唱集

句

鳳簫通碧落。星石辨靈源。故主第。庭下焚香連宿霧。林閒鳴佩起棲鸞。太乙宮醮。以上皇朝類苑。

晁

迴

迴字明遠。澶州清豐人。徙家彭門。太平興國五年進士。擢右正言。直史館。知制誥。爲翰林學士承旨。天禧中。判西京。留司御史臺。以太子少保致仕。加少傅。卒。贈太子太保。諡文元。有翰林集。道院集。

屬疾和錢希聖

精鶩成勤瘁。頤貞俟有瘳。吟生南越思。慈結北堂憂。粲枕甘爲蜺。豐廚厭炙牛。元元知寡欲。平子尙多愁。夕鳥侵階啄。宵螢入樹流。玉書能靜覽。柱史倦閑投。忽賦行雲什。堪聽擊壤謳。期君整朝佩。仙署在瀛洲。

西崑酬唱集

遊文潞公曲水園

天桃穠李豔芳辰。丞相園林濕水濱。虎節麟符拋不得。卻將佳景付遊人。

風月堂詩話。吳俊爲予言。文潞公出鎮長安。吾祖文元公知許昌。遊公曲水園留詩云云。公得詩甚喜。乃作書并封園券與文元曰。可使作園中主人也。俊字仲思。文元五世孫。

遊虎丘并序

余罷掌賦東陽。歸次蘇臺時。故人王士龍飲餞乎閶門。且曰。虎丘山寺。吳中勝概。不避數里。可能遊乎。余沛然懽心。請與偕往。由枝派乘水輿。長嘯清風。目窮幽趣。棹工叢力。葉舟如飛。拂白英以半開。縈紅樹以傍出。筵詣幽境。夙無纖塵。相與披煙蘿。凌磴道。杳疑天外。作爲佛宮。俯臨劍池。呀若斷岸。磊砢嶮峯。不能形容。肆凝覽以更周。惜頽景之西匿。一觴一詠。柅輿而還。遂裁八章。以表嘉會。時淳化四載。自序。

餞別閶門復少留。故人邀我浣離愁。旋沽美醞乘漁艇。急棹斜陽到虎丘。千古劍池呀怪石。一方金地抱清流。歸時眷戀情無限。不得從容秉燭遊。吳郡志。

送何水部蒙出牧袁州

條教屬惟良。乘秋始辦裝。朱轡重按部。白首尙爲郎。督課民期富。從儒道益光。更資談博物。千載楚萍鄉。

袁州府志。

句

夙駕都門曉。涼風苑樹秋。送劉綜學士出鎮井門。玉壺野史。

崔遵度

遵度字堅白。江陵人。徙淄州。太平興國八年進士。咸平中爲左司諫直史館。仁宗爲壽春郡王。與張士遜命爲王友。東宮建。遷左諭德。卒。官遵度善琴。得其深趣。嘗自著琴箋。有文集。

屬疾和錢希聖

李白羹初美。相如渴漸瘳。八軛非性懶。三昧減心憂。筆宛多批鳳。自注。公新集號筆宛。詞鋒勝解牛。舊山疑鶴怨。畏日想雲愁。廣內勞揮翰。通中羨枕流。使星方屢降。客轄未容投。好奏倪寬議。何須莊鳥謳。朝衣熏歇不。侍史待仙洲。西崑酬唱集

劉乘

乘官左諫議大夫樞密直學士。曰瑄按。晁以道清風軒記。作張乘。

戊申年七夕

紅葉爛漫碧池香。羅綺三千侍漢皇。阿母暫來成底事。茂陵宮樹已蒼蒼。香階寶砌靜無塵。遙指星河再拜人。若把離情今夕說。世閒生死最傷神。珠箔風輕月似鉤。還將錦繡結高樓。堪傷乞巧年年事。未識君王已白頭。西崑酬唱集

薛映

映字景陽。蜀人。進士及第。歷右諫議大夫。知杭州。仁宗朝。官禮部尚書。集賢院學士。分司南京。卒。贈右僕射諡文恭。

戊申年七夕

銀河耿耿露溥溥。綵縷金針玉佩環。天媛貪忙爲靈匹。幾時留巧與人閒。西崑酬唱集。

曲水亭在下天竺水壑盤一日流杯亭。

臺盤疏石渠。激流環四面。夏屋有餘清。羽觴隨意轉。賓告醉言歸。主稱情未倦。雖非禊飲辰。豈謝蘭亭讌。
杭州府志。

句

黃鵠晨霞傍樓起。頭陀秋草繞碑荒。送人之鄂州。皇朝類苑。

宋詩紀事卷七

錢唐厲鶚緝

祁門馬曰瑄同緝

孫僅

僅字鄰幾。何弟。咸平元年進士第一。累官集賢院學士。權知開封府。後領審刑院。進給事中。卒有甘棠集。

灑水燕談。孫何孫僅學行文詞。傾動場屋。何既爲狀元。王黃州覽僅文編。書其後曰。明年再就堯塔試。應被人呼小狀元。後榜僅果爲第一。黃州復以詩寄之云。病中何幸忽開顏。記得詩稱小狀元。粉壁乍懸龍虎榜。錦標終屬鶴鴒原。并寄何詩曰。唯愛君家棣華榜。登科記上並龍頭。潘逍遙亦有詩曰。歸來徧檢登科記。未見連年放弟兄。而陳堯叟堯咨兄弟亦前後相繼爲狀元。實士林盛事也。

勘書

儒官無外事。招客勘青編。筆墨東西置。朱黃次第研。頻憂傷點竄。細恐誤流傳。改是文辭正。增加字數全。端坐窮今古。披襟見聖賢。得興忘昏曉。題名記歲年。棲臺思確論。廢卷爲忘篇。魚魯皆刪定。誰人敢閒然。
宋文鑑。

贈种徵君放

雄名英槩比君難。二十高名滿世閒。飛詔幾回來北闕。草元終不出南山。詩篇落處風雷動。筆力停時造

化閑仙術每將丹訣解。史才會把逸書刪。家僮只有猿隨從。坐客唯聞鶴往還。兩制詞臣求識面。九重天子望祇顏。處士星孤輕世俗。大夫松好賤官班。棊殘夜石秦雲斷。琴徹秋富蜀月彎。朝議蒲輪看再降。宵教從此老柴關。合璧事類後集

句

汾水冷光搖畫戟。蒙山秋色鎖層樓。送劉綜學士出守并門 詩話總龜

李慶孫

慶孫泉州惠安人咸平元年進士官水部郎

句

軸裝曲譜泥金字。樹記花名玉篆牌。

韻語陽秋。吳元獻云。太乞兒相若。語富貴者不爾也。

錢易

易字希白。昆之弟。歸宋。中咸平二年進士。仕為翰林學士。卒有金閨瀛洲西垣制集。

擬張籍上裴晉公

午橋莊上千竿竹。綠野堂中白日春。富貴極來唯歎老。功名高後轉輕身。嚴更未報皇城裏。勝賞時遊洛水濱。昨日庭趨三節度。淮西曾是執戈人。

許彥周詩話。錢希白作擬唐詩百篇。備諸家之體。自序曰。今之所擬。不獨其詞。至於題目。豈欲拋離本集。或有事疏。斯亦見之本傳。

嵇康小舞詞并序

薛九江南富家子。得待宮中。善歌舞。嵇康。嵇康。江南曲名也。學舞於鍾離氏。建業破零。落於江北。予遇於洛陽福善坊趙春舍。飲酣。於是歌嵇康其詞。卽後主所製焉。嘗感激坐人皆泣。春舉酒請舞。謝曰。老矣。腰腕衰硬。無復舊態。乃強起。小舞終曲而罷。座有王生者。請予爲嵇康小舞詞。

薛九三十侍中郎。蘭香花態生春堂。龍盤王氣變秋霧。淮聲哭月浮秋霜。宜城酒煙濕羈腹。與君強舞當時曲。玉樹遺辭莫重聽。黃塵染髮無前綠。我聞襄陽白銅鞮。荒情古豔傳幽悲。淒涼不抵亡國恨。塵中苦淚飛柔絲。洛陽公子擎銀觴。跪奴和曲生輝光。茂陵旅夢無春草。彤管含羞裁短章。補侍兒小名錄。

西遊曲

花銷秋老白日短。敗紅荒綠迷空館。擬將清血灑昭陵。幽谷蛇啼半山晚。十年辭家勤獻書。王孫不許延公車。江頭祖廟祭無血。重門生草寒離離。我有王孫三尺劍。姦骨無痕古波豔。佩入函關無故人。玉握凋零七星暗。宋文鑑。

句

綠章封事緘初啓。青鳳求凰尾乍開。芭蕉。楊文公談苑。雙蜂上簾額。獨鵲裊庭柯。詩人玉屑。

李堪

堪字仲任。晉陵人。咸平二年登第。景德閒。爲古田令。官至工部尙書。

仙樓道院 在古田縣五華山。

尋源探雲霞。中有金仙家。綺疏見飛翬。雕闌燦朱華。珍禽棲不去。靈液流無涯。晴旭起風篁。空香送天花。春雷會社鼓。寒煙聚海茶。奇峰媚如削。芳樹一何嘉。且將白閣齊。絕與紅塵賒。終然謝朝絨。此地營丹砂。
福州府志。

句

海月隨帆落。溪花遶驛流。送周建州。 皇朝類苑。

陳堯咨

堯咨字嘉謨。堯佐弟。咸平三年進士第一。歷官翰林學士。武信軍節度使。知河陽。又徙天雄軍。卒。贈太尉。諡康肅。

普濟院在餘姚。

山遠峯峯碧。林疎葉葉紅。凭闌對僧語。如在畫圖中。會稽志。

題三桂亭

不誇六印滿腰懸。二頃仍尋負郭田。當日弟兄皆刷羽。如今鴻雁盡摩天。扶疎已問新栽竹。清淺猶尋舊漱泉。大尹今來還又去。夕陽旌旆復翩翩。

陝西通志。三桂亭在長安城南。宋諫議大夫陳公之別墅。三子堯叟。堯佐。堯煥。皆登科。故事。因以名。大中祥符間。堯咨知永興軍。書詩于碑。至今猶存。

邵煥

煥，淳安人，咸平三年進士，仕至員外郎。

句

官船風破浪，關吏鼓通晨。送晏集賢南歸。皇朝類苑。

李永

句

朝馮玉几言猶在，夜啓金縢事已非。熙陵挽詞。春明退朝錄。

鄭戩

戩，字天休，吳縣人，舉進士，累官右諫議大夫，樞密副使，以資政殿學士知杭州，復爲陝西四路安撫使，拜奉國軍節度使，卒，贈太尉，諡文肅。

句

春至不擇地，路旁花自開。

嘉祐雜志，長安北禪寺，笏石。

鄭天休資政題十字刊之。

許式

式，字叔矜，吳郡人，咸平三年進士，官比部郎中，出守南昌，終轉運使。

寄洞山聰禪師

語言全不滯。高躡祖師蹤。夜坐連雲石。春栽帶雨松。鑑分金殿燭。山蒼月樓鐘。有問西來意。虛堂對遠峯。
林開錄。

王曙

曙字晦叔。河南人。東臯子績之後。舉進士。咸平中。舉賢良方正科。策入等。仁宗朝。歷官樞密使。拜同中書門下平章事。卒。贈太保。中書令。諡文康。有集。

回峯院

山勢欲壓海。禪局向此開。魚龍腥不到。日月影先來。樹色秋擎出。鐘聲浪蒼回。何期隨吏役。暫得拂塵埃。

娛書堂詩話。文康王公晦叔。嘗宰定海縣。賦回峯院詩云云。商逸卿得遺墨刻之。

句

千山送客東西路。一樹照人南北枝。茗溪漁隱叢話。

許洞

洞字洞天。吳郡人。太子洗馬仲容之子。咸平三年進士。以忤知州馬知節。奏除名。祥符初。祀汾陰。獻三盛禮賦。官烏江主簿。有集。

歐公詩話。許洞進士及第。無名子嘲曰。張康渾裏馬。許洞鬧裝妻。

吳郡圖經續記許洞以文辭稱于吳。尤邃左氏春秋。嗜酒嘗從酒家賃飲。一日大寫壁作歌數百言。鄉人競來觀之。售數倍。乃盡捐其所賣。

吳郡志許洞所居常植一竹以表特操。

吳人至今詠之曰許洞門前一竿竹。

贈潘閔

潘道遙平生才氣如天高。倚天大笑無所懼。天公噴汝口叟叟。罰教臨老頭。補衲歸中條。我願中條山神鎮長在。驅雷叱電趕出者老怪。

中吳紀聞。洞與潘閔錢易爲友。狂放不羈。閔坐虛多遜黨亡命。乃變姓名僧服入中條山。洞密贈之。

王曾

曾字孝先。益都人。咸平五年。鄉貢試禮部。廷對皆第一。仁宗朝。拜右僕射。兼門下侍郎。平章事。集賢殿大學士。封沂國公。卒。贈侍中。諡文正。

歷代吟譜。王曾投呂文穆早梅詩。雪中未問和羹事。且向百花頭上開。呂公曰。此生次第安排作狀元宰相矣。後果然。

澠水燕談。王文正公會。李文定公迪。咸平景德間。相繼狀元及第。其後更踐政府。及罷相。鎮青。又爲交承。故文正送文定移鎮兗海詩。有錦標得雋。曾相繼金鼎。調元亦踐更之句。又云。井土兒童君再見。會稽章紱我偏榮。蓋文定再鎮兗。而青社文正鄉也。里。

皇帝閣立春帖子

北陸凝陰盡，千門淑氣新。年年金殿裏，寶字帖宜春。合璧事類前集

送何水部蒙出牧袁州

雉省榮遷拜命新，魚符重佩出關頻。停驂卻訪枌榆社，戀闕迴瞻析木津。水蕓有誰裨政術，江山終日助吟神。一麾嶺外遙相望，應合趨庭問絹人。江西通志

句

欲謝君恩卻無語，心前笑指赤靈符。夫人閣端午帖子 合璧事類前集

陳亞

亞，字亞之，維揚人。咸平五年進士，嘗爲杭之於潛令，仕至太常少卿，好爲藥名詩，有澄源集。

迂叟詩話：陳亞，即中滑稽，嘗爲藥名詩百首，其美

者，有風月前湖夜，軒窗半夏涼，不失詩家之體。

郡齋讀書志：藥名詩始于唐人，張籍有江皋歲暮相逢

地，黃葉霜前半下枝之句，人謂起于亞之，實不然也。

絕句

滿室圖書雜典墳，華亭仙客岱雲根。他年若不和花賣，便是吾家好子孫。

澠水燕談：陳亞少卿，畜書數千卷，名畫數十軸，平生之所寶者。晚年退居，有華亭雙鶴怪石一株，尤奇峭，與異花數十本，列植於所居，爲詩戒子孫云。

登湖州銷暑樓

重樓肆登賞。豈羨石爲廊。風雨前湖夜。軒窗半夏涼。罍青識漁浦。芝紫認仙鄉。卻恐當歸闕。靈仙爲別傷。
宋文鑑。

惜竹

出檻亦不翦。從教長舊叢。年年到朱夏。葉葉是清風。庚溪詩話。

懷舊隱

多媿當年未第閒。卜居人外得清閑。排聯花品曾非僭。愛惜苔錢不是慳。秋閣詩情天淡淡。夕溪漁思月
彎彎。而今慚厚明朝祿。敢念藏愚莫買山。瀛奎律髓。

句

浪平天影接。山盡樹根回。翰府名談。碁爲臘寒呵子下。衣嫌春瘦縮紗裁。藥名。馬嘶曾到寺。犬吠乍行村。郊行。
以上青箱雜記。

章得象

得象字希言。浦城人。咸平五年進士。累遷兵部郎中。知制誥。翰林學士。寶元初。拜同中書門下平
章事。集賢殿大學士。慶歷中。拜鎮安軍節度使。封郇國公。徙判河南府。守司空。卒。贈太尉兼侍中。
諡文憲。改諡文簡。

巾子山翠微閣在台州

步步雲梯徹上層。回頭自覺欲飛騰。頻來不是塵中客。久住偏宜物外僧。下寺鐘聲沈地底。前峯塔影落階棱。凭闌未盡吟詩興。卻擬乘閑更一登。赤城志。

玉光亭在玉山縣。

千層懷玉對軒窗。池上新亭號玉光。祇此便堪爲吏隱。神仙官職水雲鄉。方輿勝覽。

峽山飛來寺

澄江詰曲峽中天。遠使歸時駐畫船。久別忽經星一紀。暫來纔見月三弦。勞生草草真徒爾。陳迹依依亦愴然。回首越城何處是。山南渺莽只雲煙。廣東通志。

李冠

冠字世英。歷城人。以文學稱。與王樵、賈同齊名。官乾寧主簿。有東臯集。

寄王肩望

霜臺御史新爲郡。棘寺廷評繼下車。首謁梓桐王處士。教風從此重詩書。

澗水燕談。王樵字肩望。淄川人。性迥逸。深老易。善擊劍。有概世之志。廬梓桐山。稱淄右書生。不交塵務。山東賈同、李冠皆尊仰之。咸平中。契丹內寇。舉族北徙。潛入虜中。訪其親。累年乃歸。持諸喪刻木爲親。葬奘山東。立祠奉侍終身。太守劉通詣樵。踰垣遁去。其後高弁知州事。范諷爲通判。相與就見之。李冠以詩寄之。晚自號贅世翁。爲贊書其門曰。書生王樵。薄命寡志。無益于人。道號贅世。豫卜地累卵名蘭室。中壘石刻銘其上。曰。生前殺驅以虞不備。沒後寄魄以備不虞。後感疾。卽入室。自掩戶乃卒。以古劍殉葬。著遊邊集。安邊三策。說史皆散失。濟南李芝爲贅世先生傳載其事。

王貽永

貽永字季長。祁人。溥之孫。咸平中。尚太宗女鄭國長公主。累官樞密使。同中書門下平章事。拜尚書右僕射。檢校太師。卒。諡康靖。

句

河朔雪深思愛日。并門春暖詠甘棠。送劉綜學士出守并門。詩話總龜。

李迪

迪字復古。鄆城人。景德二年。舉進士第一。歷翰林學士。給事中。參知政事。拜吏部侍郎。兼太子少傅。同中書門下平章事。致仕。卒。贈司空。侍中。諡文定。有集。

題河陽後城平嵩閣

南指嵩高北太行。大河中出貫靈長。君王不恃金湯險。自有仁恩結萬方。宋文鑑。

晏殊

殊字同叔。臨川人。七歲能屬文。景德初。以神童召試。賜進士出身。累擢知制誥。翰林學士。慶歷中。拜集賢殿學士。同中書門下平章事。兼樞密院使。出知永興軍。徙河南。以疾歸京師。留侍經筵。卒。贈司空。兼侍中。諡元憲。有臨川集。紫微集。

歸田錄。晏元獻善評詩。嘗云。老覺腰金重。慵便枕玉涼。未是富貴語。不如笙歌歸院落。燈火下樓臺。此善言富貴者也。人皆以為知言。

宋子京筆記云。天聖初元以來。縉紳閒爲詩者益少。唯丞相晏公殊。錢公惟演。翰林劉公筠。數人而已。晏丞相末年詩見編集者。乃過萬篇。唐人以來未有。然晏不自貴重其文。凡門下客及官屬解聲韻者。悉與之酬和。云郡齋讀書志。殊性剛峻。幼孤。篤學。爲文溫純。應用尤長。於詩抒情寓物。詞多曠達。當世賢士。如范文正。歐陽文忠。皆出其門。女適富鄭公。楊察。世稱其知人云。

示張寺丞王校勘

元已清明假未開。小園幽徑獨徘徊。春寒不定斑斑雨。宿醉難禁澹澹杯。無可奈何花落去。似曾相識燕歸來。遊梁賦客多風味。莫惜青錢萬選才。

復齋漫錄。晏元獻因觀王琪大明寺詩板。大加稱賞。召至同飯。飯已。又同步遊池上。時春晚。有落花。晏公每得句書牆壁。間或彌年未嘗強對。且如無可奈何花落去一句。至今未能對也。王應聲曰。似曾相識燕歸來。自此辟置館職。遂躋侍從。

和宋子京召還學士院

網索軒窗邃。鑾坡羽衛重。鷁舟還下瀨。星駟出飛龍。賦待三英集。詩須五吏供。會看邊燧息。橫視紫泥封。
復齋漫錄。

立春祠太乙

紫花雙節引青童。一片空歌韻曉風。太昊茲辰授春令。鸞旗應在喬雲中。
華燈明滅羽衣攢。翠柳蕭森矮檜寒。千步回廊繞金殿。水蒼瑤佩響珊瑚。
上已瓊林苑宴。二府同游池上。卽事口占。

殿後花枝白。閒紅樓前當道綠。楊風橫飛。綵艦波光外。倒寫朱橋水影中。

曲榭迴廊手伎喧。綵樓朱舫鼓聲繁。游人已著濃春去，不待歌長舞袖翻。

寒食東城作

王城百五車馬繁，重帷黝幕紛郊原。游人得意惜光景，恣尋複樹登高軒。平蕪遠水知何許，眼裏迢迢空處所。梨花澹豔柳絲長，百計撩春作煙雨。歌哭聲中半落暉，凋鞍繡轂尙遲歸。荒田野草人閒事，誰向伶元淚滿衣。

七夕

百子池深漲綠苔，九光燈迴照浮埃。天孫寶駕何年駐，阿母飄輪此夜來。空外粉筵和霧溼，靜中珠幌徹明開。秋河不斷長相望，豈獨人閒事可哀。

中秋月

一輪霜影轉庭梧，此夕羈人獨向隅。未必素娥無悵恨，玉蟾清冷桂花孤。以上古今歲時雜詠。

詠上竿伎

百尺竿頭裊裊身，足騰跟挂駭傍人。漢陰有叟君知否，抱甕區區亦未貧。侯鯖錄。

弔蘇哥

蘇哥風味逼天真，恐是文君以上人。何日九原芳草綠，大家攜酒哭青春。

西清詩話：元獻初罷政事，守亳社，每歎土風彫落，一日營妓曰劉蘇哥，有約終身，而其母禁之至苦，不勝鬱悒，方春物喧妍，馳駿馬出郊，登高家曠望長慟而卒。元獻云：士大夫受人盼睽，隨燥濕變渝，如翻覆手，曾狂女子不若爲序其事，以詩弔之云。

東軒筆錄。晏元獻當國。子京爲翰苑。晏愛宋之才雅。欲旦夕相見。遂稅一第于旁。近延屠之。其親密如此。遇中秋宴客。晏召宋出妓飲酒賦詩。達旦方罷。翌日罷相。宋當草詞。頗極詆斥。至有廣營產以殖私。多役兵而規利之語。觀者駭歎。

茗溪漁隱叢話。元獻弔劉蘇。

哥詩序。蓋指子京而言也。

煮茶

稽山新茗綠如煙。靜挈都籃煮惠泉。未向人閒殺風景。更持醪醑醉花前。

西清詩話。李義山雜纂品目數十。蓋以文滑稽者。其一曰殺風景。謂清泉濯足。花上曬禪。背山起樓。燒琴煮鶴。對花啜茗。松下喝道。晏元獻守穎。以惠山泉烹日注茶。從容置酒賦詩云云。自此殺風景之語。頗著于世。

孟蘭盆

紅白薇英落。朱黃槿豔殘。家人愁溽暑。計日望孟蘭。

老學菴筆記。故都殘暑。不過七月中旬。俗以望日具素饌。享先。織竹作盆。貯紙錢焚之。謂之孟蘭盆。以爲孟蘭盆倒則寒來矣。晏元獻詩云。

張殿院惠古瓦硯

鄴城宮殿久荒涼。縹瓦隨波出禁牆。誰約薛文成古硯。等閑裁破碧鴛鴦。已恣玉鋒磨薛骨。更持蟾淚溼雲根。欲知千載淒涼意。尚有昭陽夜雨痕。硯箋。

初秋寓直

絡河星斗夜闌干。禁署沈沈閉九關。上帝冊書羣玉府。仙人宮殿巨鼇山。涼蟾影度秋陰薄。促漏聲來夜

唱閑擁鼻吟多欲愁絕嚴鐘淒斷樹烏還合璧事類前集

賦得秋雨

點滴行雲覆苑牆。飄蕭微影度迴塘。秦聲未覺朱弦潤。楚夢先知薤葉涼。野水有波增淡碧。霜林無韻溼疎黃。螢稀燕寂高窗暮。正是西風玉漏長。

寓意

油壁香車不再逢。峽雲無迹任西東。梨花院落溶溶月。柳絮池塘淡淡風。幾日寂寞傷酒後。一番蕭索禁煙中。魚書欲寄何由達。水遠山長處處同。

春陰

十二重環闕洞房。愔愔危樹俯迴塘。風迷戲蝶閑無緒。露裊幽花冷自香。綺席醉吟銷桂酌。玉臺愁作澀銀簧。梅青麥綠江城路。更與登高望楚鄉。以上瀛奎律髓

送凌侍郎歸鄉一作送林侍郎還知宣州

江南藩郡古宣城。碧落神仙擁使旌。津吏戒船東下穩。縣僚負弩晝歸榮。江山謝守高吟地。風月朱公故里情。曾預漢庭三獨坐。府中誰敢伴飛觥。曹氏歷代詩選

巢父井

稟生值堯年。率性在龐厚。安巢一枝上。豈曰鶉居陋。潁波人洗耳。曾不污牛口。諒茲耕耒暇。鑿飲隈林藪。含飴鼓其腹。帝力予何有。遂令千載外。此地存遺甃。泓然逼喬木。宛若棲時舊。鄉人揭題榜。行旅諧瞻覲。

我來觀古蹟，愕立徘徊久。淒其望清風，不獲見師友。願言斟復酌，拭面洗心垢。翹勤慕高躅，感慨陳卮酒。思齊胡可望，庶以寬容瞽。夙駕恨長途，憑高重回首。汝州志。

題東湖涵虛閣

水有支流樹有孫，重重門巷挂朱軒。三君雅望標人傑，千里澄波隔世喧。西對戶庭徐孺宅，北傳鐘梵給孤園。欲知嗣續無窮勝，兩兩榮歸漢使轡。江西詩話。

句

靜尋啄木藏身處，閑看遊絲到地時。樓臺冷落收燈夜，門巷蕭條掃雪天。已定復搖春水色，似紅如白野棠花。春風任花落，流水旋杯行。以上歷代吟譜。樓臺側畔楊花過，簾幕中閒燕子飛。青箱雜記。

晏 穎

穎、殊弟。官奉禮郎。

臨蛻遺詩

江外三千里，人間十八年。此時誰復見，一鶴上遼天。

道山清話。晏穎，臨川人。丞相元獻公之弟。童子時，有聲。真宗召試翰林院，賦宮沼瑞蓮，賜出身。授奉禮郎。穎聞報，閉書室，高臥。家人呼之不應。招鎖就視，則已蛻去。旁得書一紙，云：「時年十八。」

張 及

及、字之元，蜀人。景德二年進士。仁宗朝，主管三司鹽鐵，出爲淮南轉運使。

贈黃孫二處士

二公高節厭喧卑。同寄蕭宮共展眉。玉樹冰壺齊品格。野雲臯鶴本追隨。泉流指下何人賞。岳峭毫端只自知。眷戀賢侯美風教。故山歸去尙遲遲。

茅亭客話黃處士延矩字垂範眉陽人也少爲僧性僻而簡常言家習正聲自唐以來待詔金門父隨僖宗入蜀至某四世矣琴最盛于蜀製斲者數。唯雷氏而已咸平中知州馮公知節召孫知微畫俾處士彈琴二公俱止僧舍嘗會愚茅亭進士張

及贈詩

贈杜鼎昇

家本樊川老蜀都。世家冠劍豈寒儒。筆耕尙可儲三載。酒戰猶能敵百夫。僻愛舜琴湘水弄。每懸孫畫醉仙圖。孟光笑語長相逐。喚作梁鴻得也無。

茅亭客話杜鼎昇字大舉形神清秀有古人之風鬻書自給夫婦皆八十餘每遇芳時好景選勝偕行人皆羨其高年逸樂進士張及贈詩云云

簡 簡

簡字叔廉。一字簡之。臨安人。一作錢唐人。景德二年進士。歷官右諫議大夫給事中。以工部侍郎致仕。家居。卒贈吏部侍郎。

宋史本傳簡性和易喜賓客即錢唐城北治園廬自號武林居士導引服餌歲晚顏如丹尤好醫術人有疾多處方療之有集驗方行于世

蒙齋筆談。郎簡侍郎。慶歷中。與杜祁公相善。謝事居里中。築別館徑山下。種菖蒲。以自餌。山中人目爲菖蒲田。范文正知錢唐。亦重其爲人。

揮麈前錄。徐度敦立爲貳卿。明清訪之。坐閒問曰。度今此居。號侍郎橋。何耶。明清應以仁宗朝郎簡以工部侍郎致仕居此。杭人德之。遂以名橋。

訪徐冲晦

湖上訪高士。徑深行綠苔。應聞山犬吠。知是野人來。岸幘出相接。柴門自爲開。林閒清話久。薄暮榜舟回。

宋文鑑

鮑當

當景德二年進士。爲河南府法曹。歷職方員外郎。有清風集。

方勺泊宅編。先子至杭。創小園在清波門外。有詩云。安得斷茅環堵地。漁樵

終老繼清風。方知是圃乃鮑當。郎中故居。鮑有詩名清風集。時號鮑清風。

孤雁

天寒稻梁少。萬里孤難進。不惜充君庖。爲帶邊城信。

溫公續詩話。當爲河南法曹。初失知府薛暎尙書意。因獻孤雁詩。薛大嗟賞。自是遊宴無不預焉。不復以掾屬待之。時人謂之鮑孤雁。薛嘗暑月詣其廨舍。當方露頂。狼狽入易服。把板而出之。忘其幘頭。薛嚴重。左右莫敢言者。坐久之。月上。當願見髮影。

大慚以公服

袖掩頭而走

松江夜泊

舟閑人已息。林際月微明。一片清江水。中涵萬古情。宋文鑑

寄西湖擇棲公

兩信海潮喧曉夕。百年事過無遺跡。舊住招提有幾人。春風苔長湖邊石。

送人南歸

淒淒楊柳暮。時復一蟬聲。滄海不可極。風帆難計程。微煙生晚浦。斜日上孤城。欲寄相思札。誰傳萬里情。
以上前賢小集拾遺。

題林和靖隱居

湖水春來綠。山雲夏亦繁。何如隱君子。長嘯掩柴門。文翰類選

江任

任、建陽人。景德二年進士。官祕閣校理。知秦州。

句

珠盤臨路泣。斗印入鄉提。送人。皇朝類苑。

黃覺

覺、字民先。浦城人。景德二年進士。爲殿中丞。

送梅昌言出鎮太原

五馬雍容出鎮時。都人爭看好風儀。文章一代誼高價。忠直三朝受聖知。帳下軍容生劍戟。門前行色擁

旌旗雲籠古戍黃榆暗。雪滿長郊白草衰。出去暫開貔虎幕。歸來須占鳳皇池。鬢閒未有一莖白。陶鑄蒼生固不遲。

翠屏筆談梅雅自修飾。

容儀偉如得詩大喜。

周啓明

啓明字昭回。處州縉雲人。景德中舉賢良方正。罷歸。仁宗朝仕至太常丞。

句

一丸童子藥。五返使臣車。近臣疾愈。皇朝類苑。鷗夷江上畚田稔。牛斗星邊貫索空。送皇甫提刑。楊文公談苑。

戚維

維楚丘人。堅素先生同文子。大中祥符初累官都官員外郎職方郎中。

送何水部蒙出牧袁州

又領親民任。星車別紫微。隼旗新命重。鶴髮故人稀。雲樹看如畫。風帆去似飛。鄉中諸父老。榮羨錦衣歸。

袁州府志。

孫元方

元方大中祥符初官殿中丞。

送何水部蒙出牧袁州

聖君再命擁朱輪。合是南方受賜頻。雙鬢任從添白髮。六條誰許繼清塵。風牽澤國秋帆遠。路入豐州畫錦新。莫爲故鄉延去懼。宜春人望待行春。袁州府志

錢 丕

丕、惟治子。大中祥符初。官駕部員外郎。終光祿少卿。

送何水部蒙出知袁州

白首名郎有幾人。雙旌畫錦不如君。楚江萍暖烘朝日。玉女衣輕挂曉雲。極浦仙舟煙澹澹。高秋郡閣葉紛紛。政成更與他州別。從古宜陽重藝文。袁州府志

盛 元

元、大中祥符初。屯田員外郎。

送何水部蒙出牧袁州

文昌郎位改清資。乞領魚符賦式微。雉省月寒慵夜直。隼旛風細喜秋歸。宜春酒助新開宴。侍史香餘舊賜衣。客向西山思井舊。莫教漚鳥見人飛。袁州府志

青陽楷

楷、蜀人。

題玉光亭和章郇公韻

鳴琴賢宰有三長。吟得新詞敵夜光。好是斷章無以和。神仙官職水雲鄉。

信州圖經。玉光亭在玉山縣廳之東。章
郇公詩碑在焉。蜀人青陽楷和韻云。

高觀

觀字會之。宿州斬人。第進士。累官集賢院學士。進給事中。知單州。

海棠

錦里花中色最奇。妖嬈天付本來稀。綺霞忽照迷紅障。縠露輕籠設翠幃。繁朶有情粧媚景。纖枝無力帶殘暉。好將繡向羅襟上。永作香閨楚楚衣。海棠譜

宋詩紀事卷八

錢唐厲鶚輯
祁門馬曰瑄同輯

杜衍

衍字世昌。越州山陰人。大中祥符元年進士。仁宗朝。拜同中書門下平章事。罷知兗州。以太子少師致仕。封祁國公。卒。贈司徒兼侍中。謚正獻。

石林詩話。杜正獻公。自少清羸。若不勝衣。年過四十。鬢髮卽盡白。雖立朝孤峻。凜然不可屈。而不爲奇節危行。歐公素出其門。公謝事居家。歐適來爲守。相與甚懽。公不甚飲酒。唯賦詩酬唱。是時年八十。然憂國之意。猶慷慨不已。每見於色。歐和詩。有先年老因憂國事。輿心違始乞身。公得之大喜。常自諷誦。當時以謂不惟曲盡公志。雖其形貌亦在模寫中也。

蔡寬夫詩史。杜正獻公。以直諒端方名天下。平生踐履。未有一事少出禮法。年過七十。謝事。始學草書。遂盡其妙。今使人每見之。其英特爽秀無所降屈之氣。猶可想見。

林下書懷

從政區區到白頭。一生寧肯顧恩讎。雙鳧乘雁常深媿。野馬黃羊亦過憂。豈是林泉堪佚老。只緣蒲柳不
禁秋。始終幸會承平日。樂聖唯能擊壤謳。

皇朝類苑。野馬黃羊。乃張說傳。所謂吾肉非黃羊。必不畏喫。血非野馬。必不畏刺是也。

幽居卽事

寂寂復寂寂。告老閑居日。徑草高于人。林鳥熟如客。黃卷不釋手。清風常滿室。內顧平生心。無過此時適。
宋文鑑

睢陽五老圖并序 時祁公年八十

夫蹈榮名而保終吉。都貴勢而躋遐者。白首一節。人生所難。今致政宮師相國杜公。雅度敏識。圭璋巖廟。清德令望。龜準當世。功成自引。得謝君門。視所難得者。則安享之。謂所難行者。則恬居之。燕申睢陽。與賓客太原王公。故衛尉河東畢卿。兵部沛國朱公。駕部始平馮公。咸以耆年挂冠。優遊鄉梓。暇日宴集。爲五老會。賦詩酬唱。怡然相得。宋人形於繪事。以紀其盛。昔唐白樂天居洛陽爲九老會。於今圖識相傳。以爲勝事。距茲數百載。無能紹者。以今況昔。則休烈鉅美。過之明逸。遊公之門久矣。以鄉閭世契。倍厚常品。今假守留鑰。日登翹館。因得圖像。占述序引。以代鄉校詠謠之萬一。至和丙申中秋日。錢明逸序。

五人四百有餘歲。俱稱分曹與挂冠。天地至仁難補報。林泉幽致許盤桓。花朝月夕隨時樂。雪鬢霜髯滿座寒。若也睢陽爲故事。何妨列向畫圖看。事文類聚前集

灑水燕談慶歷末祁公告老退居南京與太子賓客致仕王漢光祿卿致仕畢世長兵部郎分司朱貫尙書郎致仕馮平爲五老會吟醉相勸士大夫高之祁公以故相耆德尤爲天下傾慕兵部詩云九老且無元老貴莫將西洛一般看五人年皆八十餘康寧爽健相得甚歡故祁公詩云五人四百有餘歲俱稱分曹與挂冠而畢年最高時九十餘故其詩云非才忝預最高年是時歐文忠留守睢陽而歎慕借其詩觀之用次韻卒章云聞說優遊多唱和新詩何惜借德看

和孫珪祕丞說章草書

老來楷法不如初。試向閑齋習草書。下筆何曾見飛動。彫章早已過吹噓。伯英比聖功難到。懷素稱狂力有餘。若謂伊余堪繼踵。只應緣木可求魚。苦溪漁隱叢話

睢水卜居

無似老且病。惟恐歸田遲。一旦得引年。九天還聽卑。爲霑二品祿。俸盡百年期。恩深淪骨髓。感極橫涕洟。始營菟裘地。同向睢水湄。城隅最窮僻。匠者寧求奇。卜築悉由己。軒牖亦隨宜。外以庇風雨。內以安妻兒。燕雀莫羣噪。鷓鴣纔一枝。因念古聖賢。名爲千古垂。何嘗廣居室。儉爲後人師。亞聖樂簞食。寢丘無立錫。文終防世奪。景相恥家爲。文園四壁立。鄭公小殿移。伊余具員者。適會承平時。無術毗萬務。無才抗四夷。爲郡亦齷齪。勞心徒孜孜。保身亦天幸。拊己宜自知。開卷顏閒厚。復懼來者嗤。勸哉知止足。清白猶可追。合璧事類別集

蓮花

鑿破蒼苔作小池。菱荷分得綠差差。曉來一朵煙波上。似畫眞妃出浴時。後村千家詩

鄉有好事者。出君謨行草八分書數幅。中有梅聖俞詩一首。因成拙句。以識二美。

莆田筆健與文豪。尤愛南山縣詠高。欲使英辭長潤石。每逢佳句卽揮毫。清如韶濩諧音律。逸似鸞皇振羽毛。羲獻有靈應悵望。當時不見此風流。瀛奎律髓

雨中荷花

翠蓋佳人臨水立。檀粉不勻香汗溼。一陣風來碧浪翻。眞珠零落難收拾。少室山房續筆叢。

寶林寺

中懷無絆外緣閑。深掩禪扉客到難。勝景可曾飛錫去。好山多祇捲簾看。晝升講座天花落。夜步吟軒海月殘。今日逢師堪論道。歸心愁思一時寬。越詠。

題懷素自題卷後

狂僧草聖繼張顛。卷後兼題大歷年。堪與儒門爲至寶。武功家世久相傳。

遠蒙運使度支。以資政范公所寄黃素小字。韓文公伯夷頌。請許昌文公。淮西富公題詩于後。才翁復綴雅什。兼寄長安晏公公亦有作。衍久茲休退。人事僅廢。不意雅故未移。悉以副本爲贖。俾愚繼之。斷此怔忡。旣感且媿。輒爾率強。成拙句奉呈。敢言亦驥之乘。聊爲續貂之比耳。衍上。

希文健筆妙韓文。文爲首陽山下人。寧止一言旌義士。欲教萬古勸忠臣。頌聲益與英聲遠。事蹟還隨墨蹟新。當世宗工復題詠。尤宜率爾盡書紳。以上式古堂書考。

畢世長

世長。天聖中。以虞部郎中知台州。司農卿致仕。

睢陽五老會詩。年九十四歲。

非才最忝預高年。分務由來近挂冠。敢造鉅賢論軌躅。幸依都府得盤桓。篇章捧和慚風雅。眷待優隆荷歲寒。儻許衰容參盛列。欲憑繪事永傳看。事文類聚前集。

馮平

平、駕部郎中致仕。

睢陽五老會詩年八十七歲。

詔恩分務許優閑，肯借留都獬豸冠。名宦儻來空擾攘，丘園歸去且盤桓。醉遊春圃煙霞暖，吟聽秋潭水石寒。退傅況兼爲隱伴，紅塵那復舉頭看。事文類聚前集。

王渙

渙、禮部侍郎致仕。

睢陽五老會詩年九十歲。

分曹歸政養耆年，李下何由更整冠。賢相賦詩同笑傲，聖君優詔許盤桓。龐眉老叟俱稱壽，凌雪喬松豈畏寒。屈指五人齊五福，鄉人須作二疏看。事文類聚前集。

朱貫

貫、兵部郎中致仕。

睢陽五老會詩年八十八歲。

各還朝政遇堯年，鶴髮俱宜預道冠。乍到林泉能放曠，全拋簪紱尙盤桓。君恩至重如天覆，相座時親畏地寒。九老且無元老貴，莫將西洛一般看。事文類聚前集。

曹修古

修古字述之。建安人。大中祥符元年進士。官監察御史。天聖初。抗疏忤旨。出知興化軍。卒。贈右諫議大夫。

池上

荷葉罩芙蓉。員香暎嫩紅。佳人南陌上。翠蓋立春風。青箱雜記。

題清心堂在興化軍治。詩刻于壁。

天府鞠囚三節日。霜臺待漏五更時。薰風一覺清涼睡。莫問浮名高與卑。興化府志。

曹修睦

修睦。修古弟。大中祥符元年進士。官司封員外郎。分司南京。致仕。

贈仁曉禪師竹簾

翠筠織簾寄禪齋。半夜秋從枕底來。若也此時人問道。涼天捲卻暑天開。青箱雜記。

葛宮

宮字公雅。丹陽人。大中祥符元年進士。仕至工部侍郎。立方之曾伯祖。有青陽集。

句

翩翩燕子朱門靜。狼藉梨花小院閑。韻語陽秋。

蕭貫

貫字貫之。臨江軍新喻人。大中祥符二年進士第二。累官刑部員外郎。知饒州。遷兵部員外郎。

宮中曉寒歌

十二甍關隱空綠。獸狓呀酒椒壁馥。渴烏涓涓不相續。轆轤欲轉霏紅玉。百刻香殘隕蓮燭。五龍吐水漫寒漿。紅綃佩魚無左璫。兩兩懸足瞻扶桑。紅萍半規出波面。回首觚棱九霞絢。鳴鞘遠從天上來。大劍高冠滿前殿。

宋史文苑傳。貫初感疾。夢綠衣中人召至帝所。賦禁中曉寒歌。詞語清麗。人以比唐李賀。

豫章詩話。蕭貫少時。夢至一宮殿。羣女如神仙。一人授紙云。此行波牋。煩賦曉寒歌。貫援筆立成云。仙曰。子詩甚有奇語。異日必貴。

程琳

琳字天球。博野人。祥符四年進士。舉服勤詞學科。慶歷中。官至鎮安軍節度使。同平章事。卒。贈太師。中書令。諡文簡。

海棠

海外移根灼灼奇。風情閑麗比應稀。晶熒寶萼排珠琲。旖旎芳叢簇繡帷。繁極只愁隨暮雨。飄多何計駐春暉。浣花溪上年年意。露溼煙霞拂客衣。海棠譜。

司馬池

池字和中。陝州夏縣人。舉進士。歷官至天章閣待制。知河中府。徙同州。又徙杭州。晉州。

行色

冷于陂水淡于秋，遠陌初窮到渡頭。賴是丹青不能畫，畫成應遣一生愁。

中都志行色詩石刻在故安豐縣。張文潛作記云：待制司馬公嘗監安豐酒稅，作此詩。其孫宏知縣事，刻于石。梅聖俞嘗言詩之工者，寫難狀之景，如在目前，含不盡之意，見于言外，此詩有焉。

燕肅

肅字穆之，青州益都人。第進士，累遷龍圖閣待制，知鄧州，以禮部侍郎致仕。

宋史本傳：肅喜爲詩，能畫入妙品，嘗造指南車，記里鼓，二車及敬器以獻。又上蓮花漏法，在明州爲海潮圖，著海潮論二篇。

青箱雜記：本朝之制，待制止繫犀帶，遷龍圖閣直學士始賜金帶。燕公爲待制，十年不遷，乃作陳情詩，上時宰曰：鬢邊今日白，腰下幾時黃。時宰憐之，未幾遷直學士。

僻居

茅齋城市遠，草徑接漁村。白日偶無客，青山長對門。藥爐留火煖，花塢帶煙昏。靜坐搜新句，冥心傍酒樽。

宋文鑑

贈惠山慶上人

陸羽泉邊倚瘦筇，參差臺殿映疎松。五天講去春騎虎，一鉢擎來晝伏龍。像閣磬敲清有韻，蘚庭雪過靜

無蹤。相逢多說遊方話，知老靈山第幾峯。無錫縣志

蔣堂

堂字希魯，宜興人。大中祥符五年進士。仁宗時，歷官江淮發運使、禮部侍郎，嘗兩守吳郡。後謝事，因家焉。自號遂翁。有吳門集。

贈陳虞卿

寵秩拜春坊，歸休識慮長。埽門卑魏勃，設醴謝元王。一水尊鱸國，羣山橘柚鄉。喜君添老社，煙駕尙徜徉。

中吳紀聞：陳之奇，字虞卿，鄉人。以其有賢德，故以君子稱之。雖閭巷小兒亦知愛敬，有爭訟久不決者，跨蹇至其家，以大義感動之，皆爲之革心。自挂冠後，閑居十八年。熙寧初卒。葬花山王岐公爲作志，題之曰：陳君子墓銘。始公之謝事也，蔣堂侍郎語人曰：舉天下皆知有富貴，而虞卿獨以知止易衆人之心，吾喜林下有人矣。

新井歌井序

堯峯顯遲禪師，有道行居，常遊吾門。一日且曰：山鑿石造井，逾歲僅成，旣冽而甘，大爲叢林之利，願得紀述，以永其傳，因作歌云。

白雲莽莽青山頭，一穴四面飛泉流。其初山閒舊井涸，枯腸燥吻海衆羞。于時大士寶雲者，頤指土脈智慮周，山靈所感道心爽，檀施聿來工力鳩。雲錫齊下遠雷動，石火內擊飛星稠。百尺虛空廓地表，自注：鑿井求水出土一尺，卽有一尺虛空，見內書。一泓清冽呀深幽。人疑從天墮月窟，或問何處移龍湫。次則其徒駭殊勝，競持應器嘗甘柔。飢狄連臂喜跳擲，渴烏引喙鳴鉤鉤。碧甃光中輓轆曉，銀牀側畔梧桐秋。寶坊金地互相映，谷斛坎蛙難此留。傍晚江形小衣帶，下窺湖面卑浮漚。何茲鑿飲有功利，一掬入口醍醐優。熱者濯

之昏鈍決病者沃之沈痼瘳而我時邀墨客去松澗遠挈都籃遊淨瓶汲引試香薷雅具羅列無腥甌自注茶經檀鼎腥甌非器也比之玉乳不差別自注曲阿有玉乳泉謂彼練月多謬悠自注俗傳天竺有練月井而茶經水記皆不載今茲泉眼在魯塢所喜雲液鄰菟裘自注魯塢乃堯峯地予所居去之一舍芋翁既往乏鑿者水記未載予將修此山此井永不廢此歌其庶傳南州

過葉道卿侍讀小園

秀野亭連小隱堂紅蕖綠篠媚滄浪卞山居士自注道卿自號也無歸意卻借吳儂作醉鄉自注蘇人多遊飲于此園

隱圃

雅得菟裘地清宜隱者心綠葵才有甲青桂漸成陰獨曳山屐往無勞俗駕尋湛然常寂處水月一菴深

南湖臺

危臺竹樹閒湖水伴深閑清淺採香徑方圓明月灣放魚隨物性載石作家山自喜歸休早全勝賀老還
 曉榭水中央茲爲隱遯鄉小園香寂寂一派曉泱泱煙草碧彌岸露桃紅壓牆自注新植桃一百本鴟夷儻居此未必入滄浪水次揭危亭煙堤四面平栽蘆延宿鷺種柳待啼鶯雪霽清流漲風來夜艇橫輕微莫臨壑吾老嬾逢迎以上吳郡志

吳郡志隱圃在靈芝坊樞密直學士蔣堂之居堂兩守吳謝事因家焉自號遂翁園中有巖局水月菴煙蘿亭風篁亭香齒峯古井食山等堂嘗自賦隱圃十二詠結菴池上名水月宅南小溪上結宇十餘柱名溪館又築南湖臺于水中皆有詩

守會稽日修永和故事作

一派西園曲水聲。水邊終日會冠纓。幾年詩筆無停綴。不似當年有罰觥。會稽志。

贈惟政禪師

禪客尋常入舊都。黃牛角上挂瓶盂。有時帶笠穿雲去。便好和雲作畫圖。

西湖高僧事略。惟政禪師。字渙然。居功臣山淨土院。出

入常跨一黃牛。慶歷中。侍郎蔣公堂贈詩。蓋實錄也。

題山亭

山亭深處枕清溪。萬木回環盡翠微。梅萼破香知臘近。柳梢含綠認春歸。風前列嶂琴三疊。雪後羣山玉四圍。願我此來盤礴久。塵勞瀟灑頓忘機。常州府志。

句

深鎖煙光在樓閣。旋移春色入門牆。題吳殿丞廳之新葺兩圃。圃中有紅梅閣。吳有姬曰紅梅。因以名閣。吳郡志。

蔡齊

齊字子思。萊州膠水人。大中祥符八年進士第一。仁宗朝。拜禮部侍郎。參知政事。出知潁州。卒。贈兵部尚書。諡文忠。

孔平仲談苑。真宗臨軒策士。夜夢牆下有菜一苗。甚盛。與殿基相高。及拆第一卷。乃是蔡齊。上見其容貌。曰。得人矣。特詔金吾七人清道。自齊始。

小孤山

危峯屹立長江上。勢折華胥限百蠻。鼇背孤撐青玉柱。斗杓斜插翠雲鬢。月生西海初三夜。潮到東吳第一關。安得扁舟多載酒。放歌擊楫浪花閒。安慶府志

黃鑑

鑑字唐卿。浦城人。大中祥符八年進士。累遷太常博士。爲國史院編修官。出倅蘇州。有楊文公談苑楊公筆苑句圖。

送李殿省赴任常熟卽都尉元昆

吳山紫翠倚晴空。潘令風流向此中。雨飽公田方稼稔。春生香徑雜葩紅。綵鱸銜尾凌波駛。頰鯉駢頭薦俎豐。玉季情深重睽索。南雲延脰接飛鴻。吳都文粹

謝絳

絳字希深。濤之子。以任補校書郎。復登大中祥符八年進士甲科。仁宗朝。累除知制誥。判吏部流內銓。太常禮院。出知鄧州。有集。

儒林公議。謝絳吳人。有詞藻。景祐中。知制誥。然輕黠利。唇吻人罕測其心。人謂之十一面觀音。

小隱園詩并序

余近營別墅於小隱巖。忽憶癸酉冬春。詔逆虜使于陳橋驛。夢中偶賦。及寤。寫在牘背。今因巖名。知所

賦三言前契矣。遂足爲八句。

僕本塵外士。功名若毫末。因尋小隱園。忽見羣芳發。昔夢宛可記。靈契方茲達。會須挂朝纓。歸弄巖前月。

答梅聖俞問隱

聖俞一紙書。問我小隱居。小隱詎有異。築室數畝餘。巖壑不峻崒。田園非美腴。所欲近丘墓。歲時來埽除。先人夢讀史。遵道本聖徒。絕筆於此詩。子孫無忽諸。刻石置中堂。但使過者趨。題榜爲服訓。義取銘盤孟。後嶺雙松亭。徑術何縈迂。下臨富春渚。萬象生有無。東偏作草舍。可以施琴壺。門前碧塘水。萬本栽荷蕖。風來觸香氣。長著人衣裾。溪水泱泱流。黍稻可勿枯。柔桑及美果。種廣莫記株。澗草不識名。野禽多異呼。坐此易歲晏。漸與人世疎。在昔東陵侯。瓜瓞猶親鋤。楊惲謝九列。種豆南山隅。余嘗考槃賦。從我者誰歟。近來傅越石。趣尙若不殊。儻閑丘壑徑。不顧升斗儲。如君美材具。日月升雲衢。安敢預招挽。粗自陳其愚。以上杭州府志。

句

王貌閑如鶴。黃吟苦似猿。

富春遺事。梅聖俞。堯臣。與謝希深爲詩文友。互相切劘。希深居富陽小隱山。別築室曰讀書堂。構雙松亭於前。倚山臨江。雜植花果。沼荷稻圩。環流布種。頗稱幽人之居。聖俞慕悅其風。時以詩文問答倡和。一時傳爲雅事云。

職官分紀。國朝天聖中。修國史。王安簡。謝陽夏。李邯鄲。黃唐。卿爲編修官。安簡神情沖澹。唐卿刻意篇什。謝戲爲句云云。

范仲淹

仲淹字希文。其先邠人。後徙吳縣。大中祥符八年進士。仁宗朝擢右司諫。歷樞密副使。參知政事。以資政殿學士爲陝西四路宣撫使。知邠州。徙鄧州。荆南。杭州。青州。卒。贈兵部尙書諡文正。有丹陽集。

孔平仲談苑。范文正公幼孤。隨母適朱氏。因冒朱姓。後復本姓。啓曰。志在投秦入境。遂稱于張祿。名非霸越。乘舟乃救于陶朱。

老學菴筆記。范文正公喜彈琴。止

彈履霜一操。時人謂之范履霜。

牡丹

陽和不擇地。海角亦逢春。憶得上林色。相看如故人。

澗水燕談。海陵西溪鹽場。初呂文靖公嘗官于此。手植牡丹一本。有詩刻石。後范文正公亦嘗臨花。復題一絕。人以二公詩筆貴重。護欄歲久茂盛。每歲花開百朵。爲海濱奇觀。

淮上遇風

一櫂危於葉。傍觀欲損神。他年在平地。無忽險中人。

眉山詩話。雖弄翰戲語。卒然而作。其濟險加澤。未嘗忘也。

懷慶朔堂白瑄按饒州府志堂在舊州治內公謫守時建

慶朔堂前花自栽。便移官去未曾開。如今憶著成離恨。祇託春風管領來。

卻掃編春風鄱陽天慶觀道士也其所居之室曰春風軒

因以自名公在郡時與之遊今移守丹陽蓋以寄之云

西溪叢語公守鄱陽喜樂籍未幾召還作詩寄後政云云到京以綿臙脂寄其人題詩

云江甬有美人別後長相憶何以慰相思贈汝好顏色至今墨跡在鄱陽士大夫家

贈葉少卿

退也天之道。東南事了人。風波拋舊路。花月伴閑身。湖外扁舟遠。門中駟馬新。心從今日泰。家似昔時貧。見子登西掖。攜孫過北隣。白雲高閣曙。淥水後池春。尊酒呼前輩。爐香叩上真。只應陰德在。八十富精神。

中吳紀聞葉參字少列嘗守吳郡既謝事因居焉其子清臣字

道卿登禁從持本路漕節侍養搢紳榮之范文正公贈以詩

觀風樓

高壓郡西城。觀風不浪名。山川千里色。語笑萬家聲。碧寺煙中靜。紅橋柳際明。登臨豈劉白。滿目是詩情。

中吳紀聞子城之西舊建樓其上名觀風在唐但謂之西樓白樂

天有西樓命宴詩後改爲觀風今復名西樓矣公作守時賦詩

虎丘

昔見虎耽耽。今爲佛子巖。雲寒不出寺。劍淨未離潭。幽步羅垂徑。高禪雪閉菴。吳都十萬戶。煙瓦徧東南。

木蘭堂

堂在郡治。後唐張搏自湖州刺史移蘇州。於堂前大植木蘭花。當盛開時。燕郡吏詩客。

堂上列歌鐘。多慚不如古。卻羨木蘭花。曾見霓裳舞。自注。白樂天爲蘇州刺史。常教此舞。

野色

非煙亦非霧。冪冪暎樓臺。白鳥忽點破。殘陽還照開。肯隨芳草歇。疑逐遠帆來。誰會山公意。登高醉始回。

林下偶談。范文正此詩。不下司馬池行色之

作。梅聖俞所謂寫難狀之景。如在目前也。

芝山寺

在廬山。

樓殿冠崔嵬。靈芝安在哉。雲飛過江去。花落入城來。得食鴉朝聚。聞經虎夜回。偶臨西閣望。五老夕陽開。

饒州作

三出邊城鬢似絲。齋中瀟灑過禪師。每疎歌酒緣多病。不負雲山賴有詩。半雨黃花秋賞健。一江明月夜歸遲。人閒禍福何須道。問著衰翁也自知。

送鄞尉竇君

片帆飛去若輕鴻。一霎春潮過浙東。王謝江山久蕭索。子真今爲起清風。

送丁司理赴明州

仙家枝葉令威孫。南去司刑庇越民。金闕道書微旨。在獄多陰德。是真人。道書謂升真者皆須曾爲獄官。

瀟灑桐廬郡

瀟灑桐廬郡。烏龍山靄中。使君無一事。心與白雲空。
瀟灑桐廬郡。家家竹引泉。令人思杜牧。無處不潺湲。
瀟灑桐廬郡。全家長道情。不過歌舞事。繞舍石泉聲。

嚴陵祠

瀟灑桐廬郡。嚴陵舊釣臺。江山如不勝。光武肯教來。以上范文正公集。

漢包六合網英豪。一箇冥鴻惜羽毛。世祖功臣三十六。雲臺爭似釣臺高。湘山野錄。

北固樓

北固高樓海氣寒。使君應此凭闌干。春山雨後青無數。借與淮南子細看。方輿勝覽。

桐廬方正父家。藏唐翰林畫白芍藥。予來領郡事。因獲一見。感歎久之。題二十八字。景祐元年十月七日。

治亂興衰甚可嗟。徒憐水調訴榮華。開元盛事今何在。尚有霓裳寄此花。困學齋雜錄。

滕宗諒

宗諒字子京。河南人。大中祥符八年進士。從泰州軍事推官。召試學士院。改大理寺丞。歷左司諫。出知湖鏡岳蘇四州。

贈回道士

華州回道士。來到岳州城。別我遊何處。秋空一劍橫。

東軒筆錄。宗亮謫守巴陵郡。有華州回道士上謁。風骨聳秀。神宇清邁。膝知爲異。人口占一詩贈之。

遊茅山

句曲山中古洞天。金堂玉室地相連。方當蘧子知非日。已過茅君得道年。鎮江府志。

王益

益字舜良。臨川人。荆公之父。祥符八年進士。任蜀之新繁令。至都官員外郎。

和梅公儀留題重光寺羅漢院贈憲上人

曉剝吟髭雪半零。海窗曾咒鉢龍醒。早同西竺能持法。應笑南僧不會經。雲氣晝閑侵塵柄。薜痕春老上銅瓶。近來禪觀都無語。手指餘花滿寺庭。成都文類。

詹中正

中正。衢州人。大中祥符八年甲科。時稱詹白雲。

退居

宦情文思競闌珊。利戶名樞莫我關。無可奈何新白髮。不如歸去舊青山。須知百歲都爲夢。未信千金買得閑。珍重尊中賢聖酒。非因風月亦開顏。

句

吟餘妓散杯中酒，歸去蜨隨頭上花。以上瀛奎律髓

田 況

況字元均，冀州信都人。舉進士甲科，復舉賢良方正。累遷右正言，知制誥，以右諫議大夫知成都府。召爲御史中丞、樞密使，終尚書右丞，贈太子太保，諡宣簡，有金巖集。

琴堂

西漢文章世所知，相如閎麗冠當時。遊人不賞凌雲賦，只說琴堂是故基。

成都遊樂詩

元日登安福寺塔

歲歷起新元，錦里春意早。詰旦會朋筵，夷遊僕騶導。像塔倚中霄，翬檐結重櫺。隨俗縱危步，超若薄清昊。千里如指掌，萬象可窮討。野闢山勢迴，寒餘林色老。遨賞空閭巷，竭來喧稚耄。人物事多閑，車馬擁行道。顧茲歡娛俗，良慰羈遠抱。第念民政疎，無庸答宸造。

二十八日謁生祿祠遊淨衆寺

千騎出重闈，嚴祠淨宇鄰。映林沽酒旆，迎馬獻花人。豔日披紅霧，香颺起路塵。韶華特明媚，不似遠方春。

三月三日登學射山

麗日照芳春，良辰重元巳。陽濱修祓除，華林程射技。所向或不同，從俗亦足喜。門外盛車徒，山半列酈市。彩棚飛鏑遠，醉席歌聲起。回頭望城郭，煙靄相表裏。秀色滿郊原，遙影落川澗。目倦意猶遠，思餘情未已。

登高貴能賦。感物暢幽旨。宜哉賢大夫。由斯見春美。

四月十九日汎浣花谿

浣花溪上春風後。節物正宜行樂時。十里綺羅青蓋密。萬家歌吹綠楊垂。畫船疊鼓臨芳渚。綵閣凌波汎羽卮。霞錦漸曛歸櫂促。滿城懽醉待旌旗。以上成都文類

種放

放字明逸。洛陽人。隱終南山之豹林谷。後以薦授左司諫。累遷諫議大夫。辭歸。大中祥符八年。終工部侍郎。有集。

湘山野錄。真宗初。詔種隱君至闕。以數對稱旨。日既高。中人送中書膳。諸相皆盛服以俟。種至。止長揖而已。楊大年以詩嘲之。曰。不把一言裨萬乘。祇又雙手揖三公。上聞之。獨召楊曰。知卿有詩戲種某。安知無一言裨朕乎。出一阜囊。內有所奏十議。俾觀之。

大年

澄懷錄。種明逸嗜酒。嘗種秫自釀。曰。空山清寂。聊以養和。自號雲谿醉侯。詩話總龜。太平興國中。李繼遷以西夏叛。朝廷興師。迨十餘年。至咸平末。章聖有厭兵之意。處土種放在山中有詩云。胡雛負恩信。聖主耽干戈。章聖聞之。卽遣使召至。授左司諫。會景德初。繼遷死。其子德明願納款。遂罷兵。放拜官復歸。終南。終于工部侍郎。

瀟湘感事

離離江草與江花。往事洲邊一歎嗟。漢傅有才終去國。楚臣無罪亦沈沙。淒涼野浦飛寒雁。牢落汀祠聚

晚鴉無限清忠歸浪底。滔滔千頃屬漁家。古今詩話。

寄二華隱者

我本厭虛名。致身天子庭。不終高尚事。有媿少微星。北闕空追悔。西山羨獨醒。秋風舊期約。何日去冥冥。
老學菴筆記。

夏日山居

陰陰林木靜。寂寂無人境。紅綻紫葳香。嵐沈玉膏冷。看雲時獨坐。慎事當中省。何客馭風來。新篁動疎影。
宋文鑑。

無題

丹樓縹緲路歧傍。共說祈眞白玉堂。珠樹風高低絳節。靈臺香冷醮虛皇。名傳六合何昭晰。事隔三清限渺茫。欲識當年漢家意。竹宮梧殿更淒涼。玉照新志。

黃康弼

題廣化寺阿育王塔

齊野非吳渚。支郎是子陵。釣臺千古月。寶塔萬年燈。

千鈇齊乘。阿育王塔在臨淄城西。唐太和中建寺。五代無棟。僧道圓居之。與宋太祖有舊。加號蓋國大師。塔增爲十二級。祥符中更名廣化寺。黃康弼詩云。

李湛

湛大、中祥符開祕書監。

永慶寺在常熟。

巖扉開早涼，谷鳥分遠翔。花氣溼幽徑，磬聲清上方。雲生松澗底，花落蘚池傍。致有遺榮意，移時坐石牀。
吳郡志。

破山興福寺在常熟，卽常建題詩處。

雲門十里長，殿塔明朝陽。半夜風雨至，滿山松桂香。清猿嘯遠樹，好鳥鳴虛廊。塵纓斷可濯，胡爲語滄浪。
破山寺志。

龍昌期

昌期字起之，陵州人。祥符中遊京師，明鑄奏授太子洗馬，明堂汎恩改殿中丞，有竹軒小集。

宋史劉敞傳：蜀人龍昌期，著書傳經，以詭辭惑衆。文彥博薦諸朝，賜五品服。敞與歐陽修俱曰：昌期違古畔道，學非而博，王制之所必誅，未使卽少正卯之刑已幸矣。又何賞焉？乞追還詔書。昌期聞之懼，不敢受賜。

三山卽事

百貨隨潮船入市，萬家沾酒市垂帘。蒼煙巷陌青榕老，白露園林紫蔗甜。
翰墨大全。

蘇爲

爲祥符開知邵武軍，又嘗知宣州、湖州。

湖州作

野艇閑撐處。湖天景亦微。春波無限綠。白鳥自由飛。柳色濃垂岸。山光冷照衣。時攜一壺酒。戀到晚涼歸。

青箱雜記爲湖州詩數

十首。惟此篇足爲絕唱。

宣城花

宣城花疊嶂。樓前蒨綺霞。若非翠露陶潛宅。卽是紅藏小謝家。

青箱雜記。爲在宣城有詩十首。皆以

宣城爲目。內宣城花一首。尤爲清麗。

邵武作

愛重八九月。登臨高下樓。林紅雲白處。寒瀨泊漁舟。同上。

句

夜浪珠還浦。春泥象印蹤。送劉端州。楊文公談苑。

賈同

同字希得。臨淄人。舉進士。除大理評事。通判兗州。累遷殿中丞。知棣州。卒。門人私謚存道先生。

示蔡通判

聖君恩重龍頭選。慈母年高鶴髮垂。君寵母恩俱未報。酒如成病悔何追。

合璧事類。蔡文忠公齊喜酒飲量過人。既登第。通判濟州。日飲醉。往往至醉。是時太夫人年已高。頗憂之。一日買存道先生過濟文忠館之數日。先生愛文忠之賢。慮其以酒廢學生疾。乃爲詩示文忠云云。文忠瞿然起謝。自是非親客不對酒。終身未

嘗至
醉

方仲荀

仲荀、祥符中、以尚書屯田員外郎、知蘇州。

虎丘

海涌起平田、禪扉古木閑、出城先見塔、入寺始知山、堂靜參徒散、巢喧乳鶴還、祖龍求寶劍、曾此鑿屏顏。

吳郡志

陳綱

綱、太常博士、知晉州。

留題霍山應聖公廟 石刻在霍州。

峻極巍峨勢望雄、層巒疊嶂翠重重、爲神有感興唐祚、作鎮無疆福晉封、材產十州資構廈、泉分數邑潤耕農、幽巖舊榻高人隱、絕頂遺墳古帝蹤、欲雨片雲生峭壁、未明先日照危峯、斷崖當午晴雷震、深壑經秋積靄濃、樵去每逢游洞鹿、僧禪時見戲潭龍、名光祀典傳千載、御祝牲牢致享恭、
大中祥符五年六月二十
五日、尚風軍判官鄭世卿書、栗再興刻字。 求古錄。

趙宗萬

宗萬、字仲困、越州人、大中祥符閒、詔舉遺逸、被召不起。

句

斗懸金印心難動。屏列春山眼暫開。

萬姓統譜。趙宗萬築室于越郡之照水坊。左瞰平湖。前挹秦望。畜一鶴號丹砂。引以爲侶。讀書鼓琴。怡然自適。祥符中。詔舉遺逸。郡守康戩以宗萬薦。尋被召。因獻跛鼈傳以自見。且請自託于道家者流。朝廷不奪其志。卽其家賜以羽服。後十餘年卒。嘗

爲詩

五五

宋詩紀事卷九

錢唐 厲鶚 緝
祁門 馬曰瑄 同緝

蘇耆

耆字國老。易簡子。大中祥符間。以父任仕至工部郎中。直集賢院。

題虎丘

虎踞標靈跡。危樓杳靄閒。劍池沈石壁。金地湧秋山。塔映松軒斷。雲迷蘚逕斑。磬隨靈籟盡。鶴伴老僧閑。
有句慚先哲。無辭愈厚顏。我來聊寫望。頓覺離人寰。虎丘志。

王初

初宋初人有歌詩一卷。

文獻通考陳氏曰初有延平天慶觀詩當是祥符後人。

青帝

青帝邀春隔歲還。月娥孀獨夜漫漫。韓憑舞羽身猶在。素女商弦調未殘。終古蘭巖棲偶鶴。從來玉谷有離鸞。幾時幽恨飄然斷。共待天池一水乾。

書秋

千里南雲度塞鴻。秋雲無跡淡平空。人閒玉嶺清霄月。天上銀河白晝風。潘賦登山魂易斷。楚歌遺佩怨何窮。往來未得如張翰。欲鱸霜鯨碧海東。

自和書秋

隴首斜飛避弋鴻。頽雲蕭索見層空。漢宮夜結雙莖露。閭闔涼生六幕風。湘女怨弦愁不禁。鄂君香被夢難窮。江邊兩槳連歌渡。驚散遊魚蓮葉東。

春日詠梅花

靚妝纔罷粉痕新。迢遞風回散玉塵。若遣有情應悵望。已兼殘雪又兼春。

卽夕

風幌涼生白袷衣。星榆纔亂絳河低。月明休近相思樹。恐有韓憑一處棲。

舟次汴堤

曲岸蘭叢鴈飛起。野客維舟碧煙裏。竿頭五兩轉天風。白日楊花滿流水。以上宋藝圃集。

任玠

玠字溫如。蜀人。大中祥符末。以凌公策薦入京。進龍圖紀聖詩一千韻。酬以汝州團練推官。三讓。乞授一子官。

題黃休復茅亭

聚散榮枯一夢中。西歸親友半成空。唯餘大隱茅亭客。垂白論交有古風。茅亭客話。

魯宗道

宗道字貫之。亳州譙人。舉進士。爲海鹽令。天禧元年。擢右正言。神宗卽位。累拜右諫議大夫。參知政事。遷禮部侍郎。卒。贈兵部尙書。諡簡肅。

登黃山

三十六峯凝翠靄。數千餘仞鎖嵐煙。軒皇去後無消息。白鹿青牛何處眠。

蓮花源

花開十丈照峯頭。露褪紅衣爛不收。太乙眞人多逸興。穩眠一葉汎中流。以上黃山志。

賈昌朝

昌朝字子明。獲鹿人。天禧初。召試。賜同進士出身。慶歷閒。拜同中書門下平章事。英宗卽位。加左僕射。進封魏國公。卒。諡文元。有集。

題文潞公曲水園鶚按。此詩風月堂詩話作晁迥。

畫船載酒及芳辰。丞相園林潁水濱。虎節麟符拋不得。卻將清景付閑人。

石林詩話。曲水園在許昌城北。有大竹三十餘畝。潁河貫其中。以入西湖。最爲佳處。初爲本州民所有。文潞公爲守。買得之。潞公自許移鎮北門。而文元爲代。一日挈家往遊。題詩壁閒云云。遂走使持寄北門。潞公得之大喜。卽以地券歸賈氏。文元亦不

辭而受。後文元居京師。亦不復至。園今荒廢。竹亦殘毀過半矣。

凌霄花

披雲似有凌霄志，向日寧無捧日心。珍重青松好依託，直從平地起千尋。全芳備祖。

王贊

贊字至之，廬陵太和人。天禧三年進士，慶歷中官殿中侍御史，歷戶部侍郎致仕。

過吳江

吳江秋水灌平湖，水闊煙深恨有餘。因想季鷹當日事，歸來未必爲蓴鱸。中吳紀聞。

蘇紳

紳字儀父，晉江人。天禧三年進士，仁宗朝累官吏館修撰，擢知制誥，翰林侍讀學士，集賢殿修撰。

出知河陽卒。

金山寺

九派江流涌化城，登臨潛覺骨毛清。僧依玉鑑光中住，人踏金鼉背上行。鍾阜雲開春雨霽，海門雷吼夜

潮生。因思絕頂高秋夜，四面雲濤浸月明。鎮江府志。

王達

達，濮陽人。天禧三年進士，官刑部郎中。

句

下臨廣陌三條闊，斜倚危樓百尺高。

詩話總龜。福唐有老嫗當爐。有舉子謂曰。吾能與爾致數十千。乃令嫗作酒帘。題句云。太守王祠部。遠見之大喜。呼嫗與錢五千。乃王公咏酒旗詩。平生最得意者。

鄭修

吳郡人。天禧三年進士。

玉簪花

玉色瓷盆綠柄深。夜涼移向小窗陰。兒童莫訝心難展。未展心時正似簪。全芳備祖。

余弼

題慧悟禪師上方禪師。天禧中居錢塘月輪山。

孤峯牢落幾何年。臺殿於今插半天。已是精藍誇絕徼。更將寶塔在危顛。煙霞色任陰晴變。鐘磬聲隨上下傳。珍重老僧無別境。一生幽趣只山川。咸淳臨安志。

曹汝弼

汝弼字夢得。其先青州人。南唐時。徙歙之休寧。祥符天禧間。高蹈有聲。與魏野。潘閔。林逋。善。有海寧集。

再寄披雲峯誠上人

江城從別後。聞說在松閒。度日長扃戶。終年不下山。靜爲詩所役。閑免事相關。應喜雲邊客。冥搜鬢未斑。喜友人過隱居。

忽向新春裏，閑過隱士家。旋收松上雪，來煮雨前茶。禽換新歌曲，梅妝隔歲花。應慚非遁者，難久在煙霞。

贈披雲峯岳長老

禪外掩松扃，閑眠度歲陰。雨侵香篆溼，苔長屐痕深。水在銅瓶冷，雲歸玉磬沈。前山有靈藥，時策杖藜尋。
以上瀛奎律髓

宋 綬

綬字公垂，趙州平棘人。以外祖楊徽之遺恩，授太常寺太祝。真宗召試學士院，爲集賢校理。仁宗朝，歷兵部尙書，參知政事。卒，贈司徒兼侍中，諡宣獻。有文館記事外制禁林甲乙祕殿遺札七集。上元以修史促成書特免扈從，因賦

屬官不得陪春豫，結客何妨事夜遊。還勝南宮假宗伯，黃扉深鎖暗登樓。

蔡寬夫詩史故事：春試進士，皆在南省中東廂，刑部有樓甚寬壯，旁視宣德門，直抵州橋鎖院，每以正月五日至元夕，例未引試，考官往往竊登樓，以望御路燈火之盛。宋宣獻公在翰林時，上元以修史促成書特免扈從，嘗賦詩云：蓋謂此也。至嘉祐中，歐陽文忠公知舉，梅聖俞作莫登樓詩，請公相與唱和，自是遂爲禮闈一盛事。

送何水部蒙出牧袁州

梧楸初謝楚天涼，新見腰閒換印囊。漁浦霧濃枕疊鼓，潞江風急下危檣。帝城雲表瞻龍首，故國星邊認劍光。退食齋中多燕喜，暖泉春釀泛瑤觴。
袁州府志

句

奇材劍客當前隊，麗賦騷人託後車。皇朝類苑。

江涵帝子翬飛閣，山際眞君鶴馭天。

優古堂詩話：豫章事實，王子安序之詳矣。題咏此邦者，往往探之。晏元獻云：望斗氣沈龍已化，置芻人去榻猶懸。陶雍州云：劍待張華時已晚，榻延徐孺禮應疎。此二聯全是龍光射牛斗之墟。徐孺下陳蕃之榻也。宋綬公垂云云，不襲陳跡，甚可佳也。

憶昔唐家局禁地，紛壁曲龍聞曩記。承明意義今頓還，永與鑾坡爲故事。

蔡寬夫詩史：學士舊院，與宣徽院相鄰。玉堂兩壁，有巨然畫山、董羽畫水。宋宣獻爲學士時，燕穆之復寫六幅山水屏，寄之遂置於中間。宣獻詩云云。唐翰林壁畫海曲龍山，故引用之。

薛奎

奎，字宿藝，絳州正平人。進士及第，累官龍圖閣待制，權知開封府。仁宗朝，授樞密直學士，知益州。召拜參知政事，罷爲資政殿學士，卒。贈兵部尚書，諡簡肅，有集。

詩話總龜：薛簡肅公，尹開封，以嚴爲治，謂之薛出油。其後牧成都，歲豐人樂，作春遊好十首，自號薛春遊，欲換前稱也。

寄金繩院正因大師

僧中憶藝本超羣，釋氏蒙求見討論。儒行合爲文暢侶，詩名雅作貫休孫。心燈久已傳宗意，命服仍嘗錫帝恩。宴坐栴檀消篆字，眼前闍闍任鶯喧。成都文類。

龐籍

籍字醇之。單州武成人。舉進士。仁宗時爲侍御史。歷天章閣待制。元昊反。爲陝西安撫使。召拜樞密使。同中書門下平章事。加觀文殿大學士。以太子太保致仕。封穎國公。薨。贈司空。諡莊敏。有清風集。子元英。朝散大夫。著文昌雜錄。

司馬溫公序略公性喜詩。雖相府機務之繁。邊庭軍旅之急。未嘗一日置。凡所以怡神養志。及逢時值事。一寓之於詩。

東軒筆錄。陳文惠與龐穎公同戊子生。陳已貴。龐尙爲小官。嘗戲龐曰。君乃小戊子耳。後穎公大拜。文惠致書賀曰。今日大戊子。卻爲小戊子矣。穎公笑之。

記異

冬至子時陽已生。道隨陽長物將萌。星辰賜告銘心骨。願以寬章輔至平。

南窗紀談。莊敏公帥延安日。因冬至奉祠家廟齋居。中夜恍忽間。見天象成文。云龐某後十年作相。當以仁佐天下。凡十三字。駐視久之方滅。公因作詩記之。

句

田園貧宰相。圖史富書生。退老作。歷代吟譜。

陳執中

執中字昭譽。南昌人。眞宗朝。以父恕任祕書省正字。上建儲議。擢右正言。皇祐初。累官吏部尙書。

同中書門下平章事。拜司徒。岐國公。卒。贈太師兼侍中。諡曰恭。

東軒筆錄。陳恭公初罷政事。判亳州。年六十九。遇生日。族親往往獻老人星圖。以爲壽。獨其姪世修獻范蠡五湖圖。且贊曰。賢哉陶朱。霸越平吳。名遂身退。扁舟五湖。恭公喜甚。即日上表納節。明年累表求退。遂以司徒致仕。

御溝柳

一度春來一度新。翠光長得照龍津。君王自愛天然色。恨殺昭陽學舞人。

東軒筆錄。陳恭公以衛尉寺丞。知梧州。驛遞上疏。以乞立儲貳。真宗嘉其敢言。翊日臨朝。袖其疏以示執政。歎獎久之。召爲右正言。然爲王冀公所忌。一日真宗賦御溝柳詩。宣示宰相。兩省皆和進。恭公因進詩云云。

惠安縣齋咏梅

去年邊上見梅花。醉眼淹留未到家。今日嶺南攀折得。忽驚身又在天涯。泉州府志。

夏 竦

竦字子喬。江州德安人。以父死事補官。真宗朝。舉賢良。除光祿丞。仁宗朝。累擢知制誥。拜同中書門下平章事。封英國公。後改封鄭。卒。贈太師中書令。謚文莊。有集。

江州琵琶亭

年光過眼如車轂。職事羈人似馬銜。若遇琵琶應大笑。何須涕泣滿青衫。中山詩話。

知杭州到任寄執政

造化平分荷大鈞。腰閒新佩玉麒麟。南湖不住栽桃李。擬伴沙禽過十春。

題睢陽

海鴈橋邊春水深。略無塵土到花陰。忘機不管人知否。自有沙鷗信此心。以上湘山野錄。

詠藏擲

舞拂跳珠復吐丸。遮藏巧技百千般。主公端坐無由見。卻被傍人冷眼看。

墨客揮犀。丁晉公與夏英公會宴齋宮。伶人有雜手技號藏擲者。

在焉。丁願夏曰。古無咏藏擲詩。內翰可作一首。卽席獻詩云云。

登通州狼山

侍父監通州狼山鹽場作。時年十七。

渡口人稀黯翠煙。登臨嘗怯夕陽天。殘雲右倚維揚樹。遠水南回建業船。山引亂猿啼古寺。電驅甘雨過閑田。季鷹死後無歸客。江上鱸魚不直錢。灑水燕談。

應廷試

殿上袞衣明日月。硯中旗影動龍蛇。縱橫禮樂三千字。獨對丹墀日未斜。

青箱雜記。夏竦試制科廷對出。楊徽之見其年少。遽邀與語曰。老夫他則不知。唯喜吟咏。願丐賢良一篇。以下他日之志。夏忻然爲書此作。

再徙西都詠青雀寄張昇諫院

弱羽傷弓尙未完。孤飛誰敢擬鴛鴦。明珠自有千金價。莫爲遊人作彈丸。古今詩話。

上元應制

魚龍曼衍六街呈。金鎖通宵啓玉京。冉冉遊塵生輦道。遲遲春箭入歌聲。寶坊月皎龍燈淡。紫館風微鶴
燄平。宴罷南端天欲曉。迴瞻河漢尙盈盈。詩話總龜

國清寺

穿松渡雙澗。宮殿五峯圍。小院分寒水。虛樓半落暉。葉從金地下。雲向玉京飛。欲問西來意。誰傳智者衣。

桐柏觀

鳥道寒藤結。洞門蒼蘚深。樓臺在山畔。松檜出雲心。土暖春長在。峯高月易沈。羽衣祠太乙。香冷石壇陰。
以上天台山志。

句

山勢蜂腰斷。溪流燕尾分。

東軒筆錄。夏鄭公竦。以父歿王事。得三班差使。然自少好讀書。工爲詩。一日攜所業。伺宰相李文靖。沈退朝。拜於馬首而獻之。文靖讀其句。深愛之。翊日袖其詩呈真宗。及敘死事之後。乞與換文資。遂改潤州金壇主簿。

野花無主傍人行。嘉祐雜志。

張瓌

瓌字唐公。洎之孫。舉進士。召試學士院。賜第。累擢知制誥。進翰林侍讀學士。出知濠州。

寄題徑山懷郎簡侍郎

天地一洲渚。北平南。敲危幽。并深以厚。江浙清且奇。武林頗幽秀。川匯仍山卑。應接殫天巧。類非人力爲。

徑山最佳處。有巖稱玉芝。居防俗士駕。地乃賢人宜。郎公留名德。平時爲羽儀。引年歸故里。不復衣朝衣。留侯黃石心。白傅香山期。結宇名勝外。日與塵事違。泉石景物狀。盡在諸賢詩。伊余來東藩。濫持使者麾。平生愛山水。弗憚命駕之。當候秋風高。遠造巖下扉。澣濯纓上塵。散步松閒碁。未能繼高躅。聊用慰所思。
宋文鑑

畢田

田長沙人。眞宗朝。以吏部郎兼王府侍講。奏蠲臨湘七都科調。里人德之。因祀焉。曾撰湘中故事。朱陵洞水簾。

洞門千尺挂飛流。玉碎珠簾冷噴秋。今古不知誰卷得。綠蘿爲帶月爲鉤。

凝碧亭 在南岳石橋上。

四面山屏疊萬重。古嵐濃翠鎖寒空。清秋獨倚危闌立。身在琉璃世界中。

石霜寺 石霜寺在瀏陽縣南八十里。有崇勝禪院。昔普會禪師居乘千餘名。其堂曰枯木。蓋取其寡寂也。廉使丞相裴公嘗親枉大旆詣之。留玉環象笏於此。迄今存焉。

石上泉華噴猛霜。境奇因此闢禪坊。使君環笏留何用。枯木千餘滿一堂。

香水 湘中別記云。在縣郭內。其水甚香。昔年嘗貢此水。民多困弊。齊末因罷。以板覆之上。起塔。至今存。湘鄉本謂之湘香。蓋由此

而名。

坎上浮圖已拂天。椒蘭餘馥尙依然。九重無復修常貢。空有香名與邑傳。以上湘中故事。

穆脩

脩字伯長。鄆州汶陽人。真宗東封。詔舉齊魯經行之士。預選。賜進士出身。調海州理掾。忤監郡。坐削籍。隸池州。遇赦。敍潁州文學參軍卒。自五代文敝。至脩始獨爲古文。有穆參軍集。

江南寒食

江城水國春光饒。清明上巳多招要。花陰連絡青草岸。柳色掩映紅闌橋。歌調嘔啞雜吳俗。髻鬢疎削傳南朝。誰憐北客歸未去。楚魄湘魂唯暗消。

燈

黯黯有時當永恨。依依何處照閑眠。靜臨客枕愁寒雨。遠出漁篷耿暝煙。纖影乍敲還自立。冷花時結不成圓。銷魂猶憶江樓夜。曾對離觴賦短篇。

和茅秀才江墅幽居好

江墅幽居好。溪山數里長。徑通茶塢綠。門帶橘園香。藉石還勝榻。聽松不讓簧。閑遊驚里巷。自作隱淪裝。
以上穆參軍集。

貴侯園

名園雖自屬侯家。任客閑遊到日斜。富貴位高無暇出。主人空看折來花。
以上穆參軍集。

張觀

觀字思正。絳縣人。中服勤辭學科。爲祕書郎。仁宗朝。歷官同和樞密院事。以觀文殿學士知許州。卒贈吏部尙書諡文孝。

句

保心如止水。爲行見眞書。

歷代吟譜張思正平生

未嘗草書因自爲詩

薛田

田字希稷。河中河東人。舉進士。歷益州轉運使。累擢龍圖閣待制。樞密直學士。知益州。遷右諫議大夫。知同州。

成都書事一百韻并序

金躔輿壤。玉壘名區。風物尙饒。曠古稱最。僕守茲職任。五年再至。初則木牛流馬。馳八使以均財。次則阜蓋朱轡。奉一麾而作鎮。歷覽勝異。慷慨興懷。古人曰。非感發不可以言詩。非聲詩不可以導志。故言成志激。流爲美談。偶因公退。輒作成都書事七言一百韻。止陳乎益都事蹟。罔暇以外景加諸。庶幾謬發於斐然。詎敢芳揚於作者。詩曰。

混茫丕變造。西阡物像熙。熙被一川。易覺錦城銷白日。難歌蜀道上青天。雲敷牧野耕桑雨。柳拂旗亭市

井煙院鎖玉溪留好景。坊題金馬促繁弦。風流鋪席堆紅豆。瀟灑門庭映碧鮮。表狀屢言同穎穗。敕書頻
獎竝生蓮。旋科杞樹吹香稻。剩種碗巢沃晚田。仁宅不隳由政立。議闡無取任情遷。民知禮遜蠶叢後。俗
尚奢華邃古先。邊郭波濤來浩浩。歸朝歧路去綿綿。乍回黑水將成道。潛到青羊恐遇仙。靚女各攻翻樣
繡。衽商兼制研絃。塢邊泛蟻張翥幄。江上鳴鼉蒨綵船。石筍峻嶒衙對峙。琴臺恢闊寺相連。羣葩豔裏
珍禽語。百草香中瑞獸眠。喜趣必臻尤佇望。勝遊爭倦更遷延。早荷葉底蹲鴟伏。櫻樹梢頭亂蛙穿。巖發
牢盆渾棄鹵。鐵資圓法免胚鉛。豐饒物態寧殊越。美麗姝姬酷類燕。西海號雄彰傳紀。南康辭健積銘鐫。
良工手技高容學。妙隱丹方祕不傳。倚劍靈關凌絕頂。夢刀孤壘削危巔。金華巷陌遺三品。石鏡伽藍露
一拳。信落荊州隨鼓柁。檢頒芝闕聽搖鞭。若量內地寒暄異。且在遐陬水陸全。渝舞舊云傳樂府。巴談誰
曰繫言詮。九苞縮就佳人髻。三閩裝成子弟鞵。欲辨坤維尋地理。纔臨益部認郊廛。文翁室暗封苔蘚。葛
亮祠荒享豆籩。貨出軍儲推賑濟。轉行交子頌輕便。氣蒸蒹蕩弱根鬢。潤日罩榿楠樹影圓。藥寺風光蟲蟄
外。花潭遨樂鳴鶴前。聚源待擬求臯氏。貯怨那能雪杜鵑。叢植森榮還蕪蔚。夾流湍迅迴潺湲。鮮明機杼
知無算。細碎錐刀不啻千。合伴鴉鬢齊窈窕。對陪霓袖競翩翻。五門冷映岷峨雪。千里爰疏灌壩泉。茂盛
八紘宜得最高腴。十道比俱偏。袁滋不到生無分段。相重來宿有緣。款召相如登兔苑。驟遷太白步花輒。
葳蕤草木時爲瑞。奇秀江山代產賢。曉後細風紅灼灼。夜中微雨碧芊芊。錦亭燄燭明歌障。繡閣香毳熨
煖氈。寶塔徘徊停隼旗。觀街雜沓擁輜駟。醪釀引架家家郁。躑躅攀條處處妍。重愛魯儒提德柄。威降曹
將董戎旃。歡謠少負寶人勇。長講多經楚客禪。似蒨綺羅偏煥耀。如流車馬倍喧闐。搗機顯綽名堪錄。題

柱芬芳事莫捐。李特鋒鋌徒恃險。張儀規畫自持顛。鷹揚器業成悠久。烏合姦雄敗轉旋。漫向鼎分澄霸道。却當龜化驗都鄴。強貪楚滅悲傾轍。廣洽堯詢喜慕羶。側弁猖狂拋玉墜。歸鞍酩酊墮金鈿。氛埃屏息雲常覆。稼穡繁滋澤靡愆。睿聖宵衣垂乃睠。貴臣馳驛每傳宣。石牛邁路加歆饗。江瀆隆區助潔蠲。避暑亭臺珍簟設。縱開池沼釣絲牽。遮蠻帶礪長能固。捍蜀金湯遠益堅。何武甲科曾繼踵。嚴真卜兆罕差肩。儲書競甲諸家集。博識咸修百氏箋。紙碓暮春臨岸澣。水樽春注截河壩。華嚴像閣涼堪愛。淨衆松溪僻可憐。學射崔嵬橫罨靄。放生寬廣媚漪漣。蘇庭嫩筍青蓂蓂。風檻新荷綠扇扇。守戍貔貅千萬騎。采葑簪笏兩三員。清江瀉勢方流巽。大面盤形正壓乾。電掃谷風藏虎嘯。雷瞋官樹灑龍涎。郤占遯應星舒彩。爨喫端聆火撲然。令範式驅民缺缺。咨謀疇倚道平平。性寒甘蔗獠偷齧。體膩芭蕉蠹莫沿。誌讀備興重掩卷。史看唐幸嬾終篇。雕盤姪女呈酥作。水巷癡童颺紙鳶。初下城頭迷鄂杜。暫來犀浦誤伊瀍。變秦言語生皆會。戀土情懷死不悛。結厦斧斤宗簡易。入神丹腹厲精專。柳隄夜月珠簾捲。花市春風繡幕褰。十縣版圖分戶籍。一城牌肆係民編。受辛滋味饒薑蒜。劇饌盤飧足鮪鱠。月季冒霜秋肯挫。荔枝衝瘴夏宜然。幾番叢箐鳴虛籟。是箇園林噪癩蟬。蠢物乘時先養育。菁英屆候別陶甄。地丁葉嫩和嵐採。天蓼牙新入粉煎。平代啓闈聞繼岌。監軍憑軾見劉焉。蕙蘭馥裏幽蹊畔。菱芡交鋪曲島邊。繒網晚晴誇蹴鞠。畫繩寒食戲鞦韆。氤氳紫霧濛都邑。縹緲丹霞聚偃佺。螭伏自然銷劍戟。螻翻幾度起戈鋌。宦遊止歎音塵闕。鄉飲何驚歲月遄。靈壽桃枝奇共結。金沙銀礫貴相聯。埋輪昔按均輸命。叱馭今分太守權。徒爲行春飛皂蓋。詎能許國報青錢。政經旋考尤多僻。民瘼深求尙未痊。雖媿袴襦非叔度。日期毫墨有馮涓。僮遵廉察

思從訓克謹操修敢好畋。南市醉過攢幟隊。西樓歡坐列瓊筵。煩聽謹畏傷淳厚。惠黜周防近巧譎重祿。省心宜致寇。薄材莊貌若臨淵。扶危頗異巢居幕。勸善還同矢在弦。叨蒞一麾康遠俗。等閑光景又三年。
成都文類

王隨

隨字子正。河南人。舉進士。累擢知制誥。遷龍圖閣直學士。仁宗景祐中。拜門下侍郎同中書門下平章事。昭文館大學士。罷除彰信軍節度使。判河陽。卒。贈中書令。諡章惠。

題棲霞山房

虛窗殘燭明。敲枕旅懷清。永夜起松籟。半天疑雨聲。吟餘閑景象。道勝小榮名。鐘罷星河曙。悠悠迴旆旌。
金陵梵剎志。

臨終作

畫堂燈欲滅。彈指向誰說。去住本尋常。春風掃殘雪。
青箱雜記。

句

好客幾嫌州路僻。愛山長上郡樓高。
探春。水村煙暝早。山館夜寒多。
旅店。掃徑苔痕破。開扉竹影分。
中庭。吟

掌禹錫

禹錫字唐卿。鄆城人。中進士第。歷官直祕閣。英宗卽位。遷太子賓客。以工部侍郎致仕。卒。嘗預修

皇祐方域圖志及校正類篇本草圖經

句

風定落花深一寸。日高啼鳥度千聲。曉鶯林外千聲囀。芳草塔前一尺長。

過庭錄。掌禹錫博通子史百家。作證類本草。而訥於爲文。時賢頗以此鄙之。嘗作詩云。歐公謂忽作人言。

王洙

洙字原叔。應天宋城人。舉進士。官直龍圖閣。同判太常寺。坐事黜知濠州。徙襄州。召還。累遷翰林學士。改侍讀兼侍講學士。卒諡曰文。

題峴山石幢

襄陽南出大路奔。小山曰峴名特尊。山形卑墮不峻極。屹若巨首臨江濱。大山半宮不成霍。絕水闕左非爲壘。礧巖聳肩戴危石。箕踞曼衍羅芳蓀。漢流長驚濱其足。東望瀾池皆平原。槎頭下瞰罟罾集。蔡洲近眺田園蕃。何物茲山匪秀出。得使今古聞聽喧。自昔羊公好登覽。山名直爲賢者存。鹿門望楚鎮區境。鳳林冠蓋延山樊。丹巖翠壁互幽勝。日月虧蔽煙嵐屯。公胡遺彼而樂此。談者未始聊診論。吾謂聖達竟超豁。高覽便欲周乾坤。孔登泰山小天下。阮升廣武歎豎昏。會稽探穴禹書出。之罘望海雲濤翻。此中風景亦虛遠。極目見盡江山源。東吳未定勞機策。置酒嘯詠紓憂煩。數顧溫甫恤躬後。誓將百歲游精魂。對公盛德與山永。正唯湛輩如公言。今茲去公僅千載。凜然英氣猶軒軒。我來追古一長息。舊迹廢毀成悲吞。

民豪占山童其木嘉植不得容本根利取薪蘇積相釜粥之陶旌供燒燔羊公無廟忽不祀但縱淫鬼欲
牲繫中庭有碑卽墮淚至今觀者懷仁恩於民何誅不足問非民忘德由官愒下教里邑復祠宇敍諸祭
典躋之元思仁愛樹恭所芟禁止樵伐修墻垣且欲王命得守固謗言狀事馳九關書聞天子蒙報可金
石款刻垂後昆便民永念古遺愛勗爾風化常丕敦襄陽府志

呂夷簡

夷簡字坦夫先世萊州人祖龜祥知壽州遂家焉大理寺丞蒙亨之子宰相蒙正之猶子第進士
慶歷初拜司空平章軍國重事封許國公薨贈太師中書令諡文靖有集

陳直齋云呂文
靖詩清潤和雅

天花寺

賀家湖上天花寺一一軒窗向水開不用閉門防俗客愛閑能有幾人來老學庵筆記

江南立春

灰律何時應江春昨夜來細風先動柳殘雪不藏梅餘冷迷清管微和發凍醅閉門無客到樽俎爲誰開
宋文鑑

重遊雁山

往來遊海嶠上徹最高層雲外疑無路山中忽見僧虎蹲臨澗石猿掛半巖藤何日拋龜紐孤峯上再登

雁山志。

句

梅無驛使飄零盡。草怨王孫取次生。早春。人爲子推初禁火。花愁青女再飛霜。寒食。楊文公談苑。

范雍

雍字伯純。世居河東。父德隆葬河陽。因家焉。舉進士。爲洛陽簿。天聖中。累官樞密副使。元昊叛。拜鎮武軍節度使。知延州。左遷戶部侍郎。復吏部侍郎。知河南。遷禮部尚書。卒。謚忠獻。

紀西夏事

七百里山界。飛沙與亂雲。虜騎擇虛至。戍兵常忌分。嘯聚類宿鳥。奔敗如驚鷹。難稽守邊謠。應敵若絲棼。承平廢邊事。備預久已亡。萬卒不知戰。兩城皆復隍。輕敵謂小醜。視地固大荒。願因狂狡判。從此葺兵防。劇賊稱中塞。中塞。賊之勁悍者也。驅馳甲鎧精。昔惟矜突騎。今亦教攻城。伏險多邀擊。驅羸每玩兵。拘俘詢虜事。肉盡一無聲。

儒林公議。夏寇既敗。官軍劉平石元孫陷沒。延州幾至不守。雍日告朝廷益兵。復爲詩。以言賊事。凡數十章。其傳播者云云。蓋爲前屢得賊中諜者。雖斃其肉且盡。終無一言。故雍詩有云。初朝廷輕視元昊。邊臣奏請。不甚允從。至是方罪樞臣而逐之。

王奇

奇字漢謀。贛縣人。真宗時。官至殿中侍御史。

旅中有感一作秋興。

澤國來遊豈厭重。羈孤懷感自無窮。鴈聲不到歌樓上。秋色偏欺客路中。宿寺夢回蓮葉雨。渡江衣冷荻花風。誰憐未得青雲志。琴劍年年西復東。詩林萬選

續縣令題雁詩

隻隻銜蘆背曉霜。晝隨鴛鴦立寒塘。晚來漁櫂驚飛去。書破遙天字一行。

贛州府志。王奇少爲縣掾史。令題鴈詩一聯於屏風。奇密續後二句。令奇之。因激使學。後游京師。居李文靖沆客位。真宗臨奠。見屏開秋興詩。召對稱旨。特許殿試。賜第。奇作詩云。不拜春官爲座主。親逢八子作門生。官至殿中侍御史。

楊偕

偕字次公。中部人。舉進士。歷翰林侍讀學士。左司郎中。出知越州。改杭州。召爲右諫議大夫。以工部侍郎致仕。

郡舍偶書

偃息鈴齋度歲華。著書人盡笑聲牙。斯文自信驚天地。吾道誰知繫國家。獨愛杉篁寒不變。更憐江海闊無涯。因思朝市爭名地。何似優游刺史衙。宋文鑑

宋詩紀事卷十

錢唐厲鶚緝

祁門馬曰琯同緝

李淑

淑字獻臣。徐州豐人。少傳若谷子。年十二。獻文行在。真宗賜童子出身。授校書郎。景祐初。知制誥。除翰林學士。累官戶部侍郎。出知河中府。卒。贈尚書右丞。有李公詩苑類格及別集。

題周恭帝陵

弄楯牽車挽鼓催。不知門外倒戈迴。荒墳斷隴纔三尺。猶認房陵半仗來。

東軒筆錄。淑在翰林。奉詔撰陳文惠公神道碑。李爲人高亢少許可。文章尤尙奇澀。碑成殊不稱文惠之功烈文章。但云平生能爲二韻小詩而已。文惠子述古等懇乞改去二韻等字。答以已經進呈不可刊削。述古極銜之。會李出知鄭州。奉時祀于恭陵。作詩云。述古諷寺僧刻石。俄有以詩上聞者。學士葉清臣等言。本朝以揖遜得天下。而淑誣以干戈。仁宗亦深惡之。遂落李所居職。

題滑州麻

滑守如今是世官。阿戎出守自金鑾。郡人莫訝留題別。孫息期同住此看。

青箱雜記李復圭三世皆知滑州天聖中其祖康靖公若谷知慶歷中其父邯鄲公淑又知後八年復圭又知前此邯鄲公嘗迎侍康靖題詩于州廨云云後復圭刻石記其事曰仰承遺訓允弼冥兆茲亦異也

朱巽

巽揚州天長人真宗朝官至工部侍郎守雍州子壽昌因母劉被出棄官尋至同州得焉以孝聞天下

句

塞垣古木含秋色祖帳行塵起夕陽送劉綜學士出守井門 詩話總龜

成銳

銳許州臨潁人應制科高第嘗以詩獻王丞相隨

句

綵檻應無分春風不借恩野菊 詩話總龜

林垌

垌福州羅源人真宗朝特奏名有南華集

詠瑞檜

古殿當年欲葺時槎牙高檜礙簷椽人閒斤斧難容手上風雷爲轉枝烟色併來春益重月華饒得夜相宜吾皇一駐鑾輿賞從此聲名四海知

陳郁詩腴真廟朝寢殿側有古檜秀茂不羣名御愛檜然橫礙殿簷真皇意欲去之一夕風雷轉摺其枝因以爲瑞題詠者多唯羅源林垌唐律稱旨賜號南華翁詩名由此大顯

李 旼

旼蜀人與任介郭震爲莫逆交仕至尙書郎

送鈴轄館使王公

郤縠詩書奕世傳西人歌德別戎旃三朝功業標勳府四稔恩綏播蜀川耦射隔花聞破帖分題臨沼聞中筵歸朝聖旨愈僉望畿內封侯養重權成都文類

程 戡

戡字勝之陽翟人舉進士仁宗朝擢再知益州累官戶部侍郎樞密副使尋拜鄜延路經略安撫使英宗卽位召還道卒贈太尉諡康穆

送鈴轄館使王公

歸騎翩翩去路賒鬱蔥佳氣望天涯艱危劍閣三千里惠愛刀州十萬家龍尾道邊瞻日彩鹿頭關外別春華金明扈從宸遊處休憶連年泛浣花成都文類

靳 宗

送鈴轄館使王公

再任坤維報政成紫泥恩詔下神京搖鞭有客添歸興折柳何人不愴情杜宇江山經鳥道海棠池館憶

龜城尊前執手難收淚。投分從來比弟兄。成都文類。

王景

送鈐轄館使王公

四稔總兵鈐。輕裘叔子慙。抗稜遐徼伏。敦信遠民諳。赴召薰風布。離襟臘酒酣。吾皇思將帥。有意在江南。成都文類。

解程

送鈐轄館使王公

武帳推恩詔十行。雍容鳴玉覲清光。四年愛日民謠浹。五月炎風驛路長。劍閣煙雲迷去旆。柳營笳鼓慘離觴。浣花紙貴傳新集。留得詩名繼許昌。成都文類。

黃垆

送鈐轄館使王公

四年軍法表巴邛。歸騎俄乘紫漢風。家緒舊傳三棨貴。將材元蘊萬人雄。錦城離思雲容斂。山國行章旆影紅。到日定知新渥重。主寮今是黑頭公。成都文類。

姚渙

送鈐轄館使王公

家傳勳力世能賢。四載坤維領帥權。南詔酋豪彌款附。西州士庶賴蕃宣。輸忠感慨由誠府。接下恩勤自

意筌。月夕過從多命席。花時酬唱旋成編。雅歌餘暇軍容肅。陟狀升聞帝願延。馳驛遽趨三召節。執圭俄覲九重天。漢廷儀衛咸祇若。蜀郡名僚共黯然。賜對定應留晷刻。疇庸當便進班聯。聖神倚注期蕃錫。宥密崇高待九遷。下客塵勞遇知己。願言攀附跂英躔。成都文類

田瑜

送鈐轄館使王公

關外膺宸寄。坤維握虎兵。眞純逾璞玉。方重敵長城。肯構詩名著。承家將略明。四年凝茂績。一節促歸程。水際旌旗影。風前鼓吹聲。西州懷惠愛。北闕被恩榮。護衛親嚴近。雍容侍穆清。分攜暫銷黯。良會在神京。成都文類

高惟幾

惟幾、官殿丞。

送鈐轄館使王公

遊宦俱爲關外人。與君五看海棠春。園林選勝聯鑣徧。風月相思命駕頻。大旆先時辭蜀道。短轅何日見京塵。子牟又起離羣恨。欲操行祛重愴神。成都文類

海棠

故國庸岷外。孤根楚苑中。使梅休妒白。仙杏已饒紅。旋恐陽城破。尋憂下蔡空。幾時夢巫峽。獨立怨春風。海棠譜

張靖

送鈴轄館使王公

保塞昔年嘗閉壘。甘陵今歲又勞師。將軍鎮蜀功多少。不見干戈出虎皮。
玉勒嘶風出錦城。山光野色助離情。行行莫倦神華遠。芳草連雲伴去程。
成都文類。

范諷

諷字補之。齊州人。舉進士第。累官翰林侍讀學士。給事中。知兗州。遷光祿卿。

儒林公議。范諷性疎誕。嘗忤外計。求監舒州靈仙觀。莊獻太后臨朝。聞其俊邁。召拜諷官。好朋飲。高歌噉呼。或不冠幘。禮法之士深疾之。顏太初作東州逸黨詩以譏之。

題鼎州甘泉寺

平仲酌泉回北望。謂之禮佛向南行。烟嵐翠鎖門前路。轉使高僧厭寵榮。

湘山野錄。鼎州甘泉寺。介官道之側。嘉泉也。便于漱酌。行客未有不舍車而留者。始寇萊公南遷日。題于東檻曰。平仲酌泉。經此。回望北闕。黯然而行。未幾。丁晉公又過之。題于西檻曰。謂之酌泉。禮佛而去。後范補之安撫湖南。留詩于寺云。

題濟南城西張寺承園亭

園林再到身猶健。官職全拋夢乍醒。惟有南山與君眼。相逢不改舊時青。
能改齋漫錄。

石延年

延年字曼卿。一字安仁。其先幽州人。家宋城。真宗錄三舉進士爲三班奉職。歷太子中允。同判登

聞鼓院有集

歐公詩話曼卿卒後其故人有見之者云恍惚如夢中言我今爲鬼仙也所主芙蓉城欲呼故人往遊不得忿然騎一素驪去如飛其後又云降于亳州一舉子家父呼舉子去不得因留詩一篇與之余亦略記其一聯云鶯聲不逐春光老花影長隨日脚流。神仙事怪不可知其詩頗類曼卿平生語舉子不能道也。

詩林廣記石曼卿詩如

飢鷹乍歸。迅逸不可言。

隱居詩話石延年長韻律詩善敘事其他無大好處。壽筆驛銅雀臺留侯廟詩爲一集之冠。五言小詩如海雲含雨重江樹帶蟬疎平蕪遠更綠斜日寒無輝者幾矣。

桐江詩話曼卿一日春初見塔砌初生之草其屈如鉤而顏色未變因得一句云草屈金鉤綠未回遂作早春詩一篇旬日方成曰簷垂冰筋晴先滴草屈金鉤綠未回其不逮先得之句遠甚。

雞肋集曼卿以天聖四年來令金鄉故詩爲此邑人作者如題張

氏園亭詩云樂意相關禽對語生香不斷樹交花尤爲佳句也。

文獻通考張浮休評曼卿詩如飢雁夜歸廢冰秋拆俊爽有餘不可尋繹。

題孫可久別墅

南北霑河潤幽深在禁城。疊山資遠意讓俸買閑名。閉戶斷蛛網折花移鳥聲。誰人識高趣朝隱石渠生。

青箱雜記。仁宗廟內臣孫可久。賦性恬淡。年踰五十。卽乞致仕。都下有居第。堂北有小園。城南有別墅。每良辰美景。以小車載酒。僊遊自適。曼卿過其居。題詩云。

平陽代意一篇寄師魯

十年一夢花空委。依舊山河損桃李。雁聲北去燕西飛。高樓日日春風裏。眉比石州山對起。嬌波淚落妝如洗。汾河不斷天南流。天色無情淡如水。

灑水燕談。石曼卿。天聖寶元閒。以歌詩彖于一時。死後。故人關詠。夢曼卿曰。生平作詩多矣。獨常自以爲平陽代意一首。最爲得意。而世人罕稱之。能令予此詩盛傳于世。在永言耳。詠覺增廣其詞。隱度以迷神引聲韻。于是天下爭歌之。他日復夢曼卿。謝來。

下第偶成集句

一生不得文章力。欲上青雲未有因。聖主不勞千里詔。嫦娥何惜一枝春。鳳皇詔下雖密命。豺虎叢中也立身。啼得血流無用處。著朱騎馬是何人。

年去年來來去忙。爲他人作嫁衣裳。仰天大笑出門去。獨對春風舞一場。西清詩話。

曹太尉西師

仁者雖無敵。王師尙有征。獨乘金廐馬。都領鐵林兵。肅氣關河暮。屯烟部落晴。旗光秋曉合。甲色夜江橫。士喜擊中鼓。虜疑聞後鉦。無私乃時雨。不殺是天聲。濯濯前誰拒。堂堂彼自傾。寒踰博望塞。春宴隗囂城。

外使戎心伏。旁資帝道平。公還如畫像。爲贊學班生。

金鄉張氏園亭

亭館連城敵謝家。四時園色鬪明霞。窗迎西渭封侯竹。地接東陵隱士瓜。樂意相關禽對語。生香不斷樹交花。縱遊會約無留事。醉待參橫月落斜。以上宋文鑑。

籌筆驛

漢室虧皇象。坤乾未卽寧。姦臣與逆子。搖嶽復翻溟。權表分江城。曹袁鬪夏坵。虎奔咸逐逐。龍臥獨冥冥。從衆非無術。欺孤迺不經。惟思恢正道。直起復炎靈。管樂韜方略。關徐駭觀聽。一言俄遇主。三顧已忘形。南旣清蠻土。東期赤魏庭。出師功自著。治國志誰銘。歷劍兵如水。臨秦策若瓠。舉聲將潰虜。橫勢欲逾涇。仲達恥巾幘。辛毗嚴壁局。可煩親細務。遽見墮長星。戰地悲陵谷。來賢賞德刑。意中流水遠。愁外遠山青。想像音徽在。侵尋毛骨醒。遲留慕英氣。沈歎撫青萍。

中山詩話。石曼卿獨行京師。一豪士揖之曰。公幸過我。同入委巷。抵大第。歌舞歡醉。丐書爲揮籌筆驛數詩。以金帛數百千贈之。他日遇諸塗。又遺以白金數兩。謂曰。詩中意中流水遠。愁外遠山青。最爲佳句。

蘆蒲筆記。右驛在蜀中綿州。石曼卿爲諸葛武侯賦也。寶元二年。大書以遺朱復之。後二年。朱爲四明節度推官。遂刻石于廳事。

春陰

寒食少天色。春風多柳花。倚樓心目亂。不覺見樓鴉。前賢小集拾遺。

瀑布

飛勢挂嶽頂，無時向此傾。玉虹垂地色，銀漢落天聲。萬丈寒雲溼，千巖暑氣清。滄浪不足羨，就此濯塵纓。
詩林萬選

燈

迴鱗抱雙蒂，倒鳳吐丹榮。冰宇寒生暈，風疏動有聲。燼垂金藕細，影透玉荷清。斗帳依東壁，誰人夢不成。
合璧事類外集

南朝

南朝人物盡清賢，不是風流卽放言。三百年開卻堪笑，絕無人可定中原。
後村詩話

送人遊杭

激激霜風吹黑貂，男兒醉別氣飄飄。五湖載酒期吳客，六代成詩倍楚橋。水樹漸青含晚意，江雲初白向春嬌。前秋亦擬錢唐去，共看龍山八月潮。
咸淳臨安志

古松

宋趙師旻刻石在四明府治

直氣森森恥屈盤，鐵衣生澀紫鱗乾。影搖千尺龍蛇動，聲撼半天風雨寒。蒼蘚靜緣離石上，絲蘿高附入雲端。報言帝室掄材者，便作明堂一柱看。
至正四明續志

句

行人晚更急，歸鳥夕無行。天寒河響淡，山凍瀑聲微。水盡天不盡，人在天盡頭。草白有時榮，髮白

不再好。人生不如春。髮白不如草。弋下失冥鴻。網細遺巨鯤。風勁香逾遠。天寒色更鮮。秋天買不斷。無意學金錢。洛渚微波常映步。漢宮香水不濡肌。獨步世無吳苑豔。渾身天與漢宮香。恥生湯武干戈域。寧死唐虞揖遜區。中散向人疎嬾甚。步兵因酒過差多。以上後村詩話。

狄遵度

遵度字元規。侍郎業之子。長沙人。以父任爲襄城簿。早卒。有集。

遜齋閑覽。狄遵度幼而聰慧。弱冠爲文。詞氣豪邁。有韓柳之風。其爲歌詩。每以子美爲法。既而友人有往湘中者。乃爲文使之。未幾。弔子美之墳。數日。忽夢子美與之反覆。諷誦。其平生所爲詩十餘篇。皆世所未聞者。及覺。彷彿可記。纔十餘字。

佳城篇續夢中作時年十六。

佳城鬱鬱頽寒烟。孤雛乳獸號荒阡。夜臥北斗寒挂枕。霜拱木落雁連天。浮雲西去伴落日。行客東逝隨長川。乾坤未毀吾尙在。肯與螻蛄論大年。

侯鯖錄。遵度慕杜子美韓退之句法。一夕夢子美自誦其逸詩。既覺。猶記其兩句云。夜臥北斗寒挂枕。木落霜拱雁連天。遵度因足成之。

夢溪筆談。狄遵夢中句。有丘墓閒意。不數月卒。

和渙之深秋月夜書事

洞庭葉下涼颼颼。凍天頑白凝不流。圓月擬缺不忍缺。輕露欲浮終未浮。憶吹朱籟鳳駟上。更采紫芝雲

嶠阪玉樓天半幾千尺。珠樹玲瓏懸上頭。宋文鑑。

詠芭蕉

植蕉低簷前。雙叢對含雨。葉閒求丹心。一日視百俯。胸中數寸赤。不惜爲君吐。心盡腹亦空。况復霜雪苦。非無後凋意。柔脆不足禦。全芳備祖。

魏

野臧奎 陳越

野字仲先。號草堂居士。蜀人。後居陝州東郊。真宗西祀。聞其名。遣中使召之。野閉戶踰垣而遁。天禧三年卒。贈祕書省著作郎。有草堂集。鉅鹿東觀集。

澠水燕談。上聞野居有幽致。遣人圖之。故野有句云。幽居帝畫看。

玉壺野史。魏野字仲先。其詩固無飄逸俊邁之氣。但平朴而常不事虛語爾。如贈寇萊公云。有官居鼎鼐。無地起樓臺。及謝寇萊公見訪云。驚回一覺遊仙夢。村巷傳呼宰相來。

夢溪筆談。野以詩著。當世顯人多與之遊。北都有妓女美色。而舉止生。極人謂之生張八。野贈詩有君爲北道生張八。我是西州熟魏三之句。

晨興

夜長已待得晨興。耿耿猶喚不甞。燒葉爐中無宿火。讀書窗下有殘燈。臨堦短髮梳和月。傍岸衰容洗帶冰。料得巢禽翻怪訝。尋常日午起慵能。

六一詩話此詩本是燒葉爐中無宿火或有嫌燒葉之語爲貧寒太甚改葉字爲藥字不惟壞此一句併下句減氣味矣

閑居書事

無才動聖君。養拙住西村。臨事知閑貴。澄心覺道尊。成家書滿屋。添口鶴生孫。仍喜多時雨。經春免灌園。

謝寇萊公見訪

晝睡方濃向竹齋。柴門日午尙慵開。驚回一覺遊仙夢。村巷傳呼宰相來。

書友人屋壁

曰瑄按集作書俞逸人屋壁起結句小異今從方氏

達人輕祿位。居處傍林泉。洗硯魚吞墨。烹茶鶴避烟。閑惟歌聖代。老不恨流年。靜想閑來者。還應我最偏。

瀛奎律髓真宗祀汾陰遣使召之題此詩壁間遁去使還以詩奏

上曰野不來矣先是上嘗圖種放所居野居亦有幽致又令圖之

春日述懷

春暖出茅亭。攜筇傍水行。易諳馴鹿性。難辨鬪雞情。妻喜栽花活。兒誇鬪草贏。翻嫌我慵拙。不解強謀生。

冬日書事

十月天不暖。前村到豈能。閑聞啄木鳥。疑是打門僧。壞砌平山雪。空堂照瀑冰。晚來因出戶。方始暫攜藤。

題普濟院

河上似江邊。寺臨河掩關。百年人自老。一閑意常閑。野闊連天碧。苔多徧地斑。數聲離岸櫓。幾點別州山。

寒食花藏縣。重陽菊遶灣。懸崖分鳥道。隔水似塵寰。雨急和僧語。雲高共鶴攀。磬聲喧水檻。旛影落波瀾。雁去歸汾曲。槎來犯斗閒。冷齋如有暇。到此屢開顏。

暮秋閑望

水閣閑登覽。郊原欲刈禾。壞簷巢燕少。積雨病蟬多。砧隔寒溪擣。鐘隨曉吹過。扁舟何日去。江上負烟蓑。

夏夜與臧奎陳越會宿河亭聯句三十韻

雨破畏日沈。月出酷暑歇。野衙中河亭上。靜與山不別。良朋俱遠來。文會一何悅。越箕踞巾烏閑。玩好琴樽列。野煩禮厭拘攣。陳言誓擺脫。奎揮塵影參差。飯菜香馥烈。越酒令時解嚴。談鋒久不缺。野樂天無荒淫。飽德異饕餮。奎高談聞謔浪。正義排詭譎。抗俗絕依違。評文無詆訐。野輿論鄙譸張。奴學賤剽竊。奎徵引角競出。聯唱更相發。越較善合權衡。馳義同軌轍。野萬物情難逃。千古疑皆決。奎聖道約扶持。淫辭謀劓刖。越風鑒定妍媸。天機藏巧拙。野是物有廢興。惟道無本末。奎義路自坦夷。世途終兀臬。越烈士死光輝。常徒生汨沒。野逸義小風雲。直筆輕斧鉞。奎孟軻心不動。陶潛腰恥折。越疲倦僕屢更。輝映燭頻跋。野浩歌不成調。狂舞寧赴節。奎氣候隨斗占。分野爲星別。越葢韻時斷續。漁燈乍明滅。野河聲疑地震。電影若天裂。奎飄風奪輕紈。零露透疎葛。越酒海傾屢空。詩源浩不竭。野咸平己亥歲。二年時六月。奎此會是何人。其名野奎越。越以上鉅鹿東觀集

貽王魏公旦

人間宰相惟三載。君在中書十四年。西祀東封俱已了。好來平地作神仙。

蒙齋筆談天禧末王魏公求退不許
野寄以詩魏公亟袖以聞遂得謝

題壁絕句

誰人把我狂詩句。寫向添蘇繡戶中。閑暇若將紅袖拂。還應勝得碧紗籠。

續湘山野錄魏處士貌寢性敏志節高尚鳳閣舍人孫僅與野敦縞素之舊尹京兆日寄野詩說府中之事野和之其末有見
說添蘇亞蘇小隨軒應是珮珊珊之句添蘇長安名姬也孫頗愛之一日謂添蘇曰魏處士詩中以爾方蘇小如何添蘇曰處
士詩名謫于天下著鄙薄在其間是蘇小之不如矣又何方之乎孫大喜以野所和詩贈之添蘇以未見野深懷企慕求善筆
札者大署其詩于堂壁夸鬻于人未幾野抵長安好事者密召過添蘇家不言姓氏添蘇見野風貌魯質固不前席野忽舉頭
見壁所題添蘇曰魏處士見譽之作野殊不答乃
索筆于其側別紀一絕添蘇知是野大加禮遇

清明

無花無酒過清明。興味都來似野僧。昨日鄰翁乞新火。曉窗分與讀書燈。合璧事類前集

尋隱者不遇

尋眞誤入蓬萊島。香風不動松花老。採芝何處未歸來。白雲滿地無人掃。古今詩話

句

千林蠹如盡。一腹餒何妨。

唐溪詩話仲先詠啄木
鳥句司馬溫公頗稱之

吉凶終在我，翻覆謾勞君。竹杯琰 同上 甚退難饒客，琴生卻問兒。
雁急長天外，颿遲落照中。五色中
偏貴，千花後獨尊。菊 以上後村詩話

林 逋

逋字君復，錢塘人，隱西湖之孤山，真宗聞其名，詔長吏歲時勞問，卒賜諡和靖先生，有集。

歸田錄逋工于書，善爲詩，如梅花詩云：疎影橫斜水清淺，暗香浮動月黃昏。評者謂前世詠梅者多矣，未有此句也。及其臨終，爲句云：茂陵他日求遺藥，猶喜曾無封禪書。尤爲人稱誦。自逋之卒，湖山寂寥，未有繼者。

青箱雜記：逋景祐初尙無恙，范文正公亦過其廬，贈逋詩曰：巢由不願仕，堯舜豈遺人。又曰：風俗因君厚，文章到老醇。其激賞如此。

山村冬暮

衡茅林麓下，春氣已微茫。雪竹低寒翠，風梅落晚香。樵期多獨往，茶事不全忙。雙鷺有時起，橫飛過野塘。
宿洞霄宮

大滌山相向，華陽路暗通。風霜唐碣朽，草木漢祠空。劍石苔花碧，丹池水氣紅。幽人天柱側，茅屋灑松風。
秋山不可盡，秋思亦無垠。碧澗流紅葉，青林點白雲。涼陰一鳥下，落日亂蟬分。此夜芭蕉雨，何人枕上聞。

西湖

混元神巧本無形。匠出西湖作畫屏。春水淨于僧眼碧。晚山濃似佛頭青。鸞榼粉堵搖魚影。蘭杜烟叢鬧鷺翎。往往鳴榔與橫笛。斜風細雨不堪聽。

湖上初春偶作

梅花開盡臘亦盡。晴暖便如寒食天。春色半歸湖岸寺。人家多上郭門船。文禽相並暎短草。翠潏欲生浮嫩烟。幾處酒旗山影下。細風時已弄繁弦。

酬畫師西湖春望

笛聲風暖野梅香。湖上凭闌日漸長。一樣樓臺圍佛寺。十分烟雨蒨漁鄉。鷗橫殘葑多成陳。柳映危橋未著行。終約吾師指芳草。靜吟閑步岸華陽。

梅花

衆芳搖落獨暄妍。占盡風情向小園。疎影橫斜水清淺。暗香浮動月黃昏。霜禽欲下先偷眼。粉蝶如知合斷魂。幸有微吟可相狎。不須檀板共金樽。吟懷長恨負芳時。爲見梅花輒入詩。雪後園林纔半樹。水邊籬落忽橫枝。人憐紅豔多應俗。天與清香似有私。堪笑胡雛亦風味。解將聲調角中吹。

詩話總龜黃山谷云。歐陽文忠公極賞林和靖疎影橫斜水清淺。暗香浮動月黃昏之句。而不知和靖別有詠梅一聯云。雪後園林纔半樹。水邊籬落忽橫枝。似勝前句。文章大概亦如女色。好惡止繫于人。

詠蝶

細眉雙聳敵秋毫。荏苒芳園日幾遭。清露宿花應自得。暖風和絮欲爭高。情人歿久魂猶在。傲吏齊來夢亦勞。閑掩遺編苦堪恨。不并香草入離騷。

深雪偶談精

綴不減唐人

頃得宛陵葛生所茹筆。每用之。如麾百勝之師。橫行於紙墨間。所向無不如意。惜其久且弊。作詩以錄其功。

神鋒雖缺力終存。架琢珊瑚欠策勳。日暮閑窗何所似。灞陵憔悴故將軍。以上和靖詩集。

苔溪漁隱叢話殊

有憫勞念舊之意

制誥李舍人以松扇二柄并詩爲遺亦次來韻

編松爲箠寄山中。兼得紫薇詩一通。入手涼生殊自慰。可煩長聽隱居風。

孤山雪中寫望

片山兼水透晴雪。復漫漫。一徑何人到。中林盡日看。遠分樵載。昨蓋切重斜壓葦叢乾。樓閣嚴城寺。疎鐘動晚寒。

孤山從上人林臺寫望

林表秋山白鳥飛。此中幽致世還稀。誰家岸口人烟晚。坐見漁舟兩兩歸。

送史殿省典封川

炎方將命選朝倫。治行何嘗下古人。擁旆肯辭臨遠郡。登艫還喜奉慈親。水連芳草江南地。烟隔寒梅嶺上春。若過中途值歸雁。慰懷能與致音塵。

春日齋中偶成

空階重疊上垣衣。白晝初長社燕歸。落盡海棠人臥病。春風時復動齋扉。

江村銷夏錄載五詩真迹跋云。殿直丁君自沂適閩。橫舟惠顧。晤語未幾。且以拙詩爲索。病中援筆。勉書數章。少塞好事之意耳。時皇上登寶位。歲夏五月。孤山北齋手書。林逋記。

句

隱非秦甲子。病有晉春秋。水天雲黑白。霜野樹青紅。風回時帶笛。烟遠忽藏村。

後村詩話。五言尤難工。林和靖一生苦吟。自摘出十三聯。今惟五聯見集中。如句云云。皆不在焉。

唐異

異字子正

李長文琴史。唐處士子正。才藝甚高。肥遯不出。李西臺建中時。謂善書。而子正之筆。實左右之。江東林逋亦稱墨妙。一見而歎曰。唐公之筆老而彌壯。崔諗德時謂善琴。而子正之音。嘗唱和焉。高平范公從而師之。嘗貽之書曰。崔公既沒。琴不在茲乎。二妙之外。尤嗜風雅。探幽索奇。不知老之將至。意淳語真。不爲憤惋。文正公嘗稱其如此。

閑居書事

幽居經宿雨，屐齒徧林塘。一逕無過客，千峯自夕陽。晝禽多獨語，夏木有餘涼。招隱詩慵寄，時清誰肯忘。
宋文鑑。

韓退

退字知止，絳州人。

絕句

山下跨雪精，上便不論程。嗅地打不動，笑天休始行。

溫公續詩話：韓退處士，絳州人，放誕不拘，浪跡秦晉間，以詩自名，嘗跨一白驢，有詩云：好著寬袖鶴氅，醉則鶴舞。石曼卿贈詩曰：醉狂元鶴舞，閑臥白驢號。

黃亢

亢字清臣，浦城人，有東溪集。

宋史新編：亢年十五，以文謁翰林學士章得象，得象奇之，遊錢唐，以詩贈處士林逋，逋尤激賞。時王隨知杭州，奏禁西湖爲放生池，亢作詩數百言，士人爭傳之。

臨水

人生朝復暮，水波流不駐。去年昨日水，今日到何處。惆悵雨殘花，嫣紅隨水去。花落水東流，識盡人生事。

一作趣。宋文鑑。

荆溪林下偶談文鑑載黃亢臨水詩云。去年昨日水。今日到何處。蓋蹈
襲杜牧題安州浮雲樓寄湖州張郎中云。當時樓下水。今日到何處。

令狐揆

揆字子先。安陸人。

句

借書離近郭。冒雪渡寒溪。

王得臣塵史。令狐子先。安陸鄉先生也。策仕齊安理掾。歲滿還里。卜築涓溪之南。耕釣之外。著書彈琴而已。時入城。至集賢張
君房之第。借書。布衣林逸。善繪事。乃擬摩詰寫浩然故事。以爲令狐秋掾雪中渡鄖溪圖。其序略曰。張侯畜書萬卷。掾嘗就閱。
或假輟以歸。兼出入跨羸馬。頂戴華陽紗巾。著墨慘布襪。繫條。小童攜書籠。負琴以隨。冬中復來假書。時值微雪。飄灑。景物蕭
索。掾度溪以歸。常服外加以阜繒暖帽。委轡長吟曰。借書離近郭。冒雪渡寒溪。聞者毛骨寒。覺是知至人。操履倬越。風韻體裁。
乃與天地四時之氣
相參焉。先生諱揆云。

高言

言字明道。汴人。

呈友人

昨夜陰風透膽寒。地爐無火酒餅乾。男兒慷慨平生事。時復挑燈把劍看。
青瑣高議。

段全

全與丁謂同時人稱段推官

句

斜搗花腳面闊大打廉撝

上官融友會談叢段全薄有才思不拘細行歷幕席浪別陝右務嘲諷取悅于人
雷掾丁謂好蹴踘既貴後亦爲之全撰鞠詩二十韻以獻內有句云云稱爲中的

張仲威

仲威官舒州守

設醮靈仙觀

瑞氣蔥蔥雨露邊。壁門金闕倚層巔。青霓絳節嚴中夜。綠蓋丹輿會九天。香染舊泥封寶洞。聲傳鳴鶴湛靈泉。分明步入烟霄上。何必餐霞駐少年。宋藝圃集

廖齊

永州有感

下馬連聲叩竹門。主人何事感遺恩。回頭泣向兒童道。重見甘棠舊子孫。

青瑣後集廖齊父爽直嘗爲永州刺史齊

後遊零陵于民間見父題壁感而成詩

周序

經少陵墓在鞏縣。

杜陵詩客墓。遙倚北邙巔。斷碣居人識。高名信史傳。猿聲悲落照。樹色翳寒烟。唯有文章在。輝光夜燭天。
河南府志。

